

EBONIS
VITA OTTONIS EPISCOPI
BAMBERGENSIS

EDIDIT

PHILIPPUS JAFFÉ

EDITIO IN SCHOLARUM USUM REPETITA

EX

BIBLIOTHECA RERUM GERMANICARUM

BEROLINI
APUD WEIDMANNOS
MDCCCLXIX



Digitized by the Internet Archive
in 2011 with funding from
University of Toronto



EBONIS

VITA OTTONIS EPISCOPI

BAMBERGENSIS

EDIDIT

PHILIPPUS JAFFÉ

EDITIO IN SCHOLARUM USUM REPETITA


EX

BIBLIOTHECA RERUM GERMANICARUM

BEROLINI

APUD WEIDMANNOS

MDCCCLXIX



24386

PROOEMIUM.

Monasterii S. Michaelis Bambergensis, medio saeculo duodecimo omnibus rebus ornati, copiosi, habitatoribus frequentissimi fuit Ebo¹ presbyter et monachus, sincerus ut videtur homo ac modestus², qui admiratione pietateque Ottonis praeclari episcopi iam mortui imbutus, res gestas eius consignare litteris instituit³. Et ipsum quidem Ottonem cognovisse videtur nec dubitare licet, quin circiter die 20 Decembris 1139, cum episcopus vita exiret, Bambergae versatus sit⁴; attamen facile perspicimus, nullo illius commercio fruitum Ebonem esse. Non enim usquam certum talis necessitudinis vestigium posuit, contraque ipsius narrationis suae confirmandae causa nominatim ostendit, quae scripturus esset „gesta piissimi patris Ottonis, ea ex ore veridici ac Deo dilecti sacerdotis Udalrici audivisse“⁵. Udalricus autem, ecclesiae S. Egidii ab Ottone aedificatae⁶ sacerdos, tanta episcopi familiaritate usus erat, ut non modo consiliorum eius conscius fieret⁷, sed etiam, cum priori itineri Pomeranico interesse iussum morbus domi detinuisset, qui totius posterioris peregrinationis actuo-

1. Nomen eius et in saec. XII necrologio S. Michaelis (Bibl. rer. Germ. V 571 ad 17 K. Iun.) et in codice Lat. Mon. 23582 saec. XIV (v. infra p. 6) sic scriptum est: „Ebo“. Andreas demum abbas S. Michaelis exeunte saec. XV (de quo v. infra) hac nominis forma: „Ebbo“ utebatur. 2. V. praefationis initium. 3. Praef.: „sciant, me sola caritate urgente, dum vocem pectori negare non possum, ob noticiam posterorum hec humiliter depromere“. 4. L. III c. 25: „Quam (visionem) tempore dormitionis beatissimi patris nostri ex ore eiusdem senioris Lyppoldi audivimus“. 5. V. praef. 6. V. L. I c. 18 et 21. 7. V. L. II c. 3.

*sus administer esset*¹ dignus duceretur. Inde Ebo censuit Udalrici „reverendae maturitati et spectatae coram Deo et hominibus fidei ita se necesse esse credere, acsi propriis oculis ea, quae ille diceret, vidisset“². Sed praeterea adhibitis quibusdam litterarum monumentis — ut necrologio S. Michaelis, annalibus S. Michaelis³, Heimonis libro chronologico⁴, ipsius Ottonis de priore itinere relatione⁵, epistolis⁶ — scriptorem ab aliis quoque aequalibus varia coram habuisse⁷, eo firmitus existimare debemus, quo breviori post Ottonis obitum in ipsa eiusdem sede librum formavit, et hunc quidem in solius episcopi acta minime conclusum.

Auxit enim Ebo operis sui non artificium potius quam utilitatem, quod iis, quas narrandas proprie susceperat, rebus Ottonianis haud exiguas relationes admiscuit de coenobio S. Michaelis⁸, de Wolframmo eiusdem monasterii abbate⁹, de Bernhardo illo infortunato Pomeranorum apostolo¹⁰, de Wignando abbate Tharisiensi¹¹. Cuius abbatis et vivendi rationem et mortem, quam die 18 Maii 1151 accidisse liquet, adeo concitato animo prosecutus scriptor est, ut librum non ita multo post factum esse oporteat. Idque eo confirmatur, quod et Ebo Udalrici sacerdotis, quem die 23 Martii 1159 vitam posuisse notum est¹², omnibus locis ut viventis mentionem intulit et Herbordus in dialogo de Ottone scribendo iam intervallo annorum 1158 et 1159 librum Ebonianum sectatus est. Atque haec operis in alienam rem convertendi celeritas evenit etiam vivo ipso Ebone, qui demum die 16 Maii 1163 animam edidit¹³.

At fere plane ignoraremus hodie, Ebonem ab Udalrico doc-
tum de Ottonis rebus gestis tractavisse, neque omnino eam, quam
proposituri sumus, pleniorē vitae descriptionem legeremus, nisi
hoc percommode cecidisset, ut Andreas, monasterii S. Michaelis

1. V. L. III c. 1, 7, 8, 12, 13, 14, 15, 18. 2. V. L. II c. 1. 3. V. praef. 4. V. L. II c. 1. 5. L. II c. 12. 6. L. I c. 10, 12, 13, 14, 15, 20; L. II c. 16. 7. L. I c. 3: „Hoc modo servus Dei Ūdalricus pium Ottonem in curtem regiam accessisse ferebat. Alii vero dicunt“ cet. Cf. supra p. 3 n. 4. 8. V. praef. 9. L. I c. 19. 10. L. II c. 1. 11. L. II c. 17. 12. V. Necrol. S. Mich. l. l. p. 569 ad 10 K. Apr. 13. V. Necrol. S. Mich. l. l. p. 571 ad 17 K. Iunii.

ab anno 1183 ad annum 1502 abbas, in conplandis litterarum monumentis industrius, ad memoriam egregii episcopi bis recolandam incitaretur.

Etenim alteram Ottonis vitam petente Benedicto episcopo Caminensi (1186—1198) composuit Andreas¹, alteram a Iohanne Machario, conventus Bambergensis guardiano, rogatus². Priorem autem harum vitarum Andreanarum optime scriptam tenet

(C) codex quondam Caminensis, hodie in bibliotheca ecclesiae S. Iacobi Stettinensis servatus, membranaceus, die 14 Septembris a. 1187 scribendo absolutus³, cuius benignissime a Schifmanno archidiacono huc missi vestigia persequi licuit. Posterior Ottonis vita ab Andrea corrogata inest in

(B) codice bibliothecae Bambergensis Rf II 17 membranaceo, consummato die 11 Iunii anni 1199⁴, quem ut Berolini adhiberem M. Stengleinius bibliothecarius magna cum humanitate concessit.

In horum igitur operum Andreanorum prooemiis de Ebone scriptum est, et in C quidem his verbis: „Ebbo, nostri cenobii presbiter et monachus, nulli modernorum secundus, idem negotium (scribendae vitae Ottonis) attemptavit; cui si ipse manum extremam imposuisset, parvitas mea super hoc omnino digitum ori imposuisset“. In B autem hoc pacto Andreas de eodem tradidit: „Ebbo vero presbiter et monachus cenobii nostri vitam beati viri Ottonis episcopi, prout ex ore Udalrici sacerdotis S.

1. Hanc vitam edidit Valerius Iaschius: „Andreae abbatis Bambergensis de Vita S. Ottonis libri quatuor“, Colbergae 1681 p. 12—136. 2. Edidit hanc vitam Gretserus: „Divi Bambergenses“, Ingolstadii 1611 p. 145—368. Quae editio repetita est anno 1737 in Gretseri opp. X p. 570—669. 3. Haec verba enim vitae adhaerent: „Explicit vita et de miraculis sanctissimi ac piissimi Ottonis Babenbergensis episcopi ac Pomeranorum apostoli. Scriptum per me fratrem Erhardum Vetter ordinis sancti Benedicti monachum indignum, professum in Monte monachorum Babenbergensis dyocesis, anno Domini millesimo quadringentesimo octuagesimo septimo, in die exaltationis sancte crucis, in prepositura sancte Fidis virginis et martiris“. 4. In extremo enim libro haec leguntur: „Explicit liber quartus et ultimus de obitu et miraculis sanctissimi ac piissimi Ottonis Babenbergensis episcopi Pomeranorumque apostoli, anno Domini millesimo quadringentesimo nonagesimo nono, ipsa die Barnabe apostoli F. N. S.“

Egidii edoctus fuerat, eleganti satis stilo descripsit“. Non potest igitur dubitari, quin, quam Ebonianam Ottonis vitam Andreas consuluit, ea nomine ipsius scriptoris insignita fuerit, praesertim cum etiam in codice Latino Monacensi 23582 membranaceo saec. XIV fol. 5v — 6v descriptis nonnullis operis Eboniani particulis hoc lemma antecedit: „Nota, quando et a quibus mons monachorum et alias dictus mons sancti Mychahelis inhabitari primo cepit, conscripta ab Ebone prespitero et monacho sancti Michaelis ibidem“.

Itaque de Ottone praeter ipsius Ebonis librum etiam Herbordi dialogum sibi prae manibus fuisse, in praefationum illarum utraque asseveravit Andreas. Atque quamvis quodammodo intelligi voluerit, sese scriptorum eorundem orationi quasi non semper idoneae hic illic succurrisse¹, tamen nihil apertius est, quam omnem Andreae artem in eo versari, quod singula Ebonis Herbordique capita permiscuerit ad verbum exscripta. Id enim facillimum animadversu est ex ipsius Herbordi dialogo, qui totus integer nuper in lucem protractus est², atque etiam particulatim ex ea, de qua inferius agam, coartata vita Eboniana.

Andreana autem Ottonis vita C, et ea quidem in eodem codice (C) diligenter accurateque exarata, ad restituendum Ebonis opus maximam materiam affert, propterea quod et secundum tertiumque eiusdem narrationis libros integros, puros, admixtionibus Herbordianis vacantes comprehendit, ibique primo tantum libro inter capita 16 et 17 et inter capita 17 et 18 nonnullae dialogi partes inculcatae sunt. In vitam B vero ab Andrea confectam, neque tamen in eodem codice (B) pari accuratione ut prior descriptam, omnia primi quidem libri Eboniani praeter praefationem sed nonnulla tantum secundi et tertii librorum capita³ illata sunt. Ceterum ibidem unum quodque fere horum capitum isto nomine: Ebbo signatum est⁴.

1. In praef. C: „Hoc tamen mihimet ex proprio sudore coniunxi, ut latius diffusa modesta brevitae arctius coherceam, strictius digesta moderata prolixitate dilatem, minus regulariter prolata ad rectitudinis lineam corrigam“. 2. V. praef. in Herb. dial. (Bibl. rer. Germ. V). 3. L. II c. 14, 15, 16, 17, 18; L. III c. 1, 2, 3, 4, 5, 6, 7, 10, 11, 19, 24. 4. De qua

Sed quantumcunque C, prior horum duorum codicum ad reficiendum Ebonis librum valet, factus est amplius quam trecentis annis post scriptoris aetatem exeunte saeculo XV; librariique tanto tempore posteriores quam facile peccent quis nescit? Unde eo studiosius antiquiore quodam adiumento usus, nonnullis locis aut mancis aut vitiosis medicinam admovi.

Otto II enim episcopus Bambergensis (1177—1196) cum Ottonem I Pomeranorum apostolum in sanctorum numerum referri cuperet, Wolframmus II abbas S. Michaelis post varios conatus frustra captos Romae a Clemente III papa impetravit, ut Herbipoli die 10 Augusti 1189 ab Ottone Eichstetensi et Eberhardo Merseburgensi episcopis Otto sanctus declararetur. Hac in re saepenumero de quadam eiusdem vita mentionem factam esse invenimus. Nam Wolframmus abbas iam in exordio negotii haec protulit: „Vita eius (Ottonis) plena signis et virtutibus et misericordiae operibus apud nos est, quae apostolico praesentanda est“. Postea Romae vitam illam a Wolframmo apportatam cum iussu papae Laborans cardinalis legisset, laudibus extulit Ottonem, „qui apostolus Pomeranorum nominari et esse meruisset“. Herbipoli denique „episcopi susceptum librum inter autentica scripta reposuerunt“¹.

Haec autem verba a Laborante cardinali dicta: „qui apostolus Pomeranorum nominari et esse meruit“ quia evidenter ex Ebonis praefatione² arcessita sunt, arguere videntur, istam vitam nullam aliam fuisse nisi scriptam ab Ebone. Nec tamen negari potest, non ipsum Ebonis opus Romae excussum esse sed alium librum, ex eodem quidem opere deductum, at quo magis curiae Romanae arrideret, coartatum multisque locis commutatum. De

re in praefatione huius libri sic retulit Andreas: „Unde quaecumque scripta huic operi conducentia de ipso (Ottone) invenire potui, in unum colligere studui, et nonnunquam nomen auctoris expressi; sperans, aliquem emulum et tante auctoritatis ignarum lectorem exinde posse edificari“.

1. de his rebus omnibus v. Ex miraculis Ottonis (Bibl. rer. Germ. V).

2. ubi sic est: „et apostolus gentis Pomeranorum nostris temporibus appellari meruit“.

cuius libri¹ ratione optime intelligi potest ex codicum eundem tenentium praestantissimo

(E) codice quondam Halesbrunnensi nunc bibliothecae universitatis Erlangensis 248 (K. m. 142) membranaceo, aut exēunte saeculo XII aut ordiente saec. XIII exarato, quem bibliothecarii petenti mihi libentissimis animis miserunt.

Exclisit enim mutator fere omnia, quae ad historiam coenobii S. Michaelis et Wolframmi Wignandique abbatum pertinent; multa alia in angustum deduxit; orationem autem sexcenties corrigens, non eo semper animum intendit, ut splendidioribus verbis uteretur, sed illud eum interdum egisse videmus, ut Otto humilior sedique Romanae derogior etiam appareret, quam aut reapse fuisset aut fuisse apud Ebonem visus esset.

In hoc genere est, quod cum Ebo L. I c. 11 sic scripsisset: „His ergo litteris (Ottonis) ab apostolico (Paschali II) reverenter susceptis et relectis“, mutator verbum hoc: „reverenter“ oppressit; et cum Ebo ibidem haec posuisset: „Cum hilari satis reverentia ab apostolico (Paschali II) susceptus fuisset (Otto)“, mutator ita scribendum duxit: „Cumque ab apostolico clementer susceptus fuisset“; itemque cum Ebo L. I c. 12 his verbis usus esset: „apostolicus litteras commendaticias pro dilecto patre Ottone misit“, corrector ita retulit: „apostolicus litteras commendaticias pro dilecto filio Ottone misit“. Illud autem maius est, quod eodem consilio etiam epistolam ipsius Ottonis, anno 1106 a Paschali II consecrationem exigentis, adulteravit. Legitur enim haec epistola iisdem verbis et in Udalrici codice² et apud Ebonem, in qua cum papam singulari numero appellari reperisset mutator, Ottonis audaciae succurrens, numerum pluralem usque quaque adhibuit hoc modo:

<p>Otto scripserat haec:</p> <p>— desideramus, scire sanctitatem tuam .. nos paruisse ..</p>	<p>Mutator scripsit haec:</p> <p>— desideramus, scire sanctitatem vestram .. nos paruisse ..</p>
--	--

1. editi ex „ms. bibliothecae Paulinae Lipsiae“ (cod. bibl. universitatis Lipsiensis 844 membr. saec. XIII) a Sollerio in Act. SS. Iul. T. I 425 — 449.
2. n. 128 Bibl. rer. Germ. V 239 — 240.

legato tuo — Quam ob rem ve-	legato vestro — Quam ob rem
stigiis pedum tuorum advo-	vestigiis pedum vestrorum ad-
luti — ad te clamo“ cet.	voluti — ad vos clamo“ cet.

Tales verae sententiae depravationes a me in recensendo Ebonis opere sprete esse, nemo mirabitur. Nec recepi de monasteriis ab Ottone conditis relationem a correctore post libri I caput 16 additam, propter id quod non ex ipsius Ebonis libro sed ex Herbordi dialogo eadem ratione, qua mutator alias quoque uti solet, decerptam esse reperimus¹.

At contra sunt in eiusdem mutatoris codice E momenta non solum ad explendas nonnullas codicum Ebonianorum lacunas, verum etiam ad graviores quasdam corruptelas removendas. Requisivi enim ex eodem codice initium praefationis ab Andrea praetermissum et libri III capitulum 15 et 16 partem amplam, quae ideo non legitur in codice C, quod folium excisum ibi est.

Invenimus etiam in Andreae codicibus², Ottonem iuvenem „saepius transitum fecisse per Wirzeburgense cenobium“; quare viri docti eundem puerilibus annis Wirzeburgi versatum esse existimabant. In antiquissimo autem illo codice E non „Wirzeburgense“ scriptum est sed „Wilzeburgense“. Hanc lectionem assumpsi. Prorsus enim quadrat etiam Ottonis incunabulis, quippe quae „iuxta Albuch“ fuisse sciamus³, non ita remota a coenobio Wilzeburgensi⁴.

1. L. I c. 12—17, ubi narratio illa sic inchoatur: „Et primicie quidem operum eius duorum fuit structura cenobiorum (sc. Uraugiae et Urae)“ cet. Quae quidem apud Ebonis mutatorem ita habentur: „Primicie votorum eius edificatio fuit duorum cenobiorum“. Ipse autem Ebo non a duobus illis coenobiis sed ab hospitali Wilziburgensi principium aedificationum ab Ottone factarum sumpsit L. I c. 2: „Hocque primum sue devotionis munus de thesauro bone voluntatis Christo obtulit“. 2. Ebo L. I c. 2. 3. V. L. I c. 17. 4. Capitulum lemmata in duabus vitis Andrianis inter se discrepant neque ab Ebone sunt. Cuius et diversitatis et confictionis probandae causa afferendas duco inscriptiones capitis 2 libri I, de monasterio Wilzeburgensi aperientis. In C enim haec est: „De constructione hospitalis in civitate Herbipolensi per sanctum Ottonem“; in B autem haec legitur: „De iniciis operum et hospitali pauperum per beatum Ottonem in civitate Wurtzepurgensi constructo“. Quae cum ita

Praeterea memorato opus est, eum populum, cuius ad Christi fidem convertendi causa anno 1127 Udalricus ille S. Egidii sacerdos ab Ottone episcopo ex urbe Uznoimia (Usedom) missus est secundum Ebonis L. III caput 14 et 15, in codicibus Andreanis ter appellari „ueranos“, eisdemque codicis E locis admodum contractis illius populi nomen omnino bis inveniri, sed utrobique scriptum his litteris: „uérani, úcranos“. Huc accedit, quod etiam in uno, cui totus Herbordi dialogus inest, codice eiusdem populi patria „ucrania“ vocatur (Herb. L. III c. 11) ipseque populus: „urcani“ (sic pro ucrani, Herb. III 12), ibidemque in lemmate capitis 11 (libri III)¹ cum librarius scripsisset: „De verania insula et gente barbarissima“, ut error indicaretur, duo puncta litterae e supposita sunt, hoc modo: verania. Sicque id populi nomen, quod Ebo ab ipso illo Udalrico acceptum adhibuit, non iam ex coniectura elicitum² sed ex optimis codicibus repetitum ingessi.

Restat, ut in duorum virorum commemoratione verser, a quibus haec mea opera plurimum sublevata est. Unus, Robertus Klempin commentatione peringeniosa et accuratissima (Die Biographieen des Bischofs Otto in Baltische Studien IX 1—245) perditam quondam vitarum Ottonianarum implicationem enodavit. Alter, Rudolfus Koepke, qua est diligentia et industria, una cum ceteris de Ottone operibus etiam Ebonis librum primus edidit in Mon. Germ. SS. XII 822—883. Quorum virorum tanto studii veritatisque amore incensurum neuter ad labores suos meum laborem accedentem moleste feret.

Berolini 3 Idus Februarias 1869.

sint, a lemmatibus illis in edendo Ebonis opere me continui. Distributioni autem capitum, a priore editore factae, me addicendum putavi.

1. Cod. lat. Monac. 23582 fol. 58 v. 2. Cf. de ea re Raumer Regesta historiae Brandenburgensis p. 145 n. 817, Ledebur Die Ucranen und nicht Veranen (Märkische Forschungen III 345—353), Wigger Mecklenburgische Annalen p. 121.

PRAEFATIO.

Omne^a, quod agimus, per humilitatis custodiam munire debemus; quia, testante beato Gregorio: *Qui virtutes sine humilitate congregat, in vento pulverem portat; et unde ferre aliquid cernitur, inde deterius excaecatur*¹. Scripturus itaque gesta piissimi patris nostri Ottonis, quae ex ore veridici ac Deo dilecti sacerdotis Uodalrici audiui, lectores, in quorum forte manus venerint, peto, ne arrogantie aut temeritati hoc ascribant; sed Deo teste sciant: me, sola caritate urgente, dum vocem pectori negare non possum, ob noticiam posterorum hec humiliter depromere. Cuius enim vel saxeum pectus ad compunctionem non moveat tam flagrantissimum huius beati patris desiderium, quo omnes Christi fideles acsi nutrix officiosissima fovere non desiit? Quis sine lacrimis ad memoriam reducat: quomodo totus velut seraphim ad propagandam divine servitutis celebritatem ardebat; quomodo cuncta, que poterat mundo abripere, servis Dei festinabat offerre; quomodo gloriam Christi non solum in Teutonicis regionibus per multa que construxit cenobia et hospitalia dilatavit, sed etiam in exteris et longe remotis barbarorum finibus miro devocionis fervore euangelii tubam cecinit et apostolus gentis Pomeranorum nostris temporibus appellari meruit? Quod quanto his diebus constat insolitum, eo magis in eo amplectendum est et omni laude colendum.

Primum ergo antiquos patres nostros, a quibus locus hic inhabitari cepit, futurorum cognicioni pandamus; et sic de Otone nostro, cooperante gratia Spiritus sancti, proponamus. Anno^b Domini 1015 mons sancti Michaelis apud Babenberch in- 1015
habitari cepit a domno Ratone abbate², quem sanctus Heinricus secundus imperator, huius episcopii constructor, et venerabilis

a. Omne — Uodalrici audiui *recepi ex E; in C haec leguntur*: Scripturus gesta piissimi Ottonis patris nostri, lectores *cet.* b. *Abhinc legitur caput hoc, scriptum manu saec. XIV etiam in (N) cod. lat. Monacensi 23582, quondam Neuenkirchensi fol. 5v—6.*

1. S. Gregorii In euangelia L. I homilia VII, opp. ed. Benedictini T. I 1461. 2. Cf. Ekkehardi chron., Mon. Germ. SS. VI 194.

1015 Kunegunda, specialis mater nostra, tam pro religiosa qua nominatus erat conversacione quam et pro seculari qua pollebat industria eidem loco prefecerunt. Eodem¹ quoque anno fundamenta monasterii locata sunt. Et secundo anno Heinrici abbatis dedicatum est templum ipsum. Itaque domno Ratone viam
 1020 universe carnis ingrediente², successit dive memorie abbas Hein-
 Ian. 16 ricus, mire secundum Deum pietatis et sciencie, secundum seculum magne nobilitatis ac strenuitatis vir; qui fecit³ nobis analogium et duas cruces argenteas deditque casulam bonam chrocei coloris; sed et alia plurima huic loco beneficia contulit. Cuius anno⁴ secundo Eberhardus, primus Babenbergensis episcopus, anno ordinacionis sue
 1021 tertio decimo dedicavit ecclesiam sancti Michaelis in monte
 Nov. 2 Babenbergensi, in honore eiusdem archangeli et sancti Benedicti abbatis, quarta Nonas Novembris, feria quinta, anno Domini 1021^a, indictione quinta, anno autem regni gloriosissimi domini ac patroni nostri sancti Heinrici 21, imperii 9, ipso presidente ac disponente. Huic consecracioni interfuerunt episcopi multi, scilicet Erbo Mogontinus, dudum archicapellanus sancti Heinrici imperatoris, qui altare beati Martini dedicavit, Pilegrinus Coloniensis, qui altare sancti Petri consecravit, cum aliis multis. Post hec Heinricho secundo abbate ad Christum migrante, suscepit curam pastorem domnus Adelhelmus; qui⁵ restituit nobis speculas furto ablatas. Tantusque amator divini erat servicii ac semper choro psallencium interesse affectabat, ut eciam, si in vinea remotiori positus esset, audito vespertinali vel alterius hore signo, tota illuc festinancia et alacri devocione occurreret omnique oracionis tempore primus intrando et ultimus egrediendo fieri satageret. Et hoc pio patre ad celestia vocato, domnus Robertus eodem est anno substitutus. Qui vivus discessit⁶; plures enim abbatias habuit. Post quem sancte recordacionis Eg-

a. 1031 CN.

1. „Eodem — templum ipsum“ legimus etiam ap. Ekkehardum l. l.
 2. 1020 Ian. 16. 3. „fecit — beneficia contulit“ ex Necrol. S. Mich., Bibl. rer. Germ. V 577 ad 7 Id. Oct. 4. „anno — cum aliis multis“ sunt fere omnia ap. Ekkeh. l. l. p. 193 et 194. 5. „qui — ablatas“ ex Necrol. l. l. p. 571 ad 2 Id. Maii. 6. Ex annal. S. Mich. 1071 Bibl. rer. Germ. V 552.

gibertus ipso anno constituitur. Qui et ipse vivus abscessit¹, eo quod 1071
et alia multa procuraret cenobia. Et in monasterio Suarzahensi^a
requiescit²; cuius eciam sepulchrum miraculis est illustratum.
Huic Uto levita subrogatur. Post quem anno sequenti Willo 1083
abbas huic loco preficitur. Quo de hac vita sublato, Tiemo 1085
dyaconus substituitur. Hoc quoque cita morte raptō, Gum- 1094
boldus Ratisbonensis de monasterio beati Emmerammi assump-
tus, loci huius regimen est sortitus. Hoc tempore apud nos
regularis propositi norma admodum erat collapsa; sed, Dei gra-
tuita preveniente clemencia, in adventu domini ac nutritoris
nostri piissimi Ottonis episcopi nobiliter est reparata.

Nunc igitur tantum lumen ecclesie unde processerit, videamus; et quo ordine ad culmen pontificatus accesserit, fideli relatione aperiamus.

LIBER PRIMUS.

1. Igitur ex provincia Alamannorum beatus Otto generosa stirpe et parentibus secundum carnem liberis oriundus fuit, patre Ottone et matre Adelheida nuncupata. Qui ambo, simplicitati et mansuetudini operam dantes, nulli violenciam aut oppressionem inferebant; quin immo, piis operibus et elemosinis vacantes, Dei nutu ad consolationem ecclesie elegantem hunc filium gignere meruerunt. Qui, decursa teneriori infancia litteris imbutus, ut primum annos intelligibiles attigit, mirum in modum spiritu sapientie et intellectus³ habundare cepit. Sed et morum gravitate et modesti habitus nitore cunctis acceptus et honorabilis erat.

Accidit forte illis diebus, ut germana soror Heinrici quarti imperatoris Iudita⁴ nomine in matrimonio iungeretur Polizlao⁵ post 1087 Poloniorum duci. Cui ille tamquam fidelissimus adherens capellanus, Poloniam venit. Ibique, in brevi loquelam gentis addiscens et prefate matrone obsequio deditus, prudenter se age-

a. Suarzanensi *NC*.

1. Indidem l. l. 2. Cf. *Necr.* l. l. 578 ad 6 Kal. Dec. 3. Isai. 11, 2. 4. vidua Salomonis, quondam Ungariae regis, in exilio mortui a. 1087 (v. Bernoldi *chron.*, *Mon. Germ. SS.* V 446). 5. Wladislao Hermannō.

bat; donec magnus valde et nominatus in regione illa factus est. Sed et nobiles^a quique et potentes illius terre certatim ei filios suos ad erudiendum offerebant; sicque Deo cuncta eius opera dirigente, non mediocriter dives esse cepit in possessione auri et argenti. Non enim in ludicris et vanis mundi illecebris opes, sapientia et fidelitate sua congregatas, expendebat; sed ut vir prudens et sensatus rem suam servare noverat. Domna etiam Iudita, cui familiare contubernium prestabat, frequenter per eum munera varia et permagnifica germano suo imperatori dirigebat; utpote que nullum fide et moribus inter obsequentes sibi prestanciolem habebat. Cuius legacionis officium tanta auctoritate et circumspectione persolvebat, ut pro hoc eciam ipsi rerum domino ammirabilis videretur.

2. Sepius vero transitum faciens per Wilzeburgense^b cenobium¹, a religioso eiusdem loci abbate Heinrico nomine, ut vir gravioris persone, reverenter suscipiebatur debitoque humanitatis officio benigne tractabatur. Cuius benivolentie vir sagacis animi non inmemor audiensque, illic magnam victualium rerum esse penuriam, ut totus misericordie et caritatis visceribus affluebat, inopie eorum condoluit et — quia caritas operatur magna, si est; si vero operari rennuit, caritas non est — ex opibus, a Deo sibi concessis, hospitale ad receptionem peregrinorum illic construxit. Hocque primum sue devotionis munus de thesauro bone voluntatis Christo obtulit. Sic bona arbor, fructum plurimum germinatura, in florem erupit. Quasi primicias agri sui ad altare veri sacerdotis detulit; ut centuplum in hoc seculo, et in futuro vitam eternam reciperet². Bonum plane initium, quod finis est optimus subsecutus.

3. Post obitum igitur venerabilis domne Iudite ad Teutonicas reversus regiones, Ratisbonam adiit. Ubi, canonicis in servicio Christi adherens, reverendi habitus modestia ac probabilis vite disciplina cunctis amoris et exemplo fuit. Illo tempore

a. *corr. in nobilē C.* b. *sic est in E; (Wiertzburgense C, Wurzepurgense B).*

1. Wilzburg coen. d. Eistetensis. 2. Matth. 19, 29: „centuplum accipiet et vitam aeternam possidebit“.

abbatissa de Inferiori monasterio magne opinionis — utpote neptis Heinrici imperatoris — et virtutum operatrix habebatur. Que, cernens persone et morum eius elegantiam audiensque magni consilii virum, sine mora eum advocans, ut alterum Ioseph, rerum suarum tociusque domus dispensatorem constituit¹; et ille solita gravitate ac industria, fideli devocione gubernabat omnia. Interea Heinricus imperator, quoddam de principalibus festis Ratisbone celebraturus, ad^a neptem suam abbatissam divertit. In cuius obsequio videns tante auctoritatis ac reverentie virum, mirari et delectari cepit sagacitate animi eius. Conversusque ad cognatam, ait: *Oportunum est, soror, cunctis in hoc festo amicis suis solatiantibus, et te michi aliquod caritatis obsequium ob consanguinitatis vinculum impendere*. Qua humiliter respondente: *Iube, quod vis, domne mi rex; non enim fas est, ut avertam faciem tuam*²; imperator subiunxit: *Nil aliud peto nisi capellanium tuum, domnum Ottonem, spiritu sapientie plenum*. Talem enim virum res publica nostra habet necessarium. Quo audito abbatissa, licet fidelissimi sui auricularii egre ferret abscessum^b, imperatorie tamen maiestati contraire non potuit. Et advocans eum debitasque ministerii sui gratias exsolvens, non^c sine lacrimis, pium amorem testantibus, principi assignavit. Assumptus itaque Dei nutu in curtem regiam, vir tocius industrie et religionis, ita sibi prudentissimum imperatorem nobilitate morum et fidei pietate devinxit, ut eum quasi unicum amplectens filium, secretalem intimum et custodem capitis sui poneret cunctis diebus³. Nam et cancellarium eum fecit⁴, et queque preciosa vel cariora in palacio habuit, eius 1102? fidei commisit.

Hoc modo servus Dei Ōdalricus pium Ottonem in curtem regiam accessisse ferebat. Alii vero^d dicunt: eum, liberalibus inbutum disciplinis, primo ad abbatem Wilzeburgensis^e cenobii

a. et ad C. b. abcessum C. c. et non C. d. vere C. e. Wiertzenburgensis C, Wurzeburgensis B; scripsi Wilzeburgensis; cf. supra p. 14 n. b.

1. Cf. Gen. 43, 40. 2. 3 Reg. 2, 20: „neque enim fas est, ut avertam faciem tuam“. 3. 1 Reg. 28, 2: „Et ego custodem capitis mei ponam te cunctis diebus“. 4. anno 1102? Cf. Stumpf Die Reichskanzler II 209.

Heinricum venisse; et post modicum eundem Heinricum Dei nutu in Polonia archiepiscopatus apicem conscendisse. Cui ipsum fidelissimo adhesisse famulatu testantur et, mirabili strennuitate ac sapientia in brevi per totam regionem divulgatum, tam ab archiepiscopo quam et a venerabili Iudita imperiali aule assignatum.

4. Eo tempore gloriosissimus imperator Henricus magnum illud et admirabile Spirensis ecclesie edificiū ob venerationem perpetue virginis Marie, cuius specialis alumnus fuit¹, regali magnificentia exstruebat. Sed magistri operis, fraudulenter et sine Dei timore agentes, magnam pecunie quantitatem suis usibus insumebant; ita ut frequenter ad opus tam mirificum pecunia ipsa deficeret. Unde augustus non mediocri dolore permotus, ex consultis accito familiari auriculario suo Ottone, ei totius operis magisterium commisit; utpote cuius sapientia, cunctis probata, etiā ad maiora queque et ardua dispensanda esset idonea. Qui, sagaciter et provide commisso operi intendens — sciebat enim iuxta apostolicum mandatum dominis carnalibus sic quasi Deo serviendum² — frequenter ad curtem regiam regressus, pecuniam, que supererat statuto operi, fideliter ei resignabat; insuper ad indicium ingeniose diligentie sue equam fenestrarum ecclesie mensuram, prudenter a se dispositam, imperatori considerandam offerebat. Pro qua sincerissime fidei constantia non solum regi sed et cunctis optimatibus ita se acceptum reddidit, ut Deo gratias agerent, quod ad eius noticiam pervenissent. Siquidem interiorem animi eius sollerciam exterioris quoque hominis habitus preferebat; ita ut prudentes quique ex ipso eius scemate, quod in eo futurum esset, sagaciter intelligerent.

5. Nam ut de multis unum exempli causa annectam, quidam pater familias de Spirensi civitate Anshelmus nomine, non tam divitiis quam religione et prudencia insignis, eundem Christi servum, adhuc in tenuitate positum, antequam in curtem regiam

1. Cf. Heinrici IV epist. Bibl. rer. Germ. V 505: „Conquerimur Deo omnipotenti et domine mee sancte Marie“ cetera. 2. Ephes. 6, 5.

accessisset, hospicio recepit; moxque reverendi habitus eius venustate delectatus et in faciem ei curiosius intendens, gratiam ipsi celitus superventuram sagaci animo previdit. Idque suis omnibus certissima attestazione pronuncians, ut in cunctis ei tamquam sibimet ipsi obsequerentur, mandavit. Deinde secrecius eum conveniens et unicum filium suum Richardum nomine per manum ei tradens ait: *Video, domine, quia largiente Deo magnus in futuro apud Deum et homines eritis. Re vera enim faciet vobis Deus nomen grande iuxta nomen^a magnorum, qui sunt in terra¹. Unde peto: ut, cum verba mea hec impleta fuerint, memor obsequii mei, fidem et misericordiam cum filio meo Richardo faciatis^b et paterne consolacionis manum ab eo non subtrahatis. Cui ille subridens: Et quis ego inquit vel quid ego aut quid magni in me esse poterit? Si tamen excelsus Dominus, qui humilia respicit et alta a longe cognoscit², exiguitatem meam promovere dignatus fuerit, absit a me peccatum hoc in Domino, ut benignitas et humanitas mihi a vobis inpena oblivioni tradatur. Scriptum quippe est: „Elemosina viri quasi sacculus cum ipso, et gratiam hominis conservabit“³. Decet igitur, ut et ego gratiam et misericordiam, quam hic inveni, domui huic conservem. Quod et postea devotus implevit. Quia, factus episcopus, eundem Richardum familiarem sibi vernulam assumpsit et speciali amoris privilegio fovere non desiit.*

6. Sed ut ad id redeam, unde digressus sum, imperator Heinricus, fide et prudentia pii Ottonis agnita, secrecius eum compellans, an psalterium cordetenus psallere posset, inquisivit. Quo respondente: *Etiam*, gavisus imperator eum sibi assidere precepit; et remotis aliis, psalmodie cum eo vacabat, quociens a negociis expeditus esse poterat. Erat enim imperator litteris usque adeo imbutus, ut cartas, a quibuslibet sibi directas, per semet ipsum legere et intelligere prevaleret. Codex autem, in quo psalmos decantabat, manuali frequentia rugosus et admodum obfuscatus erat. Quod pius Otto cernens, absente im-

a. nomen om. C.

b. faciatis C.

1. 2 Reg. 7, 9.

2. Ps. 137, 6.

3. Cf. Eccli. 17, 18.

peratore vetusto codicem involucro despoliavit et, novam mercatus pellem eumque decenter cooperiens, loco suo reposuit. Veniens ergo postmodum imperator et quod factum erat nesciens, psalterium a cubiculariis requirebat. Turbantibus autem se ad querendum cubiculariis — dum pre oculis omnium iacens veteribus rescellis¹ codex exutus et novis decoratus induviis nescitur — fit huc illucque discursus nec quicquam reperitur. Tandem imperator, divino commonitus instinctu: *Vocate^a inquit Ottonem meum; et ab eo sciscitamini*. Quo coram posito, imperator ab eo psalterium exquirebat. At ille concitus librum coram imperatore iacentem elevans: *Ecce ait pre oculis omnium hic fuit, ubi et semper reponebatur*. Obstupefactus imperator: *Et quis ait tam nitido hunc innovavit operimento?* Et ille ait: *Ego, domine*. Quo audito, imperator collum eius blandis stringens amplexibus et in oscula proruens: *Vivit Dominus!* inquit *sicut tu inter cetera diligentie monimenta psalterium meum, vetusto exutum tegmine, novo illustrasti operimento, sic et ego te, paupertatis tunica spoliatum, novi honoris culmine sublimabo*. Et exinde querebat oportunitatem, quomodo eum promovere et pontificali infula redimire posset. Nec multo post anulus cum
1101 virga pastoralis Premensis episcopi² ad curtem regiam perlata est.

7. Eo tempore siquidem ecclesia liberam electionem non habebat, sicut postea sub Heinrico quinto, mediante pie memorie Kalixto papa, actum est. Sed cum quilibet antistes viam universe carnis ingressus fuisset, mox capitanei civitatis illius anulum et virgam pastorem ad palacium trans mittebant; sicque regia auctoritas, communicato cum aulicis consilio, orbate plebi idoneum constituebat presulem. Itaque cum, ut diximus, virga pastoralis et anulus episcopi Premensis imperatori offerretur, mox ille, accersito unice dilecto sibi Ottone, munera hec ei conservanda tradidit.

a. Vocare C.

1. V. Ducange Gloss. ad v. recella ... rescella: „Glossarium Cambro-nense: „Rescellas, genus indumenti, id est pelles“. 2. Liemari archiepiscopi Bremensis, d. 16 Maii 1101 mortui.

Post paucos vero^a dies rursum anulus et virga pastoralis 1102
 Ruperti Babenbergensis episcopi¹ domno imperatori transmissa
 est. Quo audito, multi nobiles et tam sciencia quam divitiis in-
 signes ad curtem regiam confluebant, qui episcopatum Babenber-
 gensen non mediocri precio sibi comparare temptabant. Impe-
 rator vero — gaudens, quod occasionem honorandi intimum se-
 cretalem suum Ottonem, ut voluerat, invenisset — cunctos, qui
 pro eodem episcopatu adipiscendo satagebant, arguta responsio-
 num ambiguitate suspensos reddidit. Accidit itaque, ut, pro-
 cedens crepusculo diei cuiusdam ex aula regia et parumper in
 limine subsistens, audiret puerulos quosdam naturali callentes
 ingenio talia invicem mussitare: *Non bene agit imperator, qui
 nobilem illum Babenbergensem episcopatum precio venundare
 disponit. Cur non potius fidei suo domno Ottoni hunc assignat?
 in quo est aspectus angelicus, reverendus habitus, mores religiosi,
 facundia singularis, prudentia et magnanimitas admirabilis. Hunc,
 omni pietate et industria conspicuum, decet esse pastorem popu-
 lorum.* Audiens hec, imperator hilaris effectus est; recordatus-
 que propheticum octavi psalmi versum: *Ex ore infantium et
 lactentium perfecisti laudem*², Deo gratias agebat, quod volun-
 tatem suam hoc testimonio confirmari cernebat. Nec mirum,
 quod infantilis etas tali eum preconio efferebat. Illo enim tem-
 pore, sicut et postea, tante benignitatis tanteque affectionis^b
 erga omnes erat, ut nemo cohabitantium ei inveniretur, qui non
 hunc ex corde diligeret et verum Dei servum acclamaret. Sed
 et modestia habitus et perspicua religionis auctoritas sic in eo
 eminebat, ut nullus eo presente quippiam indecens aut risui
 aptum verbo seu facto pretendere auderet; sed, cum regiam cur-
 tem intrabat, mox omnes prioris lascivie intentionem magna
 gravitatis manu tergebant. Imperator vero legatos honora-
 biles clero et populo Babenbergensi dirigit; pastorem se eis, ido-
 neum et electum ex milibus³, providisse nunciat; utque capitanei

a. vere C.

b. effectiois C.

1. qui e vita exiit d. 11. Iunii 1102.
5, 10.

2. Ps. 8, 3.

3. Cant.

1102 civitatis Mogunciam ad natale dominicum¹ sibi occurrant, pater-
 na dulcedine mandat. Exhilarantur hoc nuncio Babenber-
 Dec. genses. Et confestim Egilbertus prepositus, Adelbertus quoque
 decanus cum Eberhardo pie memorie, tunc Sancti Iacobi —
 postmodum vero maioris ecclesie — preposito², assumptis natu
 maioribus et quibusque illustrioribus personis, imperatori Mo-
 gunciam tempore conducto occurrunt.

8. Interim vero clerus et populus Babenbergensis, diu iam
 episcopali benedictione privatus, nullo modo a precibus cessabat.
 Dec. 21 Sed unanimi devocione congregatus in dominica proxima natali
 dominico, solemni processione cum reliquiis sanctorum montem
 beati Michaelis archangeli ascendunt; ibique missarum celebri-
 tatem summa compunctionis dulcedine agentes, divinam exora-
 bant clemenciam, ut — per summum sue sedis ministrum³, qui
 semper in adiutorium populo Dei occurrit⁴, eis propiciatus —
 acceptabilem sibi largiri dignaretur antistitem. Quorum^a pre-
 ces et vota quomodo secretissimas Dei penetraverint aures, ho-
 dieque et usque in consummationem seculi patenter datur intel-
 ligi. Quia talem huic ecclesie destinavit presulem, qui omnes
 predecessores suos meritorum prerogativa longe antecessit; cuius
 memoria in omni ore quasi mel indulcabitur et ut musica in
 convivio vini⁵. Divinitus enim re vera in hunc locum est di-
 rectus; quem, pene conlapsum, mirifice Deo cooperante repara-
 vit et cultu interiori et exteriori tam nobiliter augmentavit, ut,
 quousque mundus iste volvitur, eius laudabile meritum semper
 accipiat incrementum.

c. Dec. 25 Venientibus itaque capitaneis ecclesie Babenbergensis, im-
 perator eos cum honorifico gaudio suscepit; et adscitis coram
 principibus ait: *Quantum profectui et honori ecclesie Babenber-*
gensis congratuler, hinc advertite: quod, cum tot magne et alti
sanguinis persone episcopatum hunc a me precio comparare
temptarent, ego illum potius, qui fide moribus sapientia et reli-

a. Quocum C.

1. 1102 Dec. 25. 2. qui obiit d. 26 Iunii 1143. V. Annales S. Petri
 Bibl. rer. Germ. V 554. 3. Michaellem. 4. Cf. Dan. 10, 13. 5. Eccli. 49, 2.

gione cunctis prestat, vobis eligere malui. Et advocans pium 1102
 Ottonem, anulum et virgam pastorem Premensis episcopi ab Dec. 25
 eo recepit. Illo sine mora resignante hec, imperator ait: *Ex
 multo iam tempore fidelem te michi et pre omnibus utilem ap-
 probari. Tempus est, ut et ego fidei tue digna munificentie mee
 largitate respondeam. Accipe nobilem ecclesie Babenbergensis
 presulatum. Quem multi quidem pecuniis et muneribus sibi com-
 parare satagunt; sed ego, spreto omnibus illis, te solum hoc
 pontificali culmine statui illustrare.* Mox pius Otto, cadens in
 faciem et cum lacrimis se tanto apici^a indignum esse protestans,
 iussu cesaris ab optimatibus erigitur; anulo et virga pastoralis,
 quamvis plurimum renitens, investitur; et quantum se indignum
 fatebatur, tantum dignus^b a cunctis asserebatur. Mirumque in
 modum universa, que aderat, multitudo in electione eius accla-
 mabat. Una omnium voluntas eadem vota eademque sententia:
 Ottonem episcopatu esse dignissimum; felicem fore tali ecclesiam
 sacerdote. Quid multa? Non aliud pium Ottonem facere licuit,
 nisi quod imperator et populus Domino volente constituit. Ita-
 que imperator, clero et populo affectuosa eum sedulitate com-
 mendans: *Ecce ait electus et Deo dignus pontifex. Hunc ut
 viscera mea desideranter suscipite; scientes eum omni divina et
 humana scientia probabiliter^c instructum. Nam, ut verum fa-
 tear, ex quo regni solium Deo largiente conscendi, in comitatu
 nostro vel in capella nostra non memini^d me virum honestate^e
 prudentia et omni virtutum genere prestantiorem vidisse.* Ad
 hec Berengerus^f comes de Sulzbach, cui cum bonis semper leva
 voluntas fuit, submurmurans: *Domine ait nescimus: quis vel
 unde sit, quem nobis pastorem assignasti.* Cui imperator: *Si
 unde sit ait queris, Babenberg mater eius; ego autem pater
 ipsius sum. Et vivit Dominus! Qui nocuerit eum, tanget^g pu-
 pillam oculi mei¹; quive eum deponere temptaverit, me quoque
 regni solio privabit. Hunc divino credens electum iudicio, vobis*

a. sic codd. b. dignius C, dignus E. c. probaliter C. d. memimini C.
 e. honeste C. f. Berincherus C, Berengerus E. g. tangat C.

1. Zach. 2, 8: „qui enim tetigerit vos, tangit pupillam oculi mei“.

1102 *pontificem dignum offero. Nam qualis sit quantave in eo gratia*
 Dec. 25 *redundet, evidentius adhuc experimentum capietis.* His dictis
 cuncti, elata in altum voce, laudem Deo canebant; clerus et
 populus, prospera ei divinitus inprecando, affectuosis vocibus
 concrepabat.

9. Imperator autem, secrecius eum de necessariis quibus-
 que paterna informans diligentia, aliquamdiu in palacio detinuit;
 donisque optimis cumulatam ecclesie Babenbergensi honorifice
 1103 destinavit. At pius Otto, cari cesaris vitam carissimo Iesu mul-
 Ian. tum commendans, iter cum suis aggressus est.

Cumque emenso itinere ad villam Ampherbach¹ dictam ve-
 nisset, occurrunt ei eminenciores quique et honorati Babenber-
 gensium; et magno exultationis concentu patrem desiderantissi-
 mum excipientes, debiti sedulitate obsequii invicem sese preve-
 nire certabant. Ipse autem, paululum ex eadem villa pro-
 gressus, cum civitati Babenberg appropinquaret, ad demonstranda
 vere humilitatis et invicte magnanimitatis exempla equo, cui in-
 sederat, sese excuciens et calciamentum solvens, nudipes intrat
 urbem. Erat autem tunc hyemps nivosa et glaciale frigore asper-
 rima; et ille beatus, igne divini amoris calens in intimis, virili
 constancia tolerabat horrorem tanti algoris, ita ut, per longissi-
 mos vie tractus nudipes ambulans, cunctis pro hoc admirationi
 Febr. 2 esset ac stupori. Igitur in purificatione sancte Dei genitricis
 Marie pio Ottone kathedram suam invisente, clerus et populus
 Babenbergensis unanimi devocione adunatus ante portam civita-
 tis occurrit; et solempni apparatu cantuque dulcisono, ut com-
 petebat, in domum Domini novum pastorem deducentes, cum
 lacrimis spirituali gaudio plenis Deo gratias agebant. Cum-
 que post debitam devote susceptionis et salutationis iocundita-
 tem domum episcopalem adisset, pedes eius nimio gelu dirigue-
 rant, ita ut sanguis, guttatim procurrens, tepida eos aqua con-
 foveri urgeret. Unde et postmodum sepius vehementissimo po-
 dagre dolore cruciabatur. Sed inerat ei admiranda fortitudo

1. a Bamberga inter occidentem et meridiem.

patientie et robur mentis tantaque vis amoris Christi, ut pro hoc a Dei opere nullatenus cessaret.

Sciens autem veridicum^a illud proverbium: *Hereditas, ad quam festinatur in principio, in novissimo benedictione carebit*¹, consecrationis sue gratiam longo tempore, id est per triennium, 1103-1105 distulit; ut postmodum suscepti presulatus curam tanto perfectiori interiorum et exteriorum sciencia administraret, quanto ad hanc instructior ex tempore veniret. Augebat quoque dilationis huius causam scismatis, quod tunc in regno erat, dolenda satis confusio. Quia Ruthardus venerabilis Moguntinus archiepiscopus, quasi rebellis imperatori et pro hoc cathedra sua depulsus, in Thuringia per octo annos iam morabatur²; plurimi quoque episcoporum in Teutonicis partibus officii sacerdotalis suspensione multati fuerant. Unde pius Otto ordinationis sue gratiam a beatissime memorie Paschali papa consequi desiderabat; sciens, quante affectionis privilegio Babenbergensis ecclesia a fundatore suo beato Heinricho imperatore primitus Romane sedi, quasi unica filia matri, esset oblata. Pro hoc ergo litteras huiusmodi per fideles et honorabiles nuncios misit apostolico:

10. *Domno apostolico Paschali — spiritualis doni patitur* 1105 ex. —
*penuriam*³. 1106 in.

11. His ergo litteris ab apostolico reverenter susceptis et 1106 relectis, idem summus pontifex Paschalis gaudio repletus — erat enim totus caritate diffusus omnique affabilitate iocundus — pium Ottonem paterna dulcedine ad sedem apostolicam evocavit. Qui, pro hoc ymnidicas Deo gratiarum actiones exsolvens, ut mandatum acceperat, cum suis inpigre limina apostolorum adiit. Cumque hilari satis reverentia ab apostolico susceptus fuisset, iuxta quod scriptum est: *Iustus in principio sermonis accusator est sui*⁴, genibus domni pape advolutus, curam pastoraalem humiliter ei resignavit; se indignum et nullatenus tanto oneri aptum esse, lacrimosis singultibus vociferans. Verebatur enim aliquan-

a. veredicum C.

1. Prov. 20, 21. 2. inde ab a. 1098. 3. V. infra Appendix epistolarum n. 1. 4. Cf. Prov. 18, 17.

1106 tula symoniace hereseos umbra se respersum, quia tanto tempore in curte regia fideli ministerio desudaverat: ne forte imperator pro mercede eiusdem servicii pontificatus eum infula sublimasset, ideoque non sine anime periculo huius sacerdocii dignitate fungeretur. Unde maluit temporanei honoris subire dispendium quam superni arbitri^a oculos offendere animeque sue pati detrimentum. Cumque, abdicata pastoralis cura, e conspectu apostolici gaudens pro huiusmodi libertate abscessisset^b, conversus ad Dominum: *Expedicius inquit tibi, Domine, serviturus sum, quia tanto me onere liberasti.* Sed non diu hac ei libertate frui licuit. Papa etenim, divino tactus Spiritu, sequenti die ad revocandum Dei virum legatos dirigit, cum iam ille ad locum Sudra¹ dictum venisset; eique onus ecclesiastici regiminis, quod pridie abiecerat^c, licet plurimum renitenti, ex auctoritate sancti Petri imposuit. Et iterum iterumque renitentem dulcibus et vere paternis animavit promissionibus, se ei fautorem et fidelissimum contra omnes mundi impetus defensorem spondens.

Mai. 12 Deinde in vigilia penthecostes xenia ei per honorabilem transmisit apocrisarium; cui et hoc in mandatis tradidit: *Dic episcopo, ut preparet se ad accipiendum Spiritum sanctum.* Sic-
 Mai. 13 que in die sancta penthecostes, que erat 3 Idus Maii, scilicet in natalicio sancti Gingolfi^d martiris, Deo dignum antistitem propriis tamquam beati Petri manibus solemniter consecravit in Anagnina civitate, que Romaniam dividit et Apuliam². Et privilegio crucis ac pallii tam eum quam omnes successores eius imperpetuum honorandos esse censuit, idque scriptis talibus confirmavit³:

12. *Paschalis episcopus — notarii sacri palatii*⁴.

Mai. 21 Sed et reverendo presuli Ruthardo metropolitano idem apostolicus litteras commendaticias pro dilecto patre Ottone misit, in hunc se modum continentes:

a. arbitris *codd.* b. abcessisset *codd.* c. abiecerat *C.* d. sic *codd.*

1. Sutrium. 2. Haec verba sunt epistolae Ottonis in Appendice epistolarum n. 5. 3. Id demum die 15 Apr. 1111 factum est. 4. V. infra Appendix epistolarum n. 2.

13. *Paschalis episcopus — Dat. Lateranis 12 Kalend. Iunii*¹. 1106
Mai. 21

Talibus scriptis beatissimum patrem nostrum Ottonem apostolicus dive memorie Ruthardo archiepiscopo fideli suo commendans, quam intimis paterni amoris visceribus eum amplectendo foveret^a ac fovendo amplecteretur, evidencius aperuit. Nec inmerito. Previdebat enim beatum^b hunc firmissimam ecclesie Dei columpnam futurum et archam Domini inter undas diluvii felicissima gubernatione rectorum. Nichilominus clero et populo Babenbergensi idem summus ecclesie pastor litteras huiusmodi transmisit, ut filiis quoque unicum patrem antea gratum ex hoc graciorem redderet:

14. *Paschalis episcopus — largiente mereamini*². Hoc modo vir ille per omnia apostolicus et vere dignus Petri vicarius patrem filiis devotissimis commendebat. Ad hec etiam ipse piissimus pater Otto, non ignarus curarum et sollicitudinum, quibus grex fidelis pro unico pastoreangebatur, iam iamque ardens et siciens desiderabili eius reditu recreari, consolatorias ei misit litteras hec continentes:

15. *Otto gratia Dei — implere omnia valeamus*³. Igitur⁴ Mai. — Oct.
electus Dei pontifex, consecratione solempni ab apostolico honorifice provectus, aliquantisper ab eo humanitatis gratia est detentus⁴. Sicque optata potitus emissionem, prospero itineris decursu transcens Alpibus, Karinthiam venit.

16. Post hec imperator Henricus⁵ universis regni principibus curiale colloquium Ratisbone indixit. Ad quod novus antistes pius Otto occurrens debiti honoris reverentia susceptus est, cunctosque optimates presentes elegantia morum et sapientie^c gravitate ac paterne dulcedinis affabilitate miro sibi devinxit amore, ita ut felicem unanimiter proclamarent ecclesiam, que

a. foverit C. b. b̄m corr. in otm C. c. sapientia C.

1. V. Appendix epistolarum n. 3. 2. Appendix epistolarum n. 4.
3. Appendix epistolarum n. 5. 4. Interfuit Otto etiam concilio Guastallae m. Octobri 1106 habito. V. Regesta pont. Rom. p. 494 n. 4562.
5. imo rex Henricus V.

1106 tali divinitus donata esset sacerdote. Sicque regia cumulat^{us}
 Dec. 25 munificentia, post ardue peregrinationis angariam pastor pius
 1106 ex.— ovium suarum curam suscepturus, Babenberg ingreditur, ibique
 1107 in. a clero et populo immenso iubilationis tripudio acsi angelus e
 celo missus excipitur. Qui, tali potitus honore, in hoc omne
 studium sue devocionis impendit, ut et splendore virtutum ra-
 diaret in moribus et glorificantem se Dominum suis glorificaret
 operibus. In cunctis enim affectabat honorem Christi, salutem
 populi, contemptum sui; sciens, sibi in his omnibus non sua
 sed Domini esse lucra querenda. Nitebatur itaque in domo
 Domini oliva esse fructifera¹; studuitque in populis verbi ero-
 gare talentum, pro quo se sciebat quandoque super omnia Do-
 mini bona constituendum². Quapropter de commissa sibi cura
 sollicitus, ecclesiastice utilitati diebus invigilabat ac noctibus;
 dans operam, quomodo bona ecclesie sue vel augeret inventa
 vel restauraret amissa. Cum itaque^a ad dilatandam Christi glo-
 riam tota eius flagraret intentio, quedam cenobia a fundamentis
 construxit, quedam vero, prius tenuiter inchoata, sed per eum
 ecclesie Babenbergensi digno precio acquisita, largo sumptu
 perfecit^b.

17 (18). Ut autem ad nostra veniamus, idem Deo devotus pon-
 tifex Babenbergense monasterium sancti Michaelis cum eiusdem
 ecclesie edificiis nec non et basilicam sancte Marie et capellam
 beati Bartholomei cum magna domo eidem adherenti a funda-
 mentis ampliori statu reedificavit. Capellam quoque super portam
 in honore sancti Oswaldi regis et martiris fecit; sed et diver-
 sorium³ et muri ambitum cum universis officinis construxit.
 Idem vir beatus fontem in medio claustrum fieri iussit, itemque
 venam aque vive de vicino monte in claustrum plumbeis fistulis
 copioso sumptu duci fecit. Pleraque eidem loco ornamenta con-
 tulit; inter que duas argenteas scutellas ad suscipiendas obla-
 tiones, aurifrigium quoque et casulam preciosam. Crucem quo-

a. Cum itaque — perfecit *recepi ex B; om. C.* b. *in E sequitur de coenobiis
 ab Ottone aedificatis relatio ex Herbordi dial. L. I c. 12—17 decerpta. Cf. supra p. 9.*

1. Ps. 51, 10.

2. Matth. 25, 22. 23.

3. deversorium.

que auro gemmisque^a nobiliter fabricatam, recondito in ea salutari ligno sanctorumque reliquiis, ipse sacravit „crucemque Salvatoris“¹ appellari statuit; et banni sui interpositione, ne ab ipso monasterio pro aliqua umquam necessitate auferretur, interdicens^b, beato Michaeli archangelo eam devotissime obtulit. Hunc locum ille, Deo plenus, fidelissimo semper amore dilexit; hunc restauravit, hunc ditavit, huius gloriam quesivit, huic bona tribuit, hunc sublimavit, hunc coluit, huius profectum semper amavit; et in ipso coram altari eiusdem archangeli, cuius specialis minister erat, se sepeliri decrevit. Eidem monasterio quoque in usum fratrum dedit octo predia quingentis argenti libris comparata, que hic ob noticiam eorum singillatim annotare frivolum duximus. Preterea ecclesiam iuxta Albuch², hereditario sibi iure propriam, eidem monasterio cum duabus ecclesiis aliis donavit, ob memoriam videlicet sui parentumque suorum inibi corpore quiescentium. Adhuc autem dilectissimum sibi locum amplificare desiderans, sub monte sancti Michaelis capellam sancti Egidii cum hospitali domo, pauperum et peregrinorum receptionibus apta, construxit.

Totus enim misericordie visceribus affluebat, totus elemosine et compassionis affectu sic ardebat, ut iure cum beato Iob dicere posset: *Ab initio crevit mecum miseratio, et de ventre matris mee egressa est mecum*³; *flebam super eum, qui afflictus erat, et compaciebatur anima mea pauperi*⁴. Noverat quippe et assidue recolebat illam beati Gregorii sententiam: *Qui compassionem non habet, vacuum episcopi nomen tenet*⁵. Virtus namque sancte^c caritatis omnibus quidem fidelibus sed maxime Christi congruit sacerdotibus, qui et specialius ad hanc exequen-

a. gemmis quoque C. b. auferetur, indicens C. c. om. C; legitur in B.

1. De hac cruce, annorum 1131—1139 spatio facta, cf. Herbordi dial. I c. 37. 2. Am Albuch. Iugorum enim cohaerentium, quae „Schwäbische Alp“ vocantur, pars est „das Albuch“, inter Göppingen et Aalen sita. Haec igitur fuit Ottonis patria neque vero regio lacus Veneti (des Bodensees), ut perperam coniecit Oesterreicher ap. Fink Die geöffneten Archive des Königreichs Baiern I II 170, 171. 3. Cf. Iob 31, 18. 4. Iob 30, 25. 5. S. Gregorii Registr. L. VI ep. 30, opp. ed. Benedictini II 817: „quia si haec non habet, vacuum episcopi nomen tenet“.

dam in ipso sacratissimo sue ordinationis misterio commonentur. Cum enim sacerdos consecratur oleo, per quod caritas intelligitur, manus eius liniuntur¹; oleumque manibus eius infunditur, ut per hoc uberiora misericordie et pietatis opera sibi facienda noverit. Sed et cum veste sacrata ornatur amicitur, ei consecrator dicit: *Accipe vestem sacerdotalem, per quam caritas intelligitur*²; ut ea se totum quasi tunica talari circumdatum et splendidissime ornatum esse debere meminerit. Qua pius Otto singulari decore vestitus, usque quaque eam propagare et felicissimis declarare satagebat operibus.

1103-1120 18 (19). Perambulans itaque suburbana in circuitu aptumque locum perlustrans ad hospitale construendum, venit ad collem sub monte sancti Michaelis positum, qui vulgo Lûgebûhel, id est „mendacii collis“ vocabatur duabus ex causis; sive eo, quod non naturali terre situ sed potius de fundamentis murorum civitatis illic aggesta humus in altum excreverat, sive pro eo, quod crebra inibi conventicula stultorum, mendacii et vanitatibus plena, agebantur. Hoc ergo spiritualis hic pater in melius commutare desiderans, qui ad hoc se constitutum noverat, ut prava extirparet et bona queque insereret, collem ipsum complanari et ecclesiam illic beati Egidii iussit edificari, domicilia quoque pauperibus et peregrinis oportuna construui; ut, ubi antea servitus inimici pullulabat, ibi deinceps divino cultu et elemosinis pauperum lucra animarum succrescerent. Eo tempore canonicus quidam ecclesie sancti Iacobi Wicbodo nomine, orationis causa beatum visitans Egidium³, reliquias magnificas id est pollicem eius comparavit. Quem pius Otto, ab eodem sagaciter impetratum, altario^a sancti Egidii cum aliis multiplicibus reliquiis inclusit; ecclesiamque solempniter dedicans, memoriam eius per omnem locum celebriorem, quam eatenus fuisset, instituit. Hospitale autem cum eadem ecclesia primum quidem

a. altaris C, altario B.

1. V. Pontificale Romanum, De ordinatione presbyteri: „Consecrare — manus istas per istam unctionem“ cet. 2. V. Pontificale l. l.: „Accipe vestem sacerdotalem, per quam caritas intelligitur; potens est enim Deus“ cet. 3. S. Egidii coen. dioec. Nemausensis (St. Gilles).

Gumponi, decano Sancti Iacobi, commisit; postea vero, mediante beate memorie Wolframmo decimo huius loci abbate¹, Sancto Michaeli cum omnibus pertinentiis suis contradidit. De quo amabili et reverentissimo patre^a dignum est aliqua litteris mandare; quia^b, in ingressu eius Domino largam sue benedictionis copiam infundente, locus hic, iam pene in omni religione collapsus, nova et mira interioris discipline et exterioris profectus sumpsit incrementa.

19 (20). Hic enim Wolframmus, ex provincia Bavarorum nobili et religiosa ortus parentela, Babenbergensi ecclesie, in scola Christi educandus, sub ordine canonico traditur. Ubi, divina preventus gratia, in tenera adhuc etate sitibundo pectore hauriebat fluentia doctrine ac, de die in diem sapientie maturitate et elegancia morum proficiens, inter suos collegas pulcherrimus processit. Siquidem paterne iusticie fortitudo et maternel pietatis imago evidentius in eo apparebat iuxta apostoli dictum: *Quod si radix sancta, et rami*². Et hec quidem sub venerabili Ruperto septimo Babenbergensi episcopo³. Postmodum autem cum annos virilis attigisset etatis, a pio Ottone primicerius factus, auctorabili sagacitate velud alter Ioseph curam totius administrabat episcopatus; et nichil erat in omni ecclesiastice dispensationis negotio, quod non eius nutu et arbitrio dispenseretur.

Sed cum Deus omnipotens statum monastice religionis — qui sub domno Gumpoldo, nono huius loci abbate⁴, ad nichilum redactus erat — per ministerium reverendissimi patris Wolframmi reparare et novo Hirsaugensium ordine ad meliora provehere velle^c dignatus esset, eundem sepe dictum sepiusque dicendum sapientem architectum⁵ corporalis egritudinis molestia perculit; sicque, naufragosis mundi abreptum fluctibus, ad portum quietis evexit castraque milicie spiritualis intrare compulit. Nam cum periculoso colli tumore aliquamdiu laborasset, iuxta

a. huius loci abbate *B pro patre C.*

b. et quia *C.*

c. velle *addidi.*

1. 1112—1123. 2. Rom. 11, 16. 3. 1075—1102. 4. 1094—1112. 5. Wolframum.

1103-1112 beati Iob sentenciam: *Terrebus me per sompnia, et per visiones horrore concuties*¹ quibusdam sagacioribus de familia eius nocturna visione apparuit: culmen domus eius repentino lapsu corruere domumque confractam dissipari. Illisque inter se hoc mussitantibus et mortem domini sui presagare affirmantibus, ipse pater amabilis hoc rumore pavefactus est; et internum iudicem, hoc verbere ad meliora se vocantem, in spiritu humilitatis et animo contrito sequi deliberavit. Itaque, disposita domo sua et sollerter precavens insidias amicorum et propinquorum a bono eum proposito revocare nitentium, clam matutino tempore montem sancti Michaelis ascendit. Ubi veterem deponens hominem cum pomposis, quibus ornatior aliis incedere solebat, exuviis, Deo se ipsum hostiam acceptabilem obtulit et sancte conversationis habitum voluntaria paupertate suscepit. Cum ergo, preceptis obaudiens euangelicis, cruce sua flagrantissimo corde elata Dominum secutus fuisset², sine mora verus ille medicus, qui percutit et sanat, occidit et vivificat³ quique labores nostros tulit et egrotationes portavit⁴, infirmitati eius medelam solita pietate adhibuit, ut ipse, primum corpore et mente sanatus, multis postmodum spirituali magisterio salutem operaretur animarum.

Eo tempore piissimus pater Otto in Karinthis morabatur. Et cum reversus, que circa intimum dispensatorem suum gesta erant, audisset, plurimum in Christo exhilaratus est; licet in^a administracione publicorum negotiorum grandi solacio destitutus esset. Et accersito eo ad familiare colloquium, de statu suo paterna dulcedine requisivit, et si consuetudine loci, quam invenerat, contentus esse vellet. Sed ille, vir sagacis animi, distortam et prope nullam hic monastice religionis disciplinam in breviprehenderat; et, se ad perfectiora tendere, ne in vacuum curreret⁵, respondit. Quo audito, pastor mitissimus Otto, fervori eius admodum congratulatus, ad Hirsauigiense ce-

a. om. C.

1. Iob 7, 14. 2. Matth. 10, 38. 3. Deut. 32, 39. 4. Matth. 8, 17. 5. Galat. 2, 2.

nóbium, in sacro tunc spiritualis ordinis rigore celeberrimum, 1103-1112
quantocius eum cum xeniis honorabilibus destinavit; eo quod
et ipse ibi peculiariter notus esset ob frequentes illo transmissas
elemosinas. Ubi summo cunctorum exceptus tripudio, tum
pro sui reverencia tum etiam pro amore pii Ottonis, loco tante
venerationis habitus est, ut etiam post modicum, transcensis
aliis officiorum gradibus, prioratus honore sublimari mereretur.

Aderat iam tempus miserendi. Quia prospexerat de ex- 1112
celso sancto suo Dominus¹, ut locum hunc, scilicet montem
sancti Michaelis, diu ab spiritualium profectuum germine are-
scentem, novis superne gracie stillicidiis irroraret per beatissi-
mum patrem Ottonem; qui velut aurora pulcherrima et lucifer
matutinus ad discutiendas et illuminandas prisce conversationis
caligines celitus effulsit. Nam cum totum se ad dilatandam
eius gloriam, qui eum glorificaverat et spectabilem pre aliis
coepiscopis suis fecerat, preparasset, hic precipue, tamquam in
ipso capite, religionis monastice normam propagare curavit; ut
postmodum et aliis, que edificare proposuerat, cenobiis larga
benedictio ex huius fontis ubertate proflueret. Ad quod opus
divinum nullus sibi fidelior, nemo visus est aptior hoc, de quo
loquimur, servo Dei Wolframmo; quem dudum in activa vita
sagacissimum noverat et nunc in contemplativa probatissimum
audierat. Itaque, missa ad Hirsaugiam fida satis legatione,
tam eum quam et alios quinque fratres, religione et omni
scientia eximios, impetravit²; licet cuncti abscessum^a dilecti
patris Wolframmi molestissimum et pene inportabilem sibi cen-
serent. Sed nichil erat, quod non pii Ottonis reverentia et ele-
mosinarum largitas apud eos optineret.

Veniente igitur eo, absens erat episcopus. Ideoque, in
Saxonia apud curtes episcopales in Möchelen^b et Schidingen
residens, adventum eius prestolabatur. Postmodum autem,
cum reversus de Karinthia piissimus pater Otto voti se com-

a. abcessum C.

b. sic B; Mölchen C.

1. Ps. 101, 20. 2. V. Codex Hirsaugiensis p. 23, ubi in „abbatibus
ad alia loca transmissis“ est etiam „Wolfframmus abbas ad Babenberg“.

1112 potem factum apud Hirsaugiam cognovisset, Deo gratias egit; dilectum sibi Wolframum acsi e celo transmissum omni paterne benignitatis affectu suscepit. Et per occultos internuntios primo seniores deinde omnem sancti Michaelis congregationem admonuit: ut, sue utilitati per omnia consulentes, in electione venerandi patris Wolframmi unanimiter concordarent. Cumque divina preveniente gratia hoc, ut desiderabat, obtinisset, uberioribus ei, a quo bona cuncta procedunt, laudes exsolvit; statimque in vigilia palmarum, assumptis maioribus et prelati ecclesie, montem sancti Michaelis magna spiritualis gaudii alacritate plenus ascendit. Ubi in conventu publico dominus Gumpoldus, ad pedes episcopi procidens, ultroneam cure pastoralis abdicationem fecit, iam senio longinquo se fessum et ad hanc minus^a idoneam protestatus inbecillitatem suam. Beatus ergo pontifex receptam ab eo curam pastorem mox reverendo patri Wolframmo assignavit. Ipseque Gumpoldus in electionem eius primus acclamavit, et ex hoc in remotiorem cellam, deputatis sibi duobus ministris et quibusque necessariis, secessit. Ita electione canonica reverenter satis et unanimiter facta, pius Otto, Apr. 14 more inpatiens, sequenti die, id est 18 Kal. Maii^b, solempniter eum ante consecrationem palmarum ordinavit.

Et ex eo ad statum loci intus et exterius renovandum mirifice totum se accinxit. Primumque, abolito — communi fratrum consensu — vetusto et remisso ordine Amerbacensium¹, novum et religione plenum ordinem Hirsaugiensium instituit. Dein, paucitatem^c fratrum Deo militantium cordetenus dolens, et crebras in conspectu Domini supplicationes pro hoc cum elemosinarum largitate profundens, religiosos viros et tam divina quam seculari scientia ornatos omnimodis hic aggregare studuit. Nec prius ab hoc cepto destitit, quam de exiguo numero ultra septuagenarium multiplicatos videre meruit. Quod ipsius litteris declaratur, que in hunc se modum habent:

1121-1123 20 (21). „Otto Dei gratia Babenbergensis ecclesiae^d minister

a. munus C.

b. Aprilis *perperam* CB.

c. paucitate C.

d. om. C.

1. fratrum coenobii Amorbacensis dioec. Wirziburgensis.

humilis venerabili fratri Wolframmo abbati cenobii sancti Michaelis, Wignando Tharisiensi, Baldewino Banzensi, Eggehardo Uraugiensi¹, Imbriconi Michelfeldensi, Walchuno de Entisdorf, Eriboni de Pruveningen², Friderico de Gengenbach^a, Eberhardo Scuturensi, Ottoni Steinensi, Liutgero de Regenstorf, Ymgramno de Arnolstein, praeposito de Cluinike, praeposito de Hosterhoven³ et omnibus sub ipsis pie conversantibus salutem et perseverantem in Dei voluntate famulatum. Cum primum pastoralis cure regimen quamvis indigni suscepimus, monasteria ecclesie nostre subdita qualiter in monachica religione disposita essent, diligenter attendimus; sed omnia a discipline sue rigore nimis resoluta invenimus. Quod moleste ferentes ac dispensationi nostre incautum existimantes, diu multumque laboravimus, fuis ad Deum precibus, ut per divinam providentiam, que in sui dispositione non fallitur, hoc mutaretur in melius. Tandem Deus virtutum, cuius est totum quod est optimum⁴, vota respiciens humilium, in omnibus monasteriis nostris religionis prestitit augmentum. Quia vos gregi suo pastores idoneos elegit ac fratrum vestrorum numerum in sancta conversatione multiplicavit. Quod in vicino sancti Michaelis monte ostenditur; quia, dum non plus quam viginti fratres et eosdem sub tenui disciplina invenimus, iam Deo gratias plus quam septuaginta inibi cernimus absque his, qui honeste conversantur extrinsecus. Unde nos non mediocriter letificati omnes vos praelatos ac subditos in caritate sancta appellamus, omnium vestrum pedibus humiliati, in Deo et propter Deum obsecrantes: ut digne ambuletis vocatione qua vocati estis⁵; et religionis vestre ac spiritualis discipline vigorem, alii succedentes aliis, hereditario iure in longitudinem dierum conservetis. In memoriam ergo tam salubris exhortationis addimus decretum nostre episcopalis confirmationis dirigendum transcribendum relegendum singulis monasteriis. Monastice religionis spirituales militiam — Deo pla-

a. Gengenbach C.

1. historico. 2. 1121--1162. 3. Osterhofen. 4. Cf. Iac. 1, 17.
5. Ephes. 4, 1.

1121-1123 citam, hominibus acceptam, celebrem angelis, terribilem hostibus — ut iam per omnia cenobia nostra sub auctoritate Spiritus sancti renovavimus instituimus, sic deinceps integram illibatamque perseverare sanccimus atque decernimus^a; commendantes eam sub testimonio Christi et ecclesie vobis, electis rectoribus ac dilectis fratribus, per vos nichilominus commendandam omnibus vestris successoribus. De cetero in nomine Domini vobis benedicimus. *Testis enim michi est Deus, quomodo^b cupiam omnes vos in Christi visceribus¹“.*

His mellifluis et auctorabilibus tanti patris verbis evidenter satis declaratur, quam intimo et flagrantissimo affectu sanctam monastice professionis religionem adamaverit quantave diligentia eam, in quibuscunque poterat locis, sed potissimum apud nos propagare studuerit. Qua, ut desiderabat, Deo favente propagata fratribusque tam merito quam numero multiplicatis, etiam materiale ecclesie fabricam cum universis monasterii officinis necessaria et congruenti amplitudine dilatare curavit; tamquam et ei^c spirituales filii sui affectuosa unanimitate proclamarent: *Angustus michi est locus coram te, fac spacium michi, ut inhabitem²*. Et o beatus ille, qui, tandem desiderii sui, quod in multiplicandis religiosis fratribus habuerat, compos effectus, iuxta prophetiam Ysaie a Domino audire meruit: *Leva in circuitu oculos tuos et vide. Omnes isti congregati sunt, venerunt tibi. Vivo ego, dicit Dominus, quia omnibus his velut ornamento vestieris, et circumdabis tibi eos sicut circumdat sponsa³ monile sibi preciosum⁴*. Quomodo enim non gauderet et gratulabundus iubilaret Domino, cum non solum ex vicinis sed etiam de longinquis multarum regionum partibus illustres quosque et sapientes ac diversarum artium imbutos pericia ad locum dilecte requietionis sue congregari cerneret. Quos nimirum bone opinionis eius fama, per totam ecclesie domum diffusa, et indefessa oratio, que elemosinarum largitate fulciebatur, illo attraxerat. His nempe devotissimis filiis quasi floribus spe-

a. decrevimus C.

b. quoniam B.

c. eis C.

1. Philipp. 1, 8.

2. Isai. 49, 20.

3. Isai. 49, 18.

4. Cf. Isai. 61, 10.

ciosis adornatus erat, his tamquam monilibus ambiebatur; cum et hic in omni actu ac negotio eorum intimis preveniebatur suffragiis et comitabatur, ac post in resurrectionis gloria, nobili eorum stipatus frequentia, regi regum accensis lampadibus occurret, ubi et filii de patris honore et pater de filiorum salute perpetuo letatur. Sed his per excessum dictis, ad narrationis ordinem redeunt, causam et rationem antiqui monasterii dissolvendi et novi deinceps maiori ambitu reparandi posteriorum noticie pandamus.

21 (22). Siquidem anno Domini 1117, 3 Nonas Ianuarii ¹¹¹⁷ et in octava sancti Iohannis apostoli, peccatis hominum exigentibus, terre motus factus est magnus, quarta feria, luna 26, hora vespertina, impleta propheta que dicit: *Pugnabit pro eo orbis terrarum contra insensatos*¹. Hoc siquidem terre motu ecclesie nostre fabrica, que et ante iam longe temporis vetustate ex parte scissa erat, ita concussa est, ut lapis magnus in frontispicio vel culmine sanctuarii, subito lapsu proruens, totius monasterii ruinam minaretur cunctosque, ingenti pavore perculsos, in fugam converteret. Et tamen, mirum dictu, grandi hoc lapide, qui totum in circuitu opus sua conclusione firmabat, lapso, reliqua templi fabrica, licet hiatu terribili casum iam iamque minaretur, immobilis perstitit; donec post festa paschalia iussu pii Ottonis ^{post Mart. 25} destructa et solo adequata est.

Hinc iam novi templi edificatio, quod maiori se ambitu dilataret, cepta est. Ubi tanta se liberalitate beatissimus pater Otto pro fervore accelerandi operis profudit, ut cunctis stuporem ¹¹¹⁷⁻¹¹²¹ multis quoque invidiam tanta pecunie profusio pareret. Nam cum quadam vice, eo apud castrum Botenstein² posito, pecunia defecisset et fidelissimus camerarius eius Erbo nomine — devotus sancti Michaelis famulus, qui postea hic in sancta claruit conversatione — perneciter ad episcopum tendens, defectum hunc ei insinuasset, illic statim centum marcas argenti beato offerens Michaeli, eum more inpaciens redire urgebat. Qui — pie voluntatis plenus thesauro, quo nil ditius Deo offertur — tanta mire

1. Sap. 5, 21. 2. Bottenstein a Bamberg a inter orientem et meridiem.

1117-1121 devotionis festinantia reversus est, ut eadem die memoratum pondus argenti altario sancti Michaelis tamquam holocaustum gratissimum inponeret sicque cepto operi tota virtute ac sagacitate instandum urgeret.

Igitur perfecto iam templo — quod in modum crucis, ut cernitur, constructoris sui precepto edificatum est — dedicationem
 1121 eius in arbitrio fratrum constituens, utpote cum quibus cor unum et animam habebat, mandavit: ut certam ei significarent diem, qua tante solempnitatis celebritas communi omnium voto ageretur. At illi, multam inter se inquisitionem facientes, tandem consilio^a reverendi et doctissimi patris Wignandi¹, de quo in secundo huius operis libro dicemus, unanimi consensu diffinierunt^b, ut in Kalendis Septembris eadem celeberrima fieret dedicatio; congruenti satis et acceptissimo ordine: tam pro beati Egidii patrocinio, cuius ea dies natalicio illustratur, quam et pro antiqua huius diei reverentia, quam sacra Mosayce legis observantia constat precipua insigniri solempnitate; sicut in libro Levitici legitur, loquente Domino ad Moysen: *Mense septimo prima die mensis dominus Deus vester*². Et item in libro Numeri: *Mensis septimi prima dies suavissimum Domino*³ et cetera, que de ritu sacrificiorum mystice nunc in ecclesia celebrandorum ibi exquiruntur^c. Sed et decima et quintadecima eiusdem mensis dies sacra festivitate celebres, et nullum in eis opus servile fieri, sed solempne sacrificium Domino offerri lege precipitur; de quibus modo dicendum non est. De huius autem sacratissime diei celebritate Origenes sic loquitur: *Prima die septimi mensis neomenia tubarum est exorantem pro peccatis eorum qui se expectant*⁴. Hec Origenis eximii doctoris verba sunt. Qui item alio loco de hac solempnitate, que est prima die septimi^d mensis, sic ait: *Sicut inter dies septimus quique dies observatur sabbatum diem festum agit super*

a. consilium C.
 d. septima C.

b. diffinirent C.

c. exquiritur C, exequitur B.

1. abbatis Tharisiensis. 2. Levit. 23, 23 — 28. 3. Num. 29, 1. 2.
 4. Ex Origenis in Leviticum homil. IX cap. 5, Opp. ed. Delarue T. II 239.

*eos*¹. Hec nos de opusculis tanti doctoris, qui in ea parte qua 1121 probatur neminem post apostolos habet equalem, hic inseruimus ad commendandam sacratissime huius festivitatis celebritatem, que aliarum solempnitatum mater est et convenientissime prima die septimi^a mensis agitur; qui et in veteri lege celeberrimus est et in hoc nove gratie tempore natalicio tam eximii patris Egidii, qui singularis tribulorum^b portus et certum remedium est, decoratur. Hec igitur iocundissima solempnitas tanto artius omni devocione spirituali colenda est, quanto dulcius imaginem et umbram celestis illius prefert dedicationis, ubi verus pontifex Christus, consummato templo suo, quod ab origine mundi usque ad finem seculi de vivis et electis construit lapidibus, desiderabilem et nunquam deficientem celebrat solempnitatem; ad quam suspirare et omnibus cordis medullis anhelare cunctos ecclesie filios hec transitoria commonet dedicatio. Sed iam ad narrationis ordinem redeamus.

Igitur audita piissimus pater Otto filiorum suorum legatione, qua in Kalendis Septembris dedicacionem fieri unanimiter flagitabant, aptum quidem et rationabile hoc approbavit. Sed unum erat, quod consensum eius aliquantula contradictione retardabat: quia capellam beati Egidii, in hospitali a se constructam et unice sibi dilectam, solita popularis concursus veneratione fraudari metuebat; nimirum cunctis in montem sancti Michaelis, tante festivitatis gracia invitante, occurrentibus. Quapropter, sine voluntate et petitione Udalrici, religiosi eiusdem ecclesie sacerdotis, id se facturum negabat. Qui mox, urgente spirituali patre Wignando, qui hec omnia^c speciali administrabat diligentia, episcopum adiit et prudenti ratione, dedicacionem hanc capelle sancti Egidii in nullo officere quin immo maiorem ei reverentiam et cultum parturire, affirmabat. Cuius assertionem pastor piissimus approbens, demum assensit. Et venerabili Wolframmo abbati fratribusque universis paterna^d dulcedine mandat, se de-

a. septima C.

b. tribulantium C.

c. in add. C.

d. paterne C.

1. Ex Origenis in Numeros homil. XXIII cap. 9—11, Opp. T. II 360.361.

1121 sideriis eorum et in hoc et in omnibus promptissima affectione pariturum.

Aug. 22 (23). Appropinquante vero eadem sacratissima die, summus arbiter, qui quos amat corripit et castigat¹, hunc beatissimum patrem corporalis egritudinis tam gravi perculit molestia, ut, penitus fracta corporis virtute, decumberet omnemque propositae dedicationis intentionem postponeret. Quo audito, universi nimia meroris anxietate percelluntur, cunctos nubes et caligo tristitiae involvit et — ut natura docet: capite vulnerato, cetera quoque membra dolore atteri — languorem pii pastoris grex devotus suum deputabat. Unde, quod solum in his erat remedium, toto ad Deum corde conversi, lacrimosis suspiriis cum oblationibus hostiarum et elemosinarum salutem ei et sospitatem celitus imprecari non cessabant; donec, prospiciens de excelso sancto suo² Dominus clamores et gemitus pauperum suorum exaudire dignatus est. Illis enim tanta precum et votorum instantia divine aures clementie pulsantibus, quadam die pater amabilis, dum meridiano sompno apud castrum Botenstein quiesceret, vidit speciosum iuvenem, qui re vera angelus Dei erat, lecto suo gratulabundum assistere et magna iocunditate antiphonam: *In domum Domini letantes ibimus* psallere. Nec mora expergefactus, sanum se et incolumem sensit statimque, quod visio portenderet, intellexit. Et accersito capellano suo Sifrido visionem exposuit; eamque Wolframmo abbati celeriter nunciari et omnia future dedicationi necessaria naviter preparari mandavit. Quo nuncio letissimo quasi responso divinitus accepto, meror in gaudium, luctus in leticiam versus est; cunctique, debita laudum preconia non sono tantum oris sed et iubilo cordis in celum ferentes, tante solempnitatis iocunditatem spe flagrantissima prestolabantur. Igitur anno Domini 1121, indictione 14, in Kalendis Septembris dedicatum est monasterium sancti Michaelis archangeli in monte Babenbergensi a venerabili Ottone, eiusdem sedis octavo episcopo, in honore prescripti archangeli

Sept. 1

1. Apoc. 3, 19.

2. Ps. 101, 20.

sanctique Benedicti abbatis, sicut a primordio foundationis monasterii definitum est. 1121
Sept. 1

LIBER SECUNDUS.

1. Igitur senescente iam mundo et die seculi advesperascente, cum divine pietatis dignatio Pomeranos, eatenus paganitatis errore depressos, splendore fidei illuminare decrevisset, iuxta quod scriptum est: *In omnes gentes primum oportet predicari euangelium*¹, idoneum eis verbi ministrum, scilicet pium Ottonem episcopum destinavit. Hic enim, totus lucrandis animabus invigilans, amplificatus est quasi stella matutina in medio nebule et ut luna plena in diebus suis lucebat²; ac veluti sol refulgens³ inter suos collegas episcopos emicuit. Huius autem apostolatus que fuerit occasio, scire volentibus aperiam, sicut ex ore servi Dei Udalrici, sacerdotis ecclesie beati Egidii, quam idem pius Otto construxit, audivi; cuius reverende maturitati et spectate coram Deo et hominibus fidei ita me necesse fuit credere, acsi propriis oculis ea que dicebat vidissem.

Aiebat ergo: quia episcopus quidam mire sanctitatis et sciencie fuit Bernhardus nomine, Hispanus quidem genere, sed Rome ad episcopatum electus et consecratus. Hic aliquanto tempore heremiticam vitam cum aliis servis Dei duxerat; sed, deposito Rome quodam erroneo episcopo, ipse, nutu divino raptus ex heremo, ei subrogatus est. Qui cernens ecclesiam suam horrendo scismate laniari — quia pars una sibi, pars altera deposito favebat — ut vir prudens et doctus, in scissura mentium Deum non esse perpendens, cedendum tempori et diebus malis intellexit; curaque pastoralis deposita, ad heremum regredi cogitabat, tamquam et ipse cum Athanasio^{a 4} diceret: *Si propter me est*

a. Gregorio Nazanzeno *in litura* *E scriptum est pro Athanasio.*

1. Marc. 13, 10. 2. Eccli. 50, 6: „Quasi stella — lucet“. 3. Eccli. 50, 7. 4. imo Gregorius Nazianzenus in synodo Constantinopolitana anni 381. V. Gregorii Naz. Carmen de vita sua v. 1839—1841, opp. ed. Caillau T. II p. 771; cf. Baronii Annal. 381 n. LV. Cf. etiam huius paginae n. a.

tempestas ista, tollite me et mittite in mare. Audiens vero Pomeraniam adhuc gentilitatis errori deditam, zelo pietatis ar-
 c. 1122 matus, illuc euangelizandi gracia divertit; cupiens: aut illos ec-
 clesie catholice per fidem incorporare aut per martirii gloriam
 ibidem pro Christo occumbere. Erat enim vite presentis con-
 temptor suiue corporis acerrimus castigato, ita ut, arido par-
 coque cibo contentus, nullo unquam potu nisi sola aqua utere-
 tur. Veniens itaque ad ducem Polonie¹, honorifice ut servus
 Dei excipitur. Cumque itineris sui causam exposuisset, dux be-
 nigne respondit: se quidem ardori tam sancte voluntatis eius
 congratulari; sed tantam gentis illius esse ferocitatem, ut magis
 necem ei inferre quam iugum fidei subire parata sit. Cui epi-
 scopus constanter aiebat, ad hoc se egressum, ut mortis senten-
 tiam pro Christi amore, si necesse fuerit, indubitanter excipiat.
 Quo responso dux admodum exhilaratus, interpretem ei et vie
 ducem, ut petebat, tribuit; inprecatus, ei prospera divinitus sub-
 ministrari. Ille autem, humilitatis ac paupertatis sue etiam
 in episcopatu custos — sciebat enim regnum diaboli non poten-
 tia sed humilitate Christi destructum, et quia affatim^a dives est,
 qui cum Christo pauper est — despecto habitu et nudis pedibus
 urbem Iulin² ingreditur ibique constanter fidei katholice semina
 spargere cepit. Cives autem — ex ipso eum habitu despicientes,
 utpote qui non nisi secundum faciem iudicare sciebant — quis
 esset vel a quo missus, inquirunt. At ille servum se veri Dei,
 factoris celi et terre, profitetur et ab eo se missum, ut illos ab
 errore ydolatrie ad viam veritatis reducat. Illi vero indignati^b:
*Quomodo inquit credere possumus, te nuncium summi Dei
 esse? cum ille gloriosus sit et omnibus divitiis plenus, tu vero
 despicabilis et tante paupertatis, ut nec calciamenta habere pos-
 sis. Non recipiemus te nec audiemus. Summus enim Deus nun-
 quam tam abiectum nobis legatum dirigeret; sed si re vera con-
 versionem nostram desiderat, per idoneum et dignum sue pote-
 stati ministrum nos visitabit. Tu vero, si vite tue consultum*

a. affatum C.

b. indignanti C.

1. Boleslaum III.

2. Wollin.

esse volueris, quantocius ad locum, unde digressus es, revertere; c. 1122 nec ad iniuriam summi Dei missum eius te profitearis. Quia pro sola tue mendicitatis inopia relevanda huc migrasti. Bernhardus autem, intrepidus immo illato sibi terrore constantior: Si verbis meis inquit non creditis, vel operibus credite¹. Domum quamlibet vetustate conlapsam et nulli^a usui aptam igni inmisso succendite meque in medium iactate; et si, domo flammis absumpta, ego illesus ab igne apparuero, scitote me ab illo missum, cuius imperio et ignis et omnis simul creatura subiecta est et omnia simul elementa famulantur. His auditis, sacerdotes et seniores plebis, multam inter se conquisitionem habentes, aiebant: Iste insanus et desperatus est; nimia cogente inopia, mortem appetit, morti se ultro ingerit. Sed et argumentosa nos circumveniens nequicia, repulsionis sue a nobis vindictam exigit, ut sine nostro non moriatur exicio; quia scilicet, una domo succensa, totius urbis interitum subsequi necesse est. Unde cavendum est nobis, ne hominem vesani capitis audiamus. Non enim expedit nobis, peregrinum nudipedem interficere. Quia et fratres nostri Pruzenses ante annos aliquos² Adelbertum quendam, similia huic^b predicantem, occiderunt³, et ex eo omnis pressura et calamitas apprehendit eos totaque substantia eorum ad nichilum redacta est. Sed si consultum nobis esse volumus, sine iniuria eum a finibus nostris eliminemus navique inpositum ad alias terras transmigrare faciamus. Interim vero servus Dei Bernhardus, amore martirii flagrans, correpta secure columpnam mire magnitudinis, Iulio Cesari a quo urbs Iulin nomen sumpsit dicatam, excidere aggressus est. Quod pagani non ferentes, accensis animis irruunt super eum crudeliterque cesum seminecem reliquerunt. Sed illis abeuntibus, servus Dei Bernhardus, accurrente ad eum capellano suo Petro nomine ac manum ei dante, surrexit; resumptisque viribus, iterum populo verbum salutis annunciare exorsus est. Sacerdotes vero, de medio plebis eum violenter abstrahentes, cum capellano et interprete suo na-

a. nullo CE.

b. hinc C.

1. Cf. Ioh. 10, 38.

2. ante annos 125.

3. a. 997.

c. 1122 vicule imposuerunt; dicentes: *Quando quidem tanta tibi predicationis inest aviditas, predica piscibus maris et volatilibus celi*^a*; et cave ne ultra fines nostros attingere presumas; quia non est qui recipiat te, non est usque ad unum.* Bernhardus autem, iuxta mandatum euangelicum excusso in eos pulvere pedum², ad ducem Polonie revertitur eventumque suorum non sine lacrimis retextit historiam. Cui ille: *Nonne ait dudum predixeram, Pomeranos fidem minime recepturos? Non ergo amplius caninam eorum attemptare velis dementiam, quia prophani sunt et verbo salutis indigni.* At episcopus: *Animales inquit sunt et spiritualium penitus ignari donorum; ideoque hominem non nisi exteriori habitu metiuntur. Me quidem pro paupertatis mee tenuitate abiecerunt; sed si potens quisquam predicator, cuius gloriam et divicias revereantur*^b*, ad eos accesserit, spero illos iugum Christi spontanee subituros.* Dux igitur, servum Dei debita apud se reverentia per aliquot dies repausans, cum ei temporalis vite preberet adminicula, ab eius ore in suo pectore alimenta referebat vite.

1122
Nov. 11

Interim curiale colloquium in civitate Babenbergensi factum est³, ubi convenientibus regni principibus et ipse Deo dignus advenit Bernhardus episcopus, cunctisque doctrine et sapientie ac ceterarum virtutum culmine mirabilis apparebat.

Nam et venerabilis Heimo^c presbyter, canonicus sancti Iacobi, qui multa nobis ingenii sui monimenta reliquit, ab eodem Christi servo multa didicit de arte calculatoria, que prius apud vulgatos compotistas obscura et intricata ne dicam falsata invenerat. Sed et de annis ab origine mundi usque ad passionem Christi, ac deinde de annis Domini usque ad nostrum tempus diligenter cum eo contulit; quoniam supputationem eorum secundum vulgatos cronographos euangelice veritati et auctoritati nullo modo concordare sciebat. Unde et ipse venerabilis frater noster Heimo, mirabilium editor operum, in prologo cuiusdam libri

a. om. C.

b. reverentur et C.

c. Heumo C.

1. Cf. Genes. 1, 26. 2. Matth. 10, 14. 3. die 11 Nov. 1122. V. Ekkehardi chron. 1122, Mon. Germ. SS. VI 260.

sui¹ de Bernhardo scribens, inter cetera ait: *Benedictus Deus* 1122 *omnipotens; quoniam per hominem illum prestitit michi multa audire et discere, que prius ignorabam, non tantum de cronica supputatione sed et de misteriis et rationibus paschalis observantie, immo de omni inter nos oborta^a questione.*

Udalricus etiam religiosus sancti Egidii sacerdos, cui vir Dei Bernhardus familiaritatis sue gratiam prestabat, requisitus ab eo de ordinis et conversationis nostre qualitate, respondit: priscam quidem cenobii huius consuetudinem remissam et irreligiosam secundum ordinem Amerbacensium^b fuisse; sed a beato presule Ottone per dilectum patrem nostrum Wolframmum, decimum huius loci abbatem, spiritualement et Deo acceptum ordinem Hirsaugiensium hic institutum; et ex eo per gratiam Dei tantam in cenobio hoc monachilis propositi excrevisse perfectionem, ut Christi bonus odor sit in omni loco². His auditis, Bernardus episcopus, palmas utrasque ad celum expandens, Deo cum lacrimis gratias agebat et summo deinceps affectu locum hunc excolebat. Nam et in conventu fratrum, depositis pontificalibus indumentis, habitum monachilem suscepit; et paternis consiliis tantam memoriali Wolframmo abbati edificationem conferebat, ut non modicas Udalrico sacerdoti gratias ageret, quod tam desiderabilem sibi virum insinuasset. Hic etiam inter alia pietatis et prudentie consilia frequenter adhortari solebat: ut, si quando pastor hic eligendus esset, assiduis orationibus et ieiuniis idoneam nobis a Deo revelari personam flagitaremus; et non alium nisi divina revelatione declaratum utilitatibus nostris per omnia profuturum sciamus.

2. Agnito itaque pius Otto sanctitatis eius rumore celebri et insolito his diebus ad paganos predicationis fervore, debita eum veneratione excipiens, omnem peregrinationis sue historiam et statum Pomeranice gentis curiose sciscitabatur. Quibus expositis, Bernardus, senciens pium Ottonem ad omne opus bo-

a. aborta C. b. Amberbacensium C.

1. „Computi“ ut videtur; cf. Bibl. rer. Germ. V 538 n. 5 et 6. 2. 2 Corinth. 2, 14. 15.

1122 num paratum, verbis suasoriis tamquam oleum igni adiciens, ait: *Ego quidem, pater honorande, memor verbi Domini discipulos ad predicationem mittentis: „Nolite portare sacculum neque^a peram neque calciamenta“¹, tanta paupertatis abiectioe opus euangelii aggressus sum, ut nec calciamenti uti voluissem. Sed gens illa, nimie dedita insipientie veritatisque penitus ignara, cernens tenuitatis mee et habitus despectionem, non pro amore Christi sed pro sola inopie necessitate me^b illo migrasse credidit; ideoque verbum salutis ex ore meo audire contempnens, repulit. Unde necesse est, ut, si tu, pater amande, lucrum aliquod in brutis barbarorum pectoribus agere volueris, assumpta cooperatorum et obsequentium nobili frequentia sed et victus ac vestitus copioso apparatu, illuc tendas. Et qui humilitatis iugum effrenata cervice spreverunt, diviciarum gloriam reveriti, colla submittent. Cavendum est etiam, ne quicquam de bonis eorum appetas. Sed, si oblatum quid fuerit ab eis, maiora quam acceperis restituas; ut per hoc intelligant, te non turpis lucri gratia sed solo Dei amore opus euangelii subisse. Confortare igitur et esto robustus; tu enim maximam populi multitudinem in veram repromissionis terram introduces². Nec te labor arduus et insolitus deterreat; quia, quanto pugna difficilior, tanto corona erit gloriosior. His beati viri monitis, sicut ferrum inflammatur ab igne, ita cor pii Ottonis succensum est, ut nichil carius haberet, quam artam peregrinationis huius pro Christo subire angariam. Bernhardus autem, a fratribus suis heremitis per multa terrarum spacia requisitus et vix tandem apud nos inventus, cum gaudio et admiratione magna ab eis in locum suum reductus est. Hac igitur occasione pius Otto Pomeraniam euangelizandi gratia adiit. Sed quo ordine vel quem illic fructum fecerit, consequenter Deo favente explicabimus.*

3. Sciens ergo, omnia, que in domo sunt, sine dispositione summi patris familias nichil esse, opus tam arduum nullatenus

a. atque C.

b. necessitati mee C.

1. Luc. 10, 4.

2. Deut. 31, 7: „Confortare et esto robustus; tu enim introduces populum istum in terram“ cet.

absque Romani pontificis auctoritate inchoandum previdit. Ideo- 1123-1124
que missis ad apostolicum Calixtum honorabilibus legatis, licen-
tiam euangelizandi Pomeranis impetravit.

Igitur ipso tempore ecclesiam sancte Walburge virginis in 1124
Altenburgensi monte¹ dedicavit. Ibique primum Udalrico sa-
cerdoti religioso voluntatem suam, quam ad paganos eundi fixam
habebat, aperuit dicens: *Quamvis diversa michi in his partibus
tam publica quam privata incumbant negocia, caritas tamen
Christi urget me: ut ad propagandam nominis eius gloriam dif-
ficilem ad Pomeranos peregrinationis angariam incunctanter ag-
grediar, et aut ydolatras ad vere fidei callem pertraham vel ipse
morti pro eo, qui hanc innocens pro nobis excipere dignatus est,
succumbam. Unde in primis agendum est michi: ut eiusdem fer-
voris et constancie socios et cooperatores assumam, qui, calcata
spe seculi, ad mortem si ingruerit pro Christo subeundam pa-
rati sint. Ad quod precipue te, frater et conpresbyter karissime,
idoneum esse censeo; nec non et Werinherum sacerdotem de Eren-
bach, virum sapiencia et pietate ornatum. Adelbertum quoque,
lingue barbarice sciolum, interpretem habere possumus. Septem
ergo dierum inducias super hoc accipiens, ad instar boni ad-
lethe animum tuum compone; et post hec, quicquid Spiritus
sancti inspiracio cordi tuo dictaverit, michi responde. Ad
hec Udalricus, paululum quid^a intra semet ipsum deliberans et
intimo divini amoris igne succensus, ait: *Iam septem dierum
inducias, pater mi, estimo transisse; et quod tunc a me audi-
turus esses, nunc quoque, ut desideras, accipe. Nam ut verbis
beatissimi apostolorum principis loquar, tecum paratus sum et
in carcerem et in mortem ire². Quibus auditis, pius Otto,
cum lacrimis gratias agens: Nunc inquit letus arduum hoc opus
aggrediar; quia gratia Spiritus sancti cor tuum tetigit et tam
ardenter in id ipsum accendit. Notum itaque tibi facio, quia
ecclesiam sancte Fidis, nuper a me constructam, celerius con-
summare ac dedicare statui; eo quod incertus sit redditus^b meus.**

a. quod C.

b. redditus C.

1. prope Bambergam.

2. Luc. 22, 33.

1124 *Statimque completa dedicatione, opus euangelii indubitanter volo aggredi. Interim vero, accepta a me pecunia, vestes et necessaria queque tibi compara. Quia ad suggestionem beati viri Bernhardi non cum tenuitate sed habundancia tam vestium quam victualium Pomeranos adire nos oportet; ne, cum paupertatis angustias in nobis deprehenderint, non zelo iustitie sed pro inopie relevanda necessitate illo nos migrasse cavillentur et, verbum salutis refutantes, a finibus suis nos eiciant; sicut et illum Dei famulum abiecerunt. Sed et servum tibi quemlibet fidelem et industrium in ministerio provide, quem huic labori aptum esse cognoveris. Tunc Udalricus: Est inquit adolescens officio clericus nomine Sefridus^a, ingenio acutus strennuus et fidelis; qui etiam cartis in itinere, cum necesse est, scribendis promptus et impiger erit. Hunc, meo iudicio idoneum huic peregrinationi, tue pater dilectioni offero. Quod pius Otto gratanter suscipiens: Recte ait iudicasti. Hic deinceps precipuum inter familiares meos, te suggerente, locum obtinebit.*

Apr.—Mai. Post hec igitur dedicata sancte Fidis ecclesia et vie sumptibus aggregatis, cum proficiscendi tempus instaret, Udalricum servum Dei repentina febris invasit. Ancille etenim Christi Berchrada et Wendelmuot^{b 1} cum aliis, quibus ille Deo acceptus sacerdos in loco Babenbergensi verbis et exemplis irreprehensibiliter preerat, assiduis ad Deum precibus et lacrimis hic eum detinuerant; quorum procul dubio vocibus divine aures clementie patebant, quia et eo tempore ei in suis preceptis devotissime obaudiebant. Sed pius Otto, egritudine eius plus quam credi potest contristatus triduoque ultra condictum tempus propter eum in civitate Babenbergensi demoratus, cottidie eum tam per se quam per suos familiares visitabat et, si qua sanitatis indicia adessent, paterna sollicitudine explorabat. Verum non cessantibus doloribus immo cottidiana Dei nutu incrementa capientibus, vir Dei electum sue peregrinationis comitem non sine gravi

a. Sifridus C. b. sic scripsi pro Wentzelmuot C; cf. not. 1 et L. III c. 14.

1. De Wendelmuot conversa, „sorore“ fratrum S. Petri Bamb. v. Necrol. S. Petri ad 3 Id. Apr. Bibl. rer. Germ. V 557.

merore egrum relinquens, iter cum suis aggressus est¹. Se-
 fridum tamen, bone indolis adolescentem, pro amore pii nutri-
 toris Udalrici in comitatu suo admittens, intime dilectionis visce-
 ribus ex tunc et deinceps eum fovere non desiit. 1124
circ. Mai. 7

Veniens autem ad cenobium Michelfeldense² noviter a se
 constructum, orationibus et elemosinis pro sanitate intimi sode-
 lis vigilantius instabat. Iterumque triduo in eodem loco sub-
 sedit, crebra servum Dei legatione compellans: ut, si qua Deo
 miserante virtus corporis succresceret, illic sibi naviter occur-
 reret. Sed illo in continua egritudinis molestia perseverante,
 pius Otto se beato Iohanni apostolo, eiusdem monasterii patrono,
 attentius commendans, iter quod ceperat aggressus est. Multi
 autem de clero et familia Babenbergensis ecclesie, nimio piis-
 simi patris sui amore devincti, ad locum Michelveldensem eum
 fuerant^a persecuti; cupientes vel tantillo tempore amabili eius
 presentia et doctrine suavissime desiderabili eloquentia recreari.
 Quos ille monitis salutaribus ad pacis et unanimatis fraterne
 concordiam accendens, uberibus paterne consolationis reficiebat;
 dicens inter alia: *Quia pro amore Christi arduam peregrinatio-
 nis huius angariam subire et lucrum aliquod in remotis barba-
 rorum finibus propagare desidero, pacem relinquo vobis, pacem
 iterum atque iterum inculcans commendo vobis*³. *Si ergo, quam
 magna sit pacis virtus, attenditis, quo a vobis colenda sit studio
 cognoscitis. Hanc quippe dominus et redemptor noster, ad pas-
 sionem mortis iturus, velut unicum et speciale pignus discipulis
 suis relinquere ac dare dignatus est, ut eos, qui sibi firmitate
 fidei coherebant, per hanc illi pia faceret participatione consor-
 tes. Scriptum namque est: „Beati pacifici, quoniam filii Dei
 vocabuntur“*⁴. *Quisquis ergo patri suo heres esse desiderat, filius
 existere pacem custodiendo non renuat. Nam qui locum prebet
 discordie, ipse profecto tanti^b se muneris exsortem constituit.*

a. corr. in fuerunt C.

b. tante C.

1. Secundum Ekkehardi gravissimi auctoris chron. 1124 (Mon. Germ. SS. VI 262) circiter die 7 Maii; secundum Herbordum II 8: die 24 Apr. („proxima die post festum S. Georgii martiris“). 2. a Bamberga inter orientem et meridiem. 3. Cf. Ioh. 14, 27. 4. Matth. 5, 9.

1124 *Si qua ergo divini amoris emulatio, si qua in vobis mee humi-*
 Mai. *littatis est affectio, pacem sectamini cum omnibus domi forisque,*
cum domesticis et extraneis ea que pacis sunt et caritatis agite;
hospitalitatem intimo pie voluntatis annisu excolite, providentes
bona non tantum coram Deo sed etiam coram omnibus homini-
*bus*¹. Hec et his similia triduo eis inculcans, tandem velut ultra
 non visuris vale faciens, Christo attentius eos^a commendabat et
 non sine lacrimis, paternum amorem testantibus, ad locum suum
 remisit.

Ipsa autem viam propositae peregrinationis aggrediente, que
 lingua explicare valeat: quantus omnium filiorum eius ploratus,
 quam incredibilis sit exortus gemitus. Quia enim vinculo per-
 fectionis, quod est caritas², cum eo fuerant arcius uniti, flebant,
 unicum patrem quasi cor a visceribus evelli, et tamquam funus
 amantissimi nutritoris ad tumulum deferrent. Ita cum luctu et
 miserabili planctu eum deducentes, extra locum Michelfeldensem
 prosequabantur; cum quidem ille, conversus ad eos, pastoralis
 auctoritate et sacerdotali gravitate, quantum poterat, flentes con-
 solari^b satageret.

Itaque egressus cum nobili suo comitatu, sequenti die ab
 illustri viro Gebehardo Waldekkendensi³ ad dedicandam eccle-
 siam suam⁴ invitatus est; quam summa devotione et debita di-
 vine servitutis celebritate consecravit. Procedens inde, aliam
 dedicavit ecclesiam scilicet Vohendrezensem⁵ in episcopatu vene-
 rabilis Hartwici⁶ Ratisbonensis episcopi, nimirum ipsius permissu
 et rogatu. Ubi multitudo copiosa plebis, ad sex milia vel am-
 plius computata, ei occurrens, sacre confirmationis gratiam sup-
 pliciter ab eo flagitabat; quam desiderata manus eius impositione
 consecuta, mox mirum in modum gratulari cepit in Domino et
 pro longiturna tanti patris vita prosperoque peregrinationis eius
 cursu enixius divinam exorare clementiam. Fuit enim in summa

a. eos addidi.

b. consolare C.

1. Rom. 12, 17: „providentes bona — hominibus“.

2. Coloss. 3, 14.

3. Waldeck est a Bayreuth inter orientem et meridiem.

4. Leuchten-

bergensem; v. Herbordi. Vit. Ottonis II 8.

5. Vohenstrauss.

6. I.

apud Deum et homines gratia; ita ut cuncti ad videndum eius 1124
reverendam caniciem, velut angelicam faciem, sitibundo pectore Mai.
properarent et non solum venerabiles manus, assidua elemosi-
narum largitate sanctificatas, sed et vestigia eius exosculari
summopere gauderent.

Post hec ad Cladrunnense^a cenobium¹ veniens, honorifice
illic cum suis exceptus est. Nam et dux Bohemie Ladizlaus²
honorabiles legatos suos illuc in occursum pii patris premiserat,
qui ei debita devocionis reverentia obsequerentur ac ducatum
preberent, usque dum in presentiam ducis ad civitatem Pragam
venit. Ubi dux, cum dive memorie Megenhardo eiusdem urbis
episcopo omnique clero et populo officiosissime eum excipiens,
magna ei donaria obtulit; que ipse in usus pauperum delegavit.
Idem vero electus Dei pontifex Megenhardus singularem fami-
liaritatis gratiam cum pio Ottone iam dudum habuerat³; ita ut
pro amore eius etiam locum hunc⁴, quem illi maxime dilectum
noverat, miro affectu excoleret, beneficiis magnis accumularet
perpetuamque hic anniversarii sui memoriam, ut hodieque ap-
paret⁵, fidei devotione disponderet.

Progressus itaque pius Otto abbaciam Seizkeam⁶ peciit;
inde ad Albeam divertit. In quibus locis dux Ladizlaus certas
ei mansiones usque ad terram Poloniorum constituerat. Ibi quo-
que legati venerabilis Polizlai⁷ ducis Poloniorum novo nostri
temporis apostolo occurrerunt et commeatum victumque usque
ad Gnezensen metropolim habundanter exhibuerunt. Venit ergo
ad episcopatum Bretlaensem; ubi honore debito susceptus, biduo
mansit. Tercia die Pozenaensem episcopatum adiit. Unde di-
gressus, per loca contigua fidei et pietatis spargens semina, vix
intra quatuordecim dies ad Gnezensen ecclesiam, que metropo-
lis est Polonie, accessit.

4. Polizlaus ergo dux, comperto viri Dei adventu, flere

a. Claderenense C, Cladrunnense E.

1. Kladrau. 2. I. 3. Cf. Udalrici cod. n. 239 Bibl. rer. Germ. V
416. 4. S. Michaelis Bambergensem. 5. V. Necrol. S. Mich. Bibl. rer.
Germ. V 573 ad 5 Non. Iul. 6. Sadska, a Praga ad orientem. 7. III.

Ebo.

1124 cepit pre gaudio; moxque egressus cum omni clero et populo,
 Mai. dilecto patri nudis pedibus occurrit. Tantaque eum devocione
 excepit, ut etiam filios suos lactentes illi obvios portari et ve-
 stigia eius exosculari iuberet sacraque eius benedictione per ma-
 nus impositionem confirmari cum lacrimis expeteret. Erat enim
 dux ipse magne in Christi ecclesiam^a reverentie, amator paupe-
 rum et piissimus inopum consolator, humilitatis et caritatis vir-
 tute omnibus amabilis, congregationibus fidelium et domiciliis
 sanctorum magis quam urbibus exstruendis operam dare solitus.
 Qui etiam desiderantissimum sibi patrem Ottonem per tres eb-
 domadas in episcopatu Gnezensi secum detinuit, in domo Iacobi,
 prepositi maioris ecclesie, qui postea episcopus¹ factus est; ut
 et doctrine eius suavitatem degustaret et oportuna queque sump-
 tum ad iter illud necessarium ei provideret. Egressus
 autem pius Otto^b a Gnezensi ecclesia, furtum quoddam in pro-
 xima villa incurrit; quod mox edicto Polizlai ducis recuperavit.
 Ibi etiam comites eius Heroldus et Godeboldus, accepta bene-
 dictione, ad sua rediere. Post hec, Deo gubernante, prospero
 itinere usque ad fines terre Poloniorum processit.

Cumque ad castrum quoddam quod Uzda² nominatum est,
 quod est in confinio utriusque terre, cum suis venisset, comes
 Paulus, dux eius, premisit nuncios ad Wortizlaum Pomeranie
 ducem; qui servum Dei Ottonem, fama apud eos celeberrima
 vulgatum, fines suos euangelizandi gratia adire insinuarent, cui
 tam pro sue sanctitatis reverentia, quam etiam auctoritate apo-
 stolici domni Calixti, cuius missus erat, omni devocione occur-
 rerent et monitis eius seu preceptis per omnia obtemperarent.
 Quo mandato dux Wortizlaus accepto, in castro Zitarigroda nun-
 cupato ei occurrit, honorifice illum ut angelum Domini excipiens.
 Cui pius Otto pacem Christi offerens, dona etiam more suo ob-
 tulit, hoc est sedem episcopalem pallio obductam et dorsale pre-
 ciosum cum aliis muneribus, ut temporalibus illum bonis^c ad

a. ecclesiam scripsi pro ecclesia C.

b. manus posterior in C addidit in.

c. donis C, bonis E.

1. archiepiscopus Gnesnensis.
 ad septemtriones.

2. Usez ad Netzam fl., a Posnania

amorem celestium facilius attraheret. Barbari autem instinctu 1124 inimici et satellitum eius, videlicet sacerdotum suorum, crudeli impetu super famulos Christi irruentes, mortem eis minari ceperunt. Quo viso, dux admodum contristatus cum suis accurrit, eorumque defensionem viriliter insistens, exterritos et pene iam desperatos non minime consolatus est. Sed et legatos suos Iun. pio Ottoni assignavit, qui per desertum magnum, quod imminabat, continuato septem dierum spacio eum transduxerunt. Ubi grande venenatorum animalium periculum incurrerunt; sed, Deo protegente, illesi evaserunt. Et post hec ad stagnum quoddam ventum est, ubi occurrentibus sibi Pomeranis^a, quorum Deus corda tetigerat, et ultro fidei ac lavacri salutaris gratiam expectantibus, flens pre gaudio primicias novi gregis ovili Christi adiecit. Altera die ad villam proximam divertit, ibique plures Domino cooperante secunde nativitatis sacramento iniciavit.

5. Tercia die ad Piriscum¹ castrum primum Pomeranie venit, ubi, cives eius ad fidem exhortans, quatuordecim diebus sedit; eis nimirum abnuentibus et servum Dei ad alia migrare loca facientibus seque novam hanc legem sine primatum^b et maiorum suorum consilio aggredi non posse testantibus. Tandem, pio Ottone assiduis pro salvacione eorum precibus incubante, spiritu Dei qui ubi vult spirat² et cui vult miseretur³ tacti, assenserunt et, iugo fidei colla submittentes, baptizati sunt, quotquot erant preordinati ad vitam eternam⁴.

Itaque in nativitate sancti Iohannis baptiste ad castrum ma- Iun. 24 gnum Gamin⁵ dictum, ubi sedes ducis est, pervenit. Ubi multum tempus id est quatuordecim ebdomadas vel amplius residens, ecclesias de ramis arborum, ut novella tunc plantacio exigebat, construxit; et ipse quidem infantes, cooperatores autem sui viros et mulieres ad Christum confluentes baptizabant. Illic ergo in catezizatione requisitum est a mulieribus, quod infantes necassent⁶ — nam crudelitate paganica puellas necare, et mares

a. Pomeranensibus C. b. primatu C.

1. Pyritz. 2. Ioh. 3, 8. 3. Rom. 9, 18. 4. Act. ap. 13, 48.
5. Kammin. 6. i. e. mulieres interrogatae sunt, num infantes necassent.

1124 reservare solebant — et pro hoc scelere specialis penitentia eis iniuncta est. Singulariter ergo viri, singulariter femine sacro abluebantur fonte, obpansis, ut oportunum erat, circa baptisterium velis, tanto ab invicem spacio semoti, ut nulla scandali alicuius occasio hinc oboriri posset.

6. Ad confirmandam vero pii Ottonis predicationem celeste prodigium non defuit, quod consequenter hic inseri ordo relationis exigit. Nam in eodem castro Gamin mulier quedam, nobilitate et divitiis prepollens sed inimici suasionibus seducta, piissimi apostoli sui doctrinam pro nichilo habebat et verba eius postponens sequi nolebat. Unde inter alia contemptus et transgressionis indicia, dominica die cunctis feriantibus, ipsa in agrum egressa metebat et, reclamante ac prohibente familia, irreverenti et infronito animo cepto operi instabat. Sed pius Dominus, qui predicatoribus suis polliceri dignatus est dicens: *Qui vos audit me audit, et qui vos spernit me spernit*¹, evidenti miraculo ad correctionem aliorum despectionis huius vindex et castigator factus est. Nam dum mulier infelix pertinaciter nefario operi incumberet ac familie sue, cur^a eam adiuvare negligeret, tumida comminatione exprobraret, subito collapsa retrorsum, dicto citius exspiravit magnumque astantibus horrorem incussit. Moxque a familia plangente et ululante loculo imposita, per omnem civitatis ambitum cum lamentabili exequiarum celebratione circumferebatur. Cunctisque tam manifestum Dei iudicium pertimescentibus, universi in fide et religione christiana magis ac magis confirmabantur.

7. Progressus itaque apostolus Pomeranorum venit ad urbem magnam Iulin, ubi Odora fluvius preterfluens lacum², vaste longitudinis ac latitudinis facit illicque mare influit. Cives autem loci illius crudeles erant et impii. Unde et pius predicator, magno illuc capitis sui periculo ingressus, certam mortis expectationem cum suis omnibus habebat. Mos autem est regionis illius, ut princeps terre in singulis castris propriam

a. circa C.

1. Luc. 10, 16.

2. das Haß.

sedem et mansionem habeat, in quam quicumque fugerit, tutum 1124
ab inimicis asylum possidet. Illuc ergo pius Otto ingressus,
orationibus et lacrimis pro conversione gentis Pomeranice in-
stabat; sed in cassum. Nam urbani, calice furoris Dei misere
debriati, audito servorum Dei adventu, sequenti die primo dilu-
culo super eos armata manu irruerunt et fustibus ac lapidibus
impetentes expellere nitebantur; dicentes: in vanum eos ducis
mansionem irrepsisse, quasi illic pacem habituri essent, cum
subversores patrie ac legum antiquarum extranei ab hac pacis
condicione deorum suorum edicto censerentur. Vix ergo inter-
ventu ac suffragio ducis post multimodas iniurias vivi evase-
runt. Et extensis ante castrum tentoriis, septem diebus illic
morabantur; cottidie per internuncios utriusque ducis, id est
Polizlai et Wortizlai, requirentes a Iulinensibus, si fidei chri-
stiane iugum subire deliberassent. Sed illi, pravo sacerdotum
suorum consilio seducti, nullatenus sane doctrine preconem re-
cipere volebant, quin immo de finibus suis cum ignominia eum
perturbantes ad Stetinenses ire compulerunt.

8. Accidit quoque in eodem loco, servum Dei gravem et
suo nomini^a indignam subire iacturam, que illi maiorem apud
Deum retributionis eterne pariebat gloriam. Nam rusticus qui-
dam, filius perdicionis, in silvam ad ligna precidenda ierat.
Rediensque cum plaustro lignis onusto, viro Dei occurrit in
loco, ubi magna ceni^b profunditas inerat; et nimia furoris^c ar-
matus vesania, instinctu possidentis eum sathane, arrepto vali-
dissimo ligno, caput servi Dei perfringere et cerebrum eius ex-
cutere nisus est. Sed Domino pium Ottonem ad multorum edi-
ficationem conservante, nefandus ille homicida sanctum eius
verticem attingere non potuit; sed ingentem ei inter scapulas
ictum dedit, ita ut pronus in cenum laberetur caputque illud,
reverenda canicie honorandum, cum toto corpore luto fetidissimo
turparetur. Sed et cooperatore eius fidelis Hyltanus nomine, cum
ei presidio esse voluit, et ipse gravem pro defensione veritatis
in brachio ictum suscepit. Servus autem Christi e luto sub-

a. sic codd.

b. sceni C.

c. furore C.

1124 levatus gratias pro contumelia agebat, dicens: *Gloria tibi, Domine, quia, etsi amplius non erit, saltem unum pro amore tuo ictum accipere merui.*

Verum usque quaque non deseruit Deus¹ famulum suum, pro nomine eius tanta discriminis acerbitate laborantem; quin immo defensorem illi et adiutorem in oportunitatibus in tribulatione² illustrem virum nomine Nedamirum destinare dignatus est. Erat enim ipse Nedamirus divitiis et potencia inter suos opinatissimus, antea quidem in Saxonia baptizatus et occulte christianus. Hic omnem pio Ottoni exhibebat humanitatem et defensionem; et abeuntem magna devotionis reverentia prosecutus, tres naves non modicas victualium copia oneratas hilariter prebuit ac ducatum ei ad urbem Stetinensem usque in arcem ducis officiose satis exhibuit. Ipseque per noctem ad cives suos Iulinenses clam rediit. Apostolus itaque Pomeranorum, continuis novem ebdomadibus in urbe Stetinesi tuto in loco residens, diu multumque in opere Dei et verbo predicationis oportune importune laborabat. Tandemque, Dei preveniente clementia, conversionem effere gentis obtinuit; hac videlicet occasione:

9. Domizlaus quidam, corpore et animo ac diviciarum copia sed et generis nobilitate inter Stetinenses eminentissimus, tanto ab omnibus honore et reverentia colebatur, ut nec ipse dux Pomeranie Wortizlaus sine consilio et assensu eius quicquam agere presumeret; sed ad illius nutum universa tam publica quam privata disponebantur negocia. Nam et^a pars maxima urbis Stetinensis — que, principatum omnium Pomeranie civitatum obtinens, tres^b montes suo ambitu inclusos habet — propinquis et affinibus Domizlai repleta erat; sed et in aliis circumiacentibus regionibus tantam propinquorum turbam habebat, ut non facile quisquam ei resistere posset. Sciens itaque pius Otto, utpote vir sagacissimus, quia, si hunc fidei

a. eximia urbs illa Stetin, que, tres montes suo ambitu inclusos habens, principatum — obtinet *E pro* et — habet. b. quatuor *C* (sed cf. supra n. a).

1. Cf. Ps. 118, 8.

2. Ps. 9, 10.

christiane cum propinquis suis subiceret, omnis plebs exemplo 1124
 eius attraheretur, toto conamine rinocerotam hunc ad arandum
 in agro Domini loro predicationis alligare¹ contendit. Sed
 quia durus erat nec facile constringi poterat, primum filios eius
 absente patre fidei sacramentis iniciavit, matrem quoque cum
 filiis ovili Christi adiecit. Quo audito, Domizlaus primo quidem
 graviter indignatus, quod sine voluntate et assensu eius hec
 acta essent, velut alter Saulus persecutionis crudelissime auctor
 factus est; ita ut, minis et terroribus ac conviciis pium Ottonem
 aggressus, cum ignominia de finibus illis eliminare temptasset.
 Sed apostolo Pomeranorum genua ad Deum flectente et cum
 lacrimis orante, ut ubi habundavit iniquitas superhabundaret
 gratia², Domizlaus, timore simul et amore Dei tactus, tamquam
 et ei superna voce diceretur: *Domizlae, quid me persequeris?*³
olim quidem debui perdere te, sed Otto servus meus oravit pro
te, repente de lupo in agnum, hoc est de Saulo mutatus est in
 Paulum; et totus lacrimis infusus, pio Ottoni humili adgenicu-
 latione prosternitur, indulgentiam ab eo et locum penitentiae
 flagitans. A quo benigne susceptus et paterna benedictione con-
 solatus, secreta confessione innotuit: se olim in Saxonia bap-
 tismi gratiam percepisse sed, astucia inimici tanta diviciarum
 mole in barbarica terra sibi accedente, fidem Christi inter ydo-
 latras servare non potuisse. Ex eo igitur abdicato penitus omni
 gentilitatis errore, fidei, quam inpugnaverat, validissimus pro-
 pugnator factus est, mirumque in modum plus correctus pro-
 fuit, quam errans leserat. Statimque omnis familia eius cum
 gaudio nove regenerationis lavacro perfusa est, anime scilicet
 plus quam quingente; sed et propinqui eius et amici cum do-
 mesticis suis, exemplo eius provocati, fidem receperunt. Sic-
 que factum est, ut, de die in diem crescente numero fidelium,
 tota civitas cum adiacente provincia, fugatis ydolatrie tenebris,
 splendore fidei illuminarentur. Mansit itaque illic pius predi-
 cator per instantem hiemem, baptismi gratiam confluentibus ad
 se populis tradens, ecclesias in locis oportunis construens;

1. Iob 39, 10.

2. Rom. 5, 20.

3. Act. ap. 9, 4.

1124 easque ministris ac sacerdotibus idoneis committens omni-
ornatu ecclesiastico diligenter instituens.

10. Sed nequaquam silencio pretereundum, quomodo etiam miraculi attestazione Dominus fidelem suum operarium, viriliter pro se agonizantem, illustrare dignatus est, sicut ore prophetico predixerat: *Quicumque glorificaverit me, glorificabo eum*¹. Matrone due, adhuc errore gentilitatis irretite, gravissima egritudinis molestia detinebantur; ita ut, omni membrorum officio destitute, morti iam proxime viderentur. Ad quas pius Otto accessit, verbum salutis, prout capere poterant, annunciavit; et sancta spe de misericordia Christi presumens, pollicitus est eis, si credere et baptizari vellent, non solum anime sed et corporis medelam et integerrimam sanitatem. Quod sine mora pollicentibus illis, servus Dei oratione facta manus capitibus^a earum imposuit, signo crucis et benedictione eas communivit. Statimque fugatis doloribus, pristinae sanitati sunt redditae; et a duplici morte, hoc est corporis et anime, per orationes sancti presulis absolute, unda salutari cum gaudio magno sunt regenerate. Multisque occasio salutis et conversionis fuere.

11. Iulinenses autem, qui dudum veritatis preconem a se repulerant, cum audissent Stetinenses fidem recepis-
se, nutu Dei mente compuncti, legatos honorabiles ad revocandum virum Dei miserunt. Quibus ille visis, zelo pietatis motus: *Quid venistis inquit ad me, hominem quem odistis et expulistis a vobis?* At illi humili satisfactione veniam petentes: *Nos inquit pater honorande, antiquam patrum et maiorum nostrorum legem sine consensu primatum, quos in hac Stetinensi nostra metropoli reveremur, infringere non presumpsimus. Sed postquam Deus tuus principes nostros sibi per te subegit, nos quoque, omni remota contradictione, monitis tuis obtemperare et doctrinam salutis excipere parati sumus.* Quo audito, antistes Domini positae genibus Deo gratias egit; profectusque cum eis et debita a Iulinensibus reverentia susceptus, veritatis viam errantibus aperuit et baptismi sacramento purificans adoptivum Deo po-

a. capiti C.

1. 1 Reg. 2, 30.

pulum congregavit. Computatus est autem numerus baptizato- 1124
rum illo tempore viginti duo milia et centum quinquaginta sex
homines, quos pater sanctus, pro ignorantia creatoris et cultu
rei insensibilis comparatos iumentis insipientibus et similes^a
factos illis¹, ad rectum tramitem perduxit et rationabile Deo
vivo obsequium exhibere² edocuit. Absque noticia etenim crea-
toris sui omnis homo pecus est.

12. Opere precium est autem, ipsa etiam predicationis
eius tempora^b hic ob noticiam posterorum annotare, ne vel hoc
curioso desit lectori. Non enim parvi pendendus est talis fervor
amoris Christi et pene inaudita his temporibus mentis eius de-
votio; cum alii pontifices magis urbibus et castellis quam ec-
clesiis vel pauperum Christi domiciliis edificandis insistant, plus-
que^c segni ocio torpere quam remotos barbarorum fines euan-
gelizandi gracia adire satagant. Huic autem servo Dei beatis-
simo longe alia mens erat. Nunquam ille municionibus vel civi-
tatibus extruendis operam dedit, dicens cum apostolo: *Non ha-
bemus hic manentem civitatem, sed futuram inquirimus*³. Porro
basilicas Christo dicandas fideliumque cellas et hospitalia tanta
devotione et liberalitate annuatim edificabat, ut cunctis pro hoc
stupori esset et admirationi. Et cum nimia hec divini cultus in
Teutonicis partibus occupatio facile eum ab ardua huius pere-
grinationis angaria excusabilem reddere valeret, non tamen his
contentus, latitudinem sancte caritatis, que in corde eius dif-
fusa per Spiritum sanctum flagrabat, etiam ad remotissimam
Pomeranorum gentem extendere curavit; ut illic populum ad-
quisitionis et filios Dei per euangelium generaret, quibus cum
Paulo gratulabundus dicere posset: *Que est nostra spes aut
gaudium aut corona glorie? Nonne vos ante dominum Iesum
Christum estis in adventu eius? Vos enim estis gloria nostra
et gaudium*⁴ ac signaculum apostolatus mei⁵. Cuius felicis-

a. similis C.

b. tempore C.

c. plusquam C.

1. Ps. 48, 13: „comparatus est iumentis insipientibus et similis factus
est illis“. 2. Róm. 12, 1. 3. Hebr. 13, 14. 4. 1 Thess. 2, 19.

5. 1 Corinth. 9, 2.

1124 simi apostolatus tempora ipsamque eius auctoritate canonica suffultam doctrinam scire volentibus evidenter explicabimus¹:

„Anno dominice incarnationis millesimo centesimo vicesimo quarto, indictione secunda, Calixto papa secundo Romane sedi presidente, Otto, Dei gratia Babenbergensis ecclesie octavus episcopus, igne divini amoris succensus et predicti apostolici auctoritate assensuque roboratus, partes Pomeranorum paganorum cum quibusdam civitatibus terre Liuticie aggressus est, ut eos ab errore gentilitatis revocaret, et ad viam veritatis agnitionemque Christi filii Dei perduceret. Quibus Domino opitulante conversis et baptizatis, ecclesias construxit ac consecravit. Deinde iuxta sanctorum patrum instituta hec eos servare edocuit: scilicet ut sexta feria abstineant a carne et lacte more christianorum; dominica die vacent ab omni opere malo et ad ecclesiam divinum officium audituri veniant ibique orationibus studiosis insistant; solempnitates sanctorum cum vigiliis, secundum quod eis indicatum fuerit, omni diligentia observent; sacrosanctam quadragesimam ieiuniis vigiliis elemosinis et orationibus diligentissime observare studeant; infantes suos in sancto sabbato pasche et penthecostes cum candelis et cappa, que dicitur „vestis candida“², et patrinis comitantibus ad baptismum deferant; eosque, veste innocentie indutos, per singulos dies usque in diem octavum eiusdem sancti sabbati ad ecclesiam deferant et celebrationi divini officii interesse satagant. Hoc etiam districta redargutione prohibuit: ne filias suas necarent, nam hoc nephas maxime inter eos vigeat; ne etiam filios suos et filias ad baptismum teneant; sed sibi patrilos querant; patrinis etiam fidem et amicitiam ut carnalibus parentibus servant. Interdixit etiam: ne quis commatrem suam ducat in uxorem, neque propriam cognatam suam usque in sextam et septimam generationem; et unus

1. Hanc, quae sequitur, relationem iussu ipsius Ottonis episcopi conscriptam esse, Ekkehardus (Mon. Germ. SS. VI 263), qui eandem in chronicon indidit, testificatur his verbis: „questum, de commisso sibi talento lucratum, litteris annotare precepit“. 2. Rituale Romanum: De sacramento baptismi: „Alba vestis in modum pallioli, seu linteolum candidum infantis capiti imponendum“.

quisque contentus sit una uxore; ne sepeliant mortuos christianos 1124 inter paganos in silvis aut in campis, sed in cimiteriis sicut mos est omnium christianorum; ne fustes ad sepulchra eorum ponant; omnem ritum et pravitatem paganam abiciant; domos ydolorum non construant; phitonissas non adeant; sortilegi non sint; ne quid etiam immundum comedant, non morticinum, non suffocatum, neque ydolotitum; neque sanguinem animalium; ne communicent paganis, ne cibum aut potum cum eis aut in vasis eorum sumant; ne in his omnibus consuetudinem paganismi repetant. Iniunxit etiam eis: ut, dum sani sint, veniant ad sacerdotes ecclesie et confiteantur peccata sua; in infirmitate autem vocent ad se presbiteros ac, pura confessione expiati, corpus Domini accipiant. Instituit etiam: ut de periuriis, de adulteriis, de homicidiis et de ceteris criminalibus secundum canonica instituta penitentiam agant; et in omni christiana religione et observatione obedientes sint; et ut mulieres post partum ad ecclesiam veniant et benedictionem a sacerdote, ut mos est, accipiant“.

13. Soli autem pontifices ydolorum vie Domini resistebant, et multas servo Dei tendentes insidias, occulte eum perimere nitebantur. Sed multitudine plebis cottidie ad fidem convolante, cum nullus sacrilegis et profanis sacerdotibus ad eum pateret accessus, confusi et reveriti a facie eius exemplo Zaroes et Arfaxat magorum¹, apostolos Christi Matheum Symonem et Iudam fugientium, longius extra regionem illam secesserunt. Et quia apertam famulo Dei persecutionem inferre non poterant, detractionibus et blasphemis horribilibus eum lacerabant, et quocunque devenissent, invidiam ei ac inimicicias excitantes, maledicta et probra in eum congerebant. Pro quibus tamen ille Deo dignus antistes a Domino gratiam ampliorem consequabatur; quia, ut scriptum est: *Benedictio Domini super caput iusti*², ideo dedit illi hereditatem eternam in celis et invenit gratiam in conspectu omnis carnis.

Cum vero delubra et effigies ydolorum a pio Ottone de-

1. De his v. Acta S. Matthaei apostoli, Acta SS. Sept. T. VI p. 220 sq.

2. Prov. 10, 6.

1124 struerentur, profani sacerdotes auream imaginem Trigelawi, qui principaliter ab eis colebatur, furati, extra provinciam abduxerunt et cuidam vidue, apud villam modicam degenti, ubi nec spes ulla requirendi esset, ad custodiendum tradiderunt. Que, mercede ad hoc conducta, quasi pupillam oculi sui includens profanum illud custodiebat simulacrum; ita ut, trunco validissime arboris cavato, illic imaginem Trigelawi pallio obductam includeret et nec videndi ne dicam tangendi illud cuiquam copia esset. Solummodo foramen modicum, ubi sacrificium inferretur, in trunco patebat; nec quisquam domum illam nisi profanos sacrificiorum ritus agendi causa intrabat. Quod audiens, inclitus Pomeranorum apostolus multifaria intencione satagebat, quoquo modo illuc attingere; premetuens, quod et accidit, post abscessum suum rudibus adhuc et necdum in fide confirmatis plebibus simulacrum illud in ruinam futurum. Sed prudenter animadvertens, utpote vir omni sagacitate preditus: quia, si publicam illo profectionem indiceret, sacerdotes, audito eius adventu, imaginem Trigelawi rursum ad remociora occultando abducerent, sapienti usus consilio, quendam ex comitibus suis Hermannum nomine, barbare locutionis sciolum sensuque et ingenio satis acutum, latenter ad viduam illam destinare curavit. Cui etiam precepit, ut, assumpto habitu barbarico, ad sacrificandum Trigelawo se pergere fingeret. Hermannus itaque, pilleolum barbaricum et clamidem mercatus, post multa ardue vie pericula viduam illam tandem conveniens, asserebat: se, nuper de procelloso maris gurgite per invocationem dei sui Trigelawi erutum ideoque debitum ei pro salvatione sua sacrificium litare desiderantem, ductu eius illo mirabili ordine per ignotos vie tractus devenisse. At illa: *Si ab eo inquit missus es, ecce edes, in qua deus noster robore cavato inclusus detinetur. Ipsum quidem videre et tangere non poteris; sed ante truncum procidens, eminus foramen modicum, ubi quod vovisti sacrificium inferas, attende. Quod dum imposueris, reverentèr clauso ostio, egredere. Et si vite tue consultum esse volueris, cave, ne cuiquam hunc patefacias sermonem.* Qui alacer edem illam ingressus, dragmam ar-

genti in foramen iactavit, ut sonitu metalli sacrificasse putaretur. Sed concitus, quod iecerat, retraxit; et pro honore contumeliam Trigelawo, id est sputaculum ingens pro sacrificio, obtulit. Deinde curiosius attendens, si forte negotii, pro quo missus erat, exequendi facultas ulla suppeteret, animadvertit imaginem Trigelawi tanta cautela et firmitate trunco inpressam, ut nullo pacto eripi aut saltem loco moveri posset. Unde non mediocri tactus dolore, quidnam ageret estuabat; dicens intra se: *Heu, quod tantum vie pelagus sine fructu peragravi. Quid respondebo domino meo; vel quis me hic fuisse credet, cum vacuus rediero?* Et circumferens oculos, vidit sellam Trigelawi comminus parieti affixam; erat autem nimie antiquitatis et nullo iam pene usui apta. Statimque exiliens cum gaudio, infaustum munus parieti detrahit et abscondit. Primoque noctis conticinio egressus, omni festinatione dominum suum sociosque revisit; cuncta que egerat replicat, sellam etiam Trigelawi in testimonium fidei sue representat. Apostolus itaque Pomeranorum, habito cum suis consilio, sibi quidem et suis ab hac requisicione desistendum censuit, ne non tam zelo iusticie quam auri cupiditate hoc agere videretur. Collectis tamen et adunatis principibus ac natu maioribus, iusiurandum ab eis exegit: ut cultura Trigelawi penitus abdicaretur et, confracta imagine, aurum omne in redemptionem captivorum erogaretur.

14. Sed dum fortem armatum¹, qui eatenus atrium suum Pomeraniam scilicet possederat, fortior Christus superveniens superasset, armisque eius per beatum presulem confractis, spolia distribuisset, non ferens ille violentam de sedibus suis exclusionem, tamquam leo rugiens vel modicam servo Dei inferre nisus est lesionem. Et aliud quod ageret Domino prohibente non inveniens, locum Babenbergensem maiori ex parte inopinato incendii discrimine absumpsit; ut, dum pastor eximius, peracta apud extraneos predicatione, sponsam suam cum gaudio reviseret, non per omnia integram sed aliquantulum hoc dampno conquassatam ac merore confectam inveniret. Nocte enim, qua

1. diabolum. Cf. Bibl. rer. Germ. II 634 n. 12.

1124 festivitas sancti Hermetis martiris agebatur — cuius precioso
 Aug. 28 corpore locus ipse a primordio per fundatorem suum beatum
 Heinricum nobiliter est insignitus — idem lamentabile incendium
 occasione mulieris cuiusdam in partu laborantis sumpsit exor-
 dium. Quod statim circumcirca se impetu valido torquens, omnem
 locum extra civitatis ambitum tanta vastavit atrocitate, ut vix
 raruscule quorundam case evaderent. Ipsa vero civitas cum ec-
 clesiis suis infra vel extra positis patrocinio beati Hermetis alio-
 rumque advocatorum suorum illesa permansit. Ad nichilum
 itaque fraus et malicia versuti hostis est redacta; quoniam qui-
 dem et sponsa castissima Babenberg tetram calamitatis huius
 nubeculam, patre suo tamquam serenissimi solis iubare ad se
 reverso, facile recuperavit^a, et ipse¹ atrium suum, quod diu se-
 curus possederat, ultra tenere non potuit. Christo enim in Po-
 merania per apostolatum pii Ottonis regnante, inimici defecerunt
 framee in finem, et civitates eorum destructe sunt².

15. Plurimi autem Iulinensium pro negociatione sua trans
 mare abierant; qui, audita civium suorum conversione, spiritu
 Dei preveniente, emulatores eorum facti sunt. Et ad metropolim
 suam reversi, regi regum Christo colla submitunt, statimque a
 presbiteris, quos pius Otto illic constituerat, baptizati, civibus
 suis, dudum christianis legibus initiatis, pari devotione adunan-
 tur. Et mirum in modum fidelissimo preconie veritatis in opere
 Dei laborante, ecclesia per totam regionem illam crescebat et
 confortabatur, Dominusque augebat cottidie, qui salvi fierent in
 id ipsum³. Apostolus itaque Pomeranorum duas illic eccle-
 sias constituit: unam in civitate Iulin sub honore sanctorum
 Adelberti et Winezlai, qui magne apud barbaros opinionis erant,
 in loco, ubi profani demoniorum ritus agi solebant, ut, ubi
 spurca pridem commercia, Christi deinceps frequentarentur mi-
 steria; alteram extra civitatem in campo mire latitudinis et ame-

a. sic CB.

1. versutus hostis (diabolus). 2. Ps. 9, 7. 3. Act. apost. 2, 47:
 „Dominus autem augebat, qui salvi fierent quotidie in id ipsum“.

nitatis in veneratione beatissimi apostolorum principis edificavit, 1124
illicque sedem episcopalem statuit.

16. Sed pio doctore, pro continuis animarum lucris moram illic faciente, devota gregis sui multitudo, non solum in Babenbergensi loco sed et in pluribus cenobiis et parrochiis collecta, incredibili sollicitudine et merore pro longiturna tanti pastoris absentiaangebatur et, ut reportaret illum, modis omnibus instat. Unde crebra ad eum missa legatione preces precibus, vota votis congeminant. Sed et litteris, filialem testantibus amorem, pro reditu eius satagere non desinunt; quarum hic unam¹ inserere dignum videtur tam pro sui dulcedine quam etiam pro auctoris eius pie memorie Wignandi abbatis perpetua recordatione. Que in hunc se modum habent:

„Domino et patri karissimo pio Ottoni episcopo ac gentis 1127
Pomeranice apostolo Wignandus Tharissensis cenobii provisor post Sept. 22
indignus devotum in omnibus servitium et orationum spirituale debitum. Benedictus Deus, pater misericordiarum, pater luminum, qui, ex utero formans vos servum sibi², dedit^a in lucem gentium, ut salus eius in extremis terre³ per vos annunciaretur ac lumine fidei tenebrosa gentilium corda irradiarentur. Unde sancta mater ecclesia novo filiorum augmento digne letatur, dum per ministerium vestrum multa milia barbare nationis sacro baptismo renascuntur et, abiecta ydolorum cultura, destructis delubris, reedificatis ecclesiis, verus Deus adoratur et colitur. Ergo post euangelium alienis annunciatum, post tanti ministerii opus consummatum, iam ad proprias oves revertenti pastori grex omnis letabundus occurrit, clerus cum populo, ac singulari gaudio monachorum processio patrem suum suscipit, concinens in iubilo cordis et voce exultationis: *Revertere, revertere, Sunamitis; revertere, revertere, ut intueamur te*⁴. Ego autem, horum omnium minimus sed fidei et dilectionis in-

a. om. C.

1. Haec Wignandi epistola, ab Ebone ad annum 1124 perperam relata, scripta est anno 1127. Cf. Geschichte des deutschen Reiches unter Lothar dem Sachsen p. 60 n. 24, 61 n. 32. 2. Isai. 49, 5. 3. Isai. 49, 6. 4. Cant. 6, 12.

1127 tegritate nulli secundus, circa festum sancti Mauricii¹ in Saxo-
 post Sept. 22 niam veni, sperans optatissimum adventum domini mei; ut pri-
 mus suscipere, quem novissimus deduxi. Sed redeunte nuncio
 vestro, spe expectationis mee frustratus, multum autem de
 certo reditu vestro letificatus, quod corporali presentia non
 potui, in spiritu humilitatis dominum meum primus salutare
 studui; dicens non sono tantum oris sed flagrantissimo etiam
 iubilo cordis:

Salve, magne pater! Dic, littera, dic reverenter,

Dic rogo versifice: *Inclite presul, ave!*

Expectate redi, populi spes, optio cleri,

Digne dator legis, certa medela gregis.

Nolumus ergo vos ignorare, pater sanctissime: quia, ex quo re-
 cessistis, semper imminebat nobis dies angustie et tribulationis.
 Tyrannus enim ille Conradus^{a 2}, toto pene anno in castello Nu-
 rinbergensi^b moratus, bona episcopatus sibi vicina devastavit;
 de redditibus vestris frumentum ex parte abstulit; census sibi
 persolvi statuit; villicum de Rostal^c bis captivatum omnibus
 rebus suis despoliavit; insuper urbem Babenbergensem callida
 machinatione, ut fertur, apprehendere studuit, sed Deo gratias
 iniquitas eius nequaquam prevaluit. Ego enim et Cunradus^d
 custos, de dispensatione nobis credita solliciti, civitati presidia
 et custodias cum ceteris fidelibus vestris deputavimus; arietes
 in circuitu extruximus; militibus, prout opus erat, stipendia
 erogavimus; reliqua omnia, que commisistis, diligenter procura-
 vimus. Inter Hermannum et Fridericum maxima guerra ha-
 betur; insidie diverse altrinsecus tenduntur; rapine rapinis, in-
 cendia incendiis redduntur; inter que villa subiacens Lapid-
 Botonis³ cum ecclesia combusta est. Fridericus, quadam nocte
 municionem Nienstein^e cum militibus suis clam ingressus, viri-
 liter agere cepit; sed, qui in arce erant, missis iaculis et iactis

a. .C. C, Conradus B.
 stal C, Rustal B.

b. Nurembergensi C, Nurinbergensi B.

c. Ro-

d. Conradus B.

e. Nienstein C, Niestein B.

1. circiter Sept. 22.
 tenstein.

2. regni aemulus; postea III rex.

3. Bo-

lapidibus unum de suis occiderunt, plures vulneraverunt. Sic-
 que infecto negotio vix cum suis omnibus evasit. Preterea ¹¹²⁷
^{post Sept. 22} per totam provinciam multa mala grassantur; rapinis, incendiis
 omnia vastantur. Ergo tot malis tot miseriis finem facere
 sperantes adventum vestrum, clamamus singuli, clamamus omnes:
Veni domine veni; festina, ne tardaveris; adveni desiderabilis,
quem exspectamus in tot tribulationum tenebris! Reliquus
 rerumstrarum status in Bawaria et Saxonia satis prospere
 agitur. De negotio autem mihi specialiter iniuncto¹ pater-
 nitatem vestram scire volo: quia cuprum ad septingentos et eo
 amplius centenarios comparavimus, ex quibus trecentos maxima
 difficultate usque Schmalchalten^a perduximus. Et iam viribus ex-
 hausti, manum auxilii vestri ardenti desiderio prestolamus^b ac
 exoptatissimum omni regno sanctitatis vestre reditum vix ex-
 spectamus“.

He sunt piissimi patris Wignandi littere calamo vere dilec-
 tionis scripte.

17. Hic est Wignandus, predicator suavissimus, quem pius
 Otto quasi auricularium² sibi fidelissimum eligens, in tanto
 amore et reverencia habebat, ut omnium secretorum suorum
 participem eum faceret et, custodia civitatis sibi specialiter de-
 legata, etiam egregium opus, quod tunc inchoaverat, scilicet
 domum sancti Petri maioris ecclesie cum turribus ad arcenda
 ignium pericula cupreis operire laminis, eius potissimum ma-
 gisterio committeret³. Nec inmerito.

Erat enim vir tocius prudentie et sagacitatis, quem videre
 et audire gloria fuit ordinis nostri, non solum spirituali gratia
 prestantissimus sed et corporis venustate et morum habitusque
 dulcedine omnibus amabilis. Cuius reverendam senectutem et
 caput ad similitudinem Christi candidum liceat nobis parumper
 dignis vocibus predicare. Nam cum pene centenariam ageret
 etatem et plurimum in opere Dei nocte dieque laboraret, oculi

a. Schmalkhalten C, Schmalchalten B. b. prestolamur B.

1. ecclesiae S. Petri Bambergensis eupro tegendae; v. cap. 17. 2. Cf.
 2 Reg. 23, 23. 3. anno 1127. V. supra n. 1.

puro vigeabant lumine; pedes firmo gressu veloces, auditus penetrabilis, dentes numero et firmitate durabant; vox canora, corpus solidum nec senio longinquo curvatum; cani cum rubore discrepabant, vires cum etate dissentiebant. Non memorie tenacitatem, ut in plerisque cernimus, antiquior senecta dissolvebat; non calidi^a acumen ingenii frigidus sanguis obtundebat; non contractam rugis faciem arata frons asperabat; non denique tremula manus per curvos cere tramites errantem stilum ducebat. Future igitur resurrectionis virorem^b in eo Dominus nobis ostendit; ut peccati quidem sciamus esse: quod ceteri adhuc iuvenes premoriuntur in carne; iustitie autem: quod hic adolescentiam in aliena etate metiebatur^c. Et quamquam multis istam corporis sanitatem etiam peccatoribus evenire videamus, tamen hoc illi ad peccandum abutuntur, hic vero ad bene agendum. Siquidem, ab infantia divinis apud nos scripturis eruditus et in sancta conversatione probatus, cum prioratum hic strennue sub venerabili Wolframmo abbate administraret, c. 1120 pius Otto violenter abreptum Tharisiensi eum cenobio prefecit. Quod multo tempore, id est amplius quam triginta annorum spacio, nobiliter gubernans et circumquaque celestis doctrine dulcedinem melliflua^d predicatione spargens, cunctorum in Deum provocabat affectus. Totus enim quasi seraphin superni amoris facibus accensus, in solo redemptoris desiderio anhelabat; divine servitutis celebritatem flagrantissima devotione peragebat; secretorum celestium summa et capere prevaluit et annunciare, loquendo et alios accendebat et, quos verbo tangebatur, ardere protinus in Dei amore faciebat. Sed et sacra missarum solempnia singulari affectu et compunctionis dulcedine agebat; ita ut et alios, in vinculo perfectionis quod est caritas sibi artius devinctos, tam viva voce quam et litteris, incomparabili suavitate plenis, ad hoc sacrificium ardentissimo summi ac veri sacerdotis desiderio celebrandum sepius accenderet. Nec mirum, quod, spiritualis huius cibi intimum saporem diu mul-

a. corr. in callidi C.
in mētiebatur.

b. virorum C.

c. manus posterior in C corr.

d. mellifluam codd.

tumque degustans, amplius esuriebat; nam et plus quam quadraginta annis sacerdocio functus est. O felix et omni dignus beatitudine, quem senectus honorabilis Christo servientem occupavit, quem extrema dies salvatori tanta devotione invenit militantem; qui non confundetur, cum loquetur inimicis suis in porta¹; cui in introitu paradisi dicetur: *Serve bone et fidelis, intra in gaudium Domini tui*²; *accipe manna absconditum, accipe calculum candidum et in calculo nomen novum scriptum, quod nemo scit nisi qui accipit*³; *cerne desiderabilem Christi vultum*,

Quem prius, absconsum nitidi sub tegmine panis,

Mistica verba canens, semper sacrare solebas.

Si quis autem de transitu eius audire voluerit, breviter accipiat. Totam etenim solemnitatem^a paschalem quinquagesimam solita devotione in divinis exegit laudibus, psalmis et orationibus sacreque lectioni et predicationi vacabat. Et cum a discipulis suis nova eo loci menia struere rogaretur^b, ille, instabilem humane vite cursum diemque vocationis sedulo attendens, respondebat: *Cernitis me silicernium: velox est depositio tabernaculi mei*⁴, *paucitas dierum meorum finietur brevi*⁵; *ideoque expensas ad celeste edificium congregare desidero; flendo, elemosinas tribuendo, sacras hostias offerendo ceterisque spiritualibus exercitiis invigilando, adventum iudicis iam iamque ad ostium pulsantis operiri volo.* Appropinquante igitur diu prestolato remunerationis die, antiquus vinee Domini operarius dominica, qua canebatur *Vocem iocunditatis*, more suo festivus et alacer chorum ingressus, inusitato ordine *Alleluia*, surrexit pastor bonus ac deinde sequentiam: *Victime paschali* per semet ipsum imposuit⁶. Cunctos voce manu totiusque corporis motu ad psallendum devotius incitabat, tanquam, presentis vite me-

a. solemnitatem addidi.

b. rogaretur scripsi pro cogeretur C.

1. Ps. 126, 5. 2. Matth. 25, 21. 3. Apoc. 2, 17. 4. 2 Petr. 1, 14. 5. Iob 10, 20. 6. „inusitato ordine“, propterea quod sequentia haec: „Victimae paschali“ non dominica quinta post pascha („Vocem iocunditatis“) sed ipso paschate cantari debet, v. Missale Romanum: Dominica resurrectionis.

1151 tam sibi iam adesse intelligens, diceret: *Omnis laus in fine ca-*
 Mai. 13 *nitur*. Solebat enim sepius tante suavitatis et compunctionis
 cantum indifferenter psallere, quotiens id Spiritus sanctus cordi
 eius dictasset, cuius videlicet donum lege non constringitur.
 Finita autem divini celebritate officii, accersito fratre, cui dis-
 pensatio monasterii credita erat¹, dixit: *Hodie, ut audisti, ka-*
rissime fili, dominice resurrectionis gloriam debitis laudum pre-
*coniis pro modulo nostro prosecuti sumus*². *Tu ergo, quod te*
attinet, sedulus exequere, ministerium tuum imple; quia tam
devotis Christi servitoribus affluentior hodie est impendenda ca-
ritas. Ipse ego, sicut precentor et instigator ad dulcisonum car-
men fui, ita spiritualis convivii administrator esse volo. Sic-
 que ultimum cum grege suo pastor piissimus agens convivium,
 future ascensionis³ solita precum et lacrimarum se devotione
 Mai. 14. 15 preparabat. Diebus rogarum, id est secunda et^a tertia
 Mai. 16 feria, letaniis cum fratribus interfuit. Sed feria quarta, gravi
 nocturno tempore oppressus infirmitate, matutinali officio assur-
 gere non potuit. Iam enim resolutionis tempus instabat; iam
 summus pater familias ad ostium servi vigilantissimi pulsabat⁴,
 iam reverendo seni, qui diu in stadio laboriose huius vie inde-
 fessa devotione cucurrerat, bravium eterne dulcedinis dare⁵
 disponebat. Itaque ascitis fratribus infirmitatis sue gravedinem
 aperuit, canonicum coram se cursum decantari fecit, et mane
 in capellam suam ad audienda sacra missarum solemnia se
 deferri petiit. Exinde relatus, pacem omnibus dedit, cunctis
 Mai. 16. 17 se paterno affectu commendavit; sicque egrotans biduo, omnes
 ad se confluentes pro virium suarum possibilitate verbo Dei
 Mai. 18 edificabat. Et morbo ingravescente, feria sexta post ascensionem
 Domini, sumpto viatico, hora nona ex Egypto huius mundi ad
 veram repromissionis terram migravit. Testatique sunt, qui
 aderant: in exanimi eius corpore nec tenuem se deformitatis
 alicuius pallorem vidisse. Sed vultu decoro dormienti simillimus

a. om. C.

1. i. e. cellerario. 2. V. supra p. 67 n. 6. 3. festo ascensionis
 Domini (Mai. 17). 4. Luc. 12, 36. 5. Cf. 1 Cor. 9, 24.

apparebat, ita ut rubeus color faciei et totius corporis venustas 1151
 primo obitum eius ambiguum faceret. Nec mirum, si mortis Mai. 18
 acerbitas minime sibi locum in eo vendicabat, qui non ad mortem sed potius de morte ad vitam transibat^a. Antea quidem frequentius gravi et longissima decubuerat egritudine, ut virtus spiritus in infirmitate carnis probaretur; sed cunctis pro vita et sanitate eius certatim supplicantibus, iam desperatum patrem amantissimum Dominus, quasi de ipso mortis limine revocatum, filiis merentibus et lugentibus incolumen sepius restituebat. Tunc autem, premissis ad Dominum pluribus gregis sui manipulis, et ipse pastor eximius, brevi tactus morbo, super nobilem hunc nobilior ipse ruit acervum. Qui, regem glorie in decore suo videre desiderans, cottidianis cum propheta suspiriis decantabat dicens: *Quam dilecta tabernacula tua, Domine virtutum; concupiscit et deficit anima mea in atria Domini*¹. Sed hec hactenus. Nunc revertamur ad ordinem.

18. Igitur apostolus Pomeranorum, Otto pius, assiduus 1125
 fratrum ac filiorum suorum precibus et legationibus contraire non valens, cum apud Iulinenses hiemasset, circa purificationem c. Febr. 2
 sancte Marie, accepta ab omnibus licentia, unicam sibi sponsam Babenbergensem ecclesiam desiderato reditu consolari disposuit. Quo audito, plebs neophita Pomeranorum, non mediocri merore perculsa, lacrimosis precibus vestigia pii doctoris ambire eumque apud se detinere conata est; sed in cassum. Ipse enim, graves in terra sua diversorum negotiorum causas sibi imminere, respondit; sed et magnum anime sue periculum asserebat, si dum Christo nova de alienis gregibus lucra requirit, proprias oves sibi specialiter assignatas negligeret.

Moxque adunata sociorum et cooperatorum turba, cunctos, quibus fidei verbum disseminaverat, circuivit et in religione christiana tam monitis quam et precibus devotis confirmavit. Primum vero castellum Gamin, exin Dodinensem locum in honore sancte crucis consecratum adiit; ubi multos Pomeranorum, de insulis maris reversos, ubi timore Polizlai ducis occultati

a. transiebat CB.

1. Ps. 83, 2. 3.

1125 erant, baptizavit. Nam dux Polizlaus sicut erga Deum cultoresque Dei religione ac pietate insignis ita erga ydolatras et criminosos debiti rigoris asperitate fuit inplacabilis. Singulis quippe annis, collecto exercitu valido, terras paganorum devastare solebat, ut vel timore gladii iugo christiane fidei subigerentur. Quod ubi ministerio pii Ottonis factum est, arma in pacem^a mutata sunt, cunctique de latibulis, ubi absconditi erant, accepta per beatum presulem securitate, prodeuntes, baptismi gratiam consecuti sunt. Hec igitur sancta occupatio predicatori veritatis moram redeundi fecit, eumque in Dodinensi loco aliquamdiu detinuit. Sed peractis omnibus, Belgroensem urbem¹ petiit, deinde Colubregam². Illic ecclesiam in honore sancte Dei genitricis Marie, dudum a se inchoatam, perfecit et consecravit. Post hec visitatis omnibus ecclesiis Deoque intima lacrimarum profusione commendatis, auctus benedictione Domini, Pomeraniam egreditur.

Deinde prospero cursu Poloniam veniens, inedicibili gaudio ac reverentia velut angelus Dei a duce Polizlao omnique clero et populo suscipitur. Fit gaudium generale totius plebis, tam de conversione Pomeranice gentis quam etiam de sospitate et reditu desiderantissimi patris Ottonis. Aliquamdiu ergo illic a Polizlao duce humanitatis gratia detentus, Bohemiam adiit similemque Ladizlao duci et omnibus suis de adventu suo leticiam prebuit. Deinde ad Claderunense cenobium veniens, fratribus unanimi devotione sibi occurrentibus solita humilitatis affectione se commendavit.

Mart. 24 Sicque omni festinatione fines terre sue ingressus, feria
tercia maioris ebdomade Michelfeldensem locum adiit ibique
Mart. 26 cenam Domini debita veneratione, multo fidelium stipatus agmine, celebravit. Nam plures de clero et populo Babenbergensi, desiderantes angelicam eius presentiam, illic occurrerant et, quasi de morte redditum^b pastorem piissimum suscipientes, omnipotenti Deo, qui per tot pericula salvum eum reduxit,

a. pace C.

b. reditum CB.

1. Belgard.

2. Kolberg.

cum lacrimis gratias agebant. Igitur sacratissimo paschali sabbato diu viduatam sponsam suam amantissimus pater revisit, locumque Tūrestatensem^a ingressus, ibi reverendas sacre noctis vigiliis more solempni peregit. 1125
Mart. 28

Mane primo resurrectionis dominice splendidior solito nobis aurora refulsit, geminata nos excepit leticia: tam iocunditate paschalis festi quam etiam adventu pii Ottonis illustrata. Nam universo clero et populo coadunato multisque honorabilibus et reverendis aliorum patribus cenobiorum presentibus, novus nostri temporis apostolus, destructis apud barbaros portis mortis, victor rediens, ecclesiam suam cum triumpho nobili ingreditur et, cunctis pre gaudio flentibus, cum cantu paschali: *Advenisti desiderabilis* omni devocione spirituali suscipitur. Erat apud omnes gaudium lacrimis intime compunctionis permixtum, ut solet esse in caris mortuis resuscitatis; cunctorum voces inedicibili iubilationis suavitate *Alleluia* resonabant, strepitu quanto humane aures capere vix possent. Omnibus enim verisimile videbatur, acsi Christum a morte resurgentem susciperent; Deo laudes, Deo gratias, nullo tacente, unanimi psallentium affectu concrepabant. Omnes reverendam eius caniciem et angelicam faciem videre gestiebant; cuncti pedes eius, euangelio pacis consecratos, exosculari gaudebant. Quibus ille verbum Dei solita eructuans dulcedine, magnalia Christi et conversionem Pomernice gentis narrabat et cunctorum affectus ad considerandam divine pietatis gratiam illo quo ipse ardebat caritatis igne accendebat. Mart. 29

Exinde incertam humane vite metam attendens, illudque de libro beati Iob assidua meditatione revolvens: *Nescio, quamdiu subsistam et si post modicum tollat me factor meus*¹, omnia, que dudum inchoaverat, cenobiorum et ecclesiarum septa quantocius consummare accelerabat. Sed et necessariis quibusque domicilia et hospitalia pauperum Christi ut bonus pater familias sufficienter accumulare satagebat, ne^b, si quid in his neglectum foret, de mercede sua subtractum postea doleret.

a. Twerstatensem B.

b. ut C.

1. Iob. 32, 22.

1125-1126 Sed pio presule in his^a partibus toto conamine divinis operibus insudante, antiquus hostis, veneno invidie tabescens, tot animarum detrimenta sibi in Pomerania succrescere doluit; ideoque bono semini zizania superseminare studuit. Nam due precipue illic civitates Iulin et Stetin instinctu inimici apostasiam incurrerunt, abiectoque veri Dei cultu, priscis demoniorum ritibus se perdendos prostituerunt. Hoc autem quo ordine sit factum vel qualiter secundo pii Ottonis apostolatu per Dei gratiam mirifice sit recuperatum, tercius liber Domino annuente explicabit.

LIBER TERTIUS.

1. Cum infatigabilem domini ac patris nostri pii Ottonis episcopi affectum, quo gloriam et cultum Christi non solum in Teutonicis sed et in remotis barbarorum finibus euangelizando propagavit, assidua meditatione revolverem, nefas iudicavi: tam laudabilia eius gesta infructuoso tegi silencio. Unde, non presumptionis sed potius intime caritatis spiritu ductus, de secundo eius apostolatu in Pomerania, sicut fidelis cooperatore ipsius Udalricus presbiter Sancti Egidii michi^b innotuit, scripto tradere curavi; nam de primo alias scriptum est. Legat ergo, qui voluerit; invitum et fastidientem nemo legere compellit.

1125-1126 Beatissimo patre nostro Ottone post primum gentis Pomeranice apostolatum ad sedem propriam feliciter reverso, due ex nobilissimis civitatibus, id est Iulin et Stetin, invidia diaboli instigante, ad pristinas ydolatrie sordes rediere; hac videlicet occasione. Iulin, a Iulio Cesare condita et nominata, in qua etiam lancea ipsius columpne mire magnitudinis ob memoriam eius infixata servabatur, cuiusdam ydoli celebritatem in initio estatis maximo concursu et tripudio agere solebat. Cumque, verbo fidei et baptismi lavacro urbe mundata, per beatum pontificem ydola maiora et minora, que in propatulo erant, ignibus conflagrari cepissent, quidam stultorum modicas ydolo-

a. om. C.

b. om. C.

rum statuas, auro et argento decoratas, clam furati penes se 1125-1126 absconderunt; nescientes, quale per hoc urbis sue operarentur excidium; sicut et infelix Acham, qui, Ierichuntina urbe subversa, auream regulam quinquaginta^a sicilorum cum pallio coccineo et ducentis argenti siclis furatus est, indeque gravem celestis ire vindictam et Iudaice plebis vidit ruinam¹. Nam ad predictam ydoli celebritatem comprovincialibus^b solito fervore concurrentibus ludosque et commessiones multiformi apparatu exhibentibus, ipsi dudum absconditas simulacrorum effigies populo inani leticia resoluti presentantes, eos ad antiquum paganizandi ritum impulerunt. Statimque per hoc divine correptionis plagam incurrerunt. Siquidem ludis et saltationibus paganico more omni populo occupato, subito ignis Dei cecidit e coelo super apostatricem civitatem; tantaque violencia tota urbs conflagrari cepit, ut nemo quippiam de rebus suis eripere valeret sed, animas tantum suas salvare cupientes, fuga pernici seviens incendium vix evaderent. Tandem vero urbe sua ignis atrocitate deleta, reversi invenerunt ecclesiam sancti Adelberti, per apostolum suum Ottonem illic in meditullio propter raritatem lapidum firmo lignorum tabulatu constructam, ex media parte flammaram vaporibus absumptam. Sed mirum in modum sanctuarium, quod viliori scemate id est harundineto contectum fuerat, subter habens pannum lineum oppansum propter vermiculos ab altari arcendos, omnino ab ignibus intactum remanserat. Quo ingenti viso miraculo, tota plebs in laudem Dei summa clamoris exultatione personabat; asserens, procul dubio verum hunc esse deum, qui in tanta ignis violentia, que etiam lapides comminuerat, harundinetum suo altari oppansum reservare potuerit illesum. Sicque advocatis sacerdotibus christianis, publicam egere penitentiam, et abiuratis penitus ydolis urbeque sua, prout poterant, reedificata, iugo Christi cervices suas alacri devotione submiserunt. Hoc modo divine correptionis plaga salutem in terra eorum est operata.

a. id est *C* pro quinquaginta.

b. cum provincialibus *CB*.

1. Iosue 7, 21—26.



1125-1126 Stetin vero, amplissima civitas et maior Iulin, tres montes ambitu suo conclusos habebat. Quorum medius qui et alcior, summo paganorum deo Trigelawo dicatus, tricapitum habebat simulacrum, quod aurea cidari oculos et labia contegebat; asserentibus ydolorum sacerdotibus: ideo summum deum tria habere capita, quoniam tria procuraret regna, id est celi terre et inferni; et faciem cidari operire pro eo, quod peccata hominum, quasi non videns et tacens, dissimularet. Hac itaque potentissima civitate ad veri Dei agnicionem per beatum presulem adducta, delubra ydolorum flammis erant absumpta, dueque ecclesie, una in monte Trigelawi sub honore sancti Adelberti, alia extra civitatis menia in veneratione sancti Petri erant locate. Et ex hoc sacrificia, que copioso apparatu et divitiis sacerdotibus fanisque ydolorum exhibebantur, nunc ecclesie Christi vendicabant. Unde commoti sacerdotes et prioris pompe delicias cottidie sibi decrescere videntes occasionem querebant, ut populum ad ydolatriam questus sui gratia revocarent. Accidit ergo, mortalitatem magnam civitati supervenire. Et requisiti a plebe, sacerdotes dicebant: abinrationis ydolorum causa hoc eos incurrisse; omnesque subito morituros, nisi antiquos deos sacrificiis et muneribus solitis placare studerent. Ad hanc vocem statim conventus forenses aguntur; simulacra requiruntur; et in commune profanus sacrificiorum ritus ac celebritas repetitur; ecclesie Christi ex media parte destruuntur. Cumque ad sanctuarium plebs furibunda venisset, non ausa ulterius progredi, summum ydolorum pontificem sic tumultuoso strepitu alloquitur: *Ecce, quod nostrum erat, exsecuti sumus; tuum est istud caput et culmen Teutonici dei pro officio tuo aggredi et profanare.* Ille autem, arrepta securi cum alcus dextram librasset, subito dirignit et, resupinus corruens, clamore lamentabili dolorem suum protestatus est. Accurrens vulgus causam doloris requirit. At ille graviter ingemiscens: *Heu proh dolor inquit quante potentie, quante fortitudinis est Teutonicus deus; et quis resistet ei? Ecce ego, quia sacram eius edem contingere presumpsi, quomodo percussus sum!* Illis vero attonitis et quid agerent inquirentibus,

pontifex eorum: *Edificate ait hic domum dei vestri iuxta edem* 1125-1126 *Teutonici dei; et colite eum pariter cum diis vestris, ne forte indignatus interitum huic loco quantocius inferat.* Qui precepto eius paruerunt. Et usque ad reditum piissimi apostoli sui Ottonis in hoc errore permanserunt.

2. Sed interim non destitit divine pietatis providentia, que semper conversionem errantium desiderat, paterna eos lenitate redarguere per quendam potentissimum de civibus suis Wirtschachum^a nomine, mirabiliter ab hostium captivitate et maris periculo liberatum. Quod nullatenus silencio pretereundum est; maxime cum per, absentem licet, beatissimum Pomeranice gentis apostolum tam evidens miraculum Christus operari sit dignatus.

Siquidem orientalis est regio barbarorum Pomerania, habens ex latere provinciam Danorum, mari interiacente. Tantaque est maris latitudo, utramque dividens regionem, ut, qui in medio navigans serenissima die positus fuerit, vix provincias has ad instar parvissime nubis considerare valeat. Hic itaque civis Stetinensis, gloria et divitiis inter suos opinatissimus, frequenter in provinciam Danorum navigare et predam ex ea agere solebat; sicut et illi e contra in Pomeraniam crebras incursiones piraticas faciebant. Sed eo tempore, quo civitas sua apostasiam, ut prediximus, incurrerat, idem prepotens vir Wirtschachus^b copioso sex navium apparatu Danos sibi infensos petebat et, non previsas incidens insidias, cum omnibus suis captus est. Sociisque crudeliter strangulatis, ipse solus carceri traditur, collo pectore manibus pedibusque gravi catenarum nexu, questus dumtaxat gratia, compeditus. In hac artissima reclusione positus singulisque momentis, quando ad mortis atrocissime supplicium traheretur, suspectus, piissimi apostoli sui memoriam revolvere cepit, a quo ipse dudum de sacro Christi fonte susceptus erat. Et salubri lacrimarum imbre perfusus, hanc supplicem Domino ex omnibus cordis medullis profudit orationem: *Domine Deus omnipotens, qui nos ad cognitionem nominis tui per os sancti*

a. Wirtiscum E.

b. Wirtiscus E.

1125-1126 *patris nostri Ottonis episcopi venire tribuisti, miserere et succurre michi in hac tribulatione per eius beatissima merita, qui me, licet indignum, de sacro nove regenerationis lavacro suscepit; ut, si vera sunt omnia, que ex ore eius de tua inestimabili pietate audiui, nunc, in tam horrenda mortis imagine positus, experiar. Et tuo munere absolutus, deinceps ab hac piratica invasione desistam; tueque religioni debita devotione iugiter inheream. Hec cum dixisset, ex multa meroris et inedia defectione in sompnum resolutus est, continuoque dilectum apostolum suum Ottonem cernit pontificali infula redimitum astare et virga pastoralis latera dormientis pulsare. Qui attonitus et pre gaudio lacrimans, hac flebili eum voce compellat: O pater sancte, o serve Dei vivi, quis te sic inopinat^a his appulit horis? At ille: Propter te inquit veni; surge quantocius et sequere me. Cui captivus: Quomodo ait domine pater surgam, tantis catenarum nexibus undique irretitus? Tum pater benignus, signo crucis edito, erexit eum; statimque vincula eius, celesti virtute dicto cicius soluta, ceciderunt in terram. Cui servus Domini: Ecce ait absolvit te Christus, cui credidisti. Memento, ut, cum redieris in terram tuam, omnibus civibus tuis legationem meam perferas. Gravem quippe offensam Dei incurrerunt, pro eo quod, cultu eius neglecto, priscis ydolatrie sordibus se polluere veriti non sunt. Et nisi quantocius resipiscant, celestis ire vindictam aut hic aut in futuro seculo multipliciter incurrent. His dictis, evanuit ab oculis eius. At ille concitus egrediens cursu rapidissimo venit ad mare. Sed quid ageret dubius, intra semet ipsum variis cogitationibus estuabat, dicens: Ecce Deus per merita beatissimi patris mei Ottonis absolvit me; sed quomodo tanta maris spacia sine navi transibo? Hec animo volvens, in tetre noctis silencio aspicit modicam coram se naviculam, litori sine vectore appulsam, in qua non nisi unus homo gnarus et excercitatus in his vehi posset. Quam sine cunctatione ingressus, pelago se committit; sola fide munitus et hec secum reputans: Sapius duco in profundo maris, si sic necesse est, interire, quam*

a. opinatum C.

denuo cruentas hostium manus incidere, qui, si me, quod absit, 1125-1126 in hoc litore comprehenderint, novis et inauditis cruciatibus laniatum crudeliter strangulabunt. Sed ascendente eo in naviculam, statim Dominus ventum validissimum misit in mare, qui eum sine mora ad litus Stetinensis civitatis sine remige perduxit. Et egressus ad terram, cum lacrimis Deo omnipotenti et beatissimo patri suo Ottoni debitas gratiarum actiones exsolvit. Maximoque civium suorum gaudio et admiratione susceptus, omnem iacture et ereptionis sue ordinem eis exposuit. Qui etiam in testimonium miraculi huius naviculam ipsam in porte urbis introitu suspenderunt. Sed malis incitati sacerdotibus, legationem pii doctoris sui spreverunt, in eodem errore durantes, quoad usque presul ipse denuo eos visitans ad viam veritatis revocaret. Quod quo ordine factum sit, subsequens narratio declarabit.

3. Igitur electus Dei pontifex, audiens, inimicum bono se- 1127 mini zizania superseminasse¹, non est passus, Stetinenses claudicare in duas partes²: Domino et ydolis serviendo. Sed petita benedictione a domno apostolico Honorio et serenissimo rege Lothario, barbarorum fines rursum adire disposuit, tam pro apostatis ad sinum ecclesie revocandis quam etiam pro alia gente Uznoim³ dicta, que necdum nomen Christi audierat, iugo fidei subigenda. Preparatis itaque paterna provisione habundanter vie necessariis, pluribus etiam verbi ministris et cooperatoribus religione ac industria pollentibus adscitis, in cena Domini sa- Mart. 31 cratissima, mox post confectionem crismatis et missarum sollempnia devote peracta, ieiunus ac sandaliis sicut altari astiterat ornatus, elato crucis vexillo, iter predicationis arripuit, iuxta quod scriptum est: *Quam speciosi pedes evangelizantium pacem, evangelizantium bona*⁴. Omnibus ergo filiis suis amantissimum patrem cum lacrimis prosequentibus, et prospera ei supplici affectu inprecantibus, ipse, fide armatus et galea salutis munitus, civitatem inimici expugnare ac destruere aggressus est.

1. Cf. Matth. 13, 25. 2. Cf. 3 Reg. 18, 21. 3. habitatoribus insulae Usedom. 4. Rom. 10, 15.

1127 Primamque mansionem habuit^a in curia dominicali^b Baben-
 Mart. 31 bergensis ecclesie, que Growze dicitur; ubi autenticum manda-
 Apr. 1 tum¹ cum suis more solempni celebravit. Sequenti vero die,
 Apr. 2 post officii et sepulture Domini celebrationem inde digressus, ad
 Apr. 3 urbem antiquam vocabulo Kirchberg divertit; ubi sabbatum sanc-
 Apr. 4 tum pasche et ipsum dominice resurrectionis diem summa de-
 Apr. 5 votione peregit. Feria secunda pasche monasterium, noviter
 a se constructum, Regenheresthorf² expeciit; quod et feria ter-
 tia pasche in honore sancti Iohannis baptiste debita cum vene-
 ratione dedicavit, multum se iterque suum beato Iohanni, intimo
 Apr. 6—9 patrono suo, commendans. Post hec, tota paschali ebdomada in
 possessionibus ecclesie Schidingen³ et Muchelen^{c 4} pro necessa-
 riis vie sumptibus aggregandis occupatus, insignem illam Saxo-
 nie metropolim Magdeburg adiit, ubi a dilecto suo Noriperto
 archiepiscopo honorifice susceptus est.

Sed quia semper gloriam sequitur emulatio, idem archiepi-
 scopus, cernens eum de tam longinqua regione ad officium pre-
 dicationis supervenire, et pudore actus, quod ipse, in civitate
 gentium barbararum positus, nil tale aggredi presumpsisset, in-
 vidia stimulante, pium doctorem aliquamdiu retardare voluit.
 Sed ipse, fervens in spiritu, nullatenus a bono proposito revo-
 cari potuit. Itaque, petita ab eo benedictione, postera die
 Habelbergense episcopium peciit; quod tunc paganorum crebris
 incursionibus ita destructum erat, ut christiani nominis vix te-
 nues in eo reliquie remanserint. Nam ipsa die adventus eius
 civitas, vexillis undique circumpositis^d, cuiusdam ydoli Geroviti
 nomine celebritatem agebat. Quod vir Domini ut advertit, cor-
 detenus pro tali errore compunctus, urbis menia ingredi recu-
 savit. Sed ante portam consistens, Wirikindum, eiusdem loci
 dominum, accersivit et, cur hanc ydolatriam exerceri pateretur,

a. *om. C.* b. *om. B.* c. Mûchelim *C.* Muchelen *B.* d. circumposita *CB.*

1. i. e. ablutionem pedum, quae fit in coena Domini inter canendam
 antiphonam: „Mandatum novum do vobis“. V. Missale Romanum: Feria
 quinta in coena Domini. 2. Reinsdorf, a Querfordia ad meridiem.
 3. Scheidungen inter Naumburgum et Querfordiam. 4. Mûcheln, a
 Merseburgo inter occidentem et meridiem.

obiurgavit. Qui protestatus, plebem archiepiscopo suo Noriperto 1127
 rebellem, eo quod duriori servitutis iugo eam subiugare temp- Apr.
 taret, nullo modo cogi posse fatebatur, ut ab eo doctrine verbum
 reciperet; sed prius mortis occasum quam servitutis huiusmodi
 onus subire paratam esse. Idem vero Wirikindus supplicabat epi-
 scopo: ut eidem civitati errorem suum pandere non abnueret;
 dicens, monitis eius multo ardentius plebem quam archiepiscopi
 sui iussionibus obaudire. Qui stans in edito^a ante portam ci-
 vitatis, omni populo coadunato verbum salutis predicabat; et
 abdicationem huius sacrilege celebritatis facile apud eos obtinuit,
 protestantibus eis: etiam baptismi gratiam sub alio archiepiscopo
 se prompta voluntate suscepturos. Pius vero predicator eidem
 Wirikindo magnam^b auri quantitatem et coniugi eius psalterium
 preciosum, solita usus benivolentia, tribuit; ibique diversa itineri
 necessaria cum triginta plaustris comparavit. Deinde a Wiri-
 gindo exquirere cepit, si ducatum sibi per regionem suam, sicut
 in Merseburgensi oppido coram gloriosissimo rege Lothario ei
 spoponderat, prebere paratus esset. Qui abnuens respondit: eum
 per terras hostium suorum paulo post transiturum, ideoque du-
 catum ei prebere non posse; ne forte satellites sui ab eisdem
 hostibus capti et iugulati interirent.

4. Tum pater amabilis, fortissima Dei manu super se in- Apr. Mai.
 vocata, cepti itineris cursum aggressus est. Erat illic vastis-
 sima silva. Qua^c diebus quinque transmissa, venit ad stagnum
 mire longitudinis; ubi homuncionem parve insidentem navicule
 contemplatus, copiosam ab eo piscium multitudinem comparavit.
 Sed ipse, mirum dictu^d, argento multo aliisque speciebus sibi
 propositis, nil pretii nisi tantum sal accipere consensit. Dicebat
 enim: septennio se panem non gustasse, sed piscibus tantum et
 aqua stagni illius vitam alere inopem. Siquidem, capta a duce
 Polonie eadem provincia, ipse cum uxore sua fugiens, securi et
 ascia sua assumpta, parvam in medio stagni ipsius planiciem
 invenit; ubi edificata domuncula secure habitabat, tantamque sic-
 catorum piscium multitudinem estivo tempore congregabat, ut

a. *sub* in edito *puncta posita sunt in C.* b. magni *C.* c. qui *C.* d. dicto *C.*

1127 tota hieme superhabundaret. Quibus etiam condiendis non par-
Apr. Mai. vam salis quantitatem a bono predicatore coemit.

Erat etiam illic barbarorum natio, que Moriz vocabatur. Hec, audita beati presulis opinione, ultro se fidei sacramentis ab eo imbui expetebat. Sed ipse, ut vir prudens et sagacissimi ingenii, ad Noripertum archipresulem suum eos dirigebat; dicens: illicitum esse super alienum fundamentum edificare; se potius ad remotiores gentes edicto domni pape et litteris Wortizlai ducis Pomeranie evocatum. At illi, Magdeburgensem^a pontificem se nolle sequi protestantes, quia gravissimo servitutis iugo eos opprimere niteretur, ei, tamquam Dei pio servo, cervicem cordis humiliter submittere et dictis eius per omnia obaudire pollicentur. Quorum devotionem intuens, benigne respondit: se quidem interim ad gentes sibi commissas tendere; sed post earum conversionem, si in hac voluntate persisterent, auctoritate et permissu domni pape atque consensu Noriperti archiepiscopi eos inpigre visitaturum.

5. Igitur veniens ad urbem Timinam^b, magnum illic belli apparatus hostilemque Luticensium incursionem reperit. Nam Luticenses, quorum civitas cum fano suo a gloriosissimo rege Lothario zelo iusticie nuper igni erat tradita, urbem Timinam vastare civesque eius captivare nitebantur. Sed ipsi, eis viriliter resistentes, Wortizlai ducis auxilium requirebant. Dux vero beato patri nostro, adventum suum illic prestolari, mandaverat; quem etiam per biduum non sine periculo capitis sui inter hostiles discursus exspectabat. Ipsa vero die adventus presulis eximii cives Timinenses ante portam conventus forenses agebant. Sed quia civitas in valle posita erat, ipso de montibus cum tam copioso triginta plaustorum apparatu descendente, plebs omnis, tumultuoso hoc perterrita sonitu hostiumque cuneos super se arbitrata irruere, urbem quantocius ingredi seque ad resistendum preparare molitur. Appropinquante servo Dei, nichil armorum in circuitu eius sed potius vexillum crucis deprehen-

a. Megedeburgensem C.

b. Timynan C, Tyminan B.

1. Demmin.

dunt; statimque pium Ottonem, fama apud eos celeberrima vul- 1127
gatum, agnoscentes, alacri devotione occurrunt meniaque civi- Apr. Mai.
tatis intrare deposcunt. Qui, rennuens urbem ydolatrie sordibus
pollutam ingredi, ante portam fixis tentoriis habitabat; interim-
que accersitos ad se primates plebis ad fidei christiane et la-
vacri salutaris gratiam mira predicationis dulcedine provocabat.
Sed antiquus hostis, cernens illic dominica lucra suaque detri-
menta succrescere, invidiam erga Dei famulum habitam celare
non passus est; sed, inmisso quodam fallaci terrore, eum a fini-
bus illis propellere nisus est. Sequenti etenim nocte dux
Pomeranie in auxilium Timinensium cum duobus exercitibus, id
est navali et equestri, supervenit. Et equester exercitus prior
occurrere debuerat; sed ventus rapidissimo cursu navim inpel-
lens celerius litori appulit. Equester vero exercitus, postea ve-
niens sociamque turmam, quam se tarde secuturam sperabat,
illic inveniens, suspicatus est, hostilem cuneum se incurrisse,
eo quod tetra noctis ingruerit caligo; statimque clamor confusus
et tumultus importabilis utrimque exoritur. Universus pii pre-
sulis comitatus, nimio terrore percussus, ad fugam semet invicem
cohortatur; affirmante domno Albwino^a interprete viri Dei: pa-
ganorum Luticensium adesse catervam et iam cede miserabili
ducis exercitum laniare. Doctor vero eximius eundem Albwinum
religiosum presbiterum illuc celeriter pro investiganda rei veri-
tate transmisit. Qui, flumini concitus se iniciens, eo quod na-
tandi peritus esset, pacata iam omnia reperit, quia exercitus
illi cives se tandem recognoverant¹; et diabolico errore se pre-
ventos asserebant. Dux autem Wortizlaus, de adventu pii pa-
storis ultra quam credi potest gratulatus, mandat ei: sine mora
in ulteriorem sibi ripam occurrere; dicens, divini esse miraculi,
quod biduo ibi inter tam crebras hostium discursiones illesus
permansit. Et re vera, nisi validissima Dei protectione tanquam
scuto inexpugnabili obumbratus fuisset, cum omni suo comitatu
nullo resistente interisset. Mox autem, ut terris dies est red-

a. Alwino *C hoc loco*.

1. exercitus illi duo cognoverant, se cives (concives) esse.

1127 ditus, dux cum exercitibus suis rebellium Luticensium terras
 Apr. Mai. invadens cuncta ferro et igni vastat. Ad vesperum vero magna preda onustus rediens, karissimum sibi patrem Ottonem debita cum reverentia Uznoim' perduxit; ubi oportunam manendi et predicandi quietem habebat.

Mai. 22 6. Statimque in festivitate penthecostes generale principum regni sui colloquium in eodem loco indixit. Ubi convenientibus Timinensis civitatis aliarumque urbium primoribus, sapienter eos ad suscipiendum christiane fidei iugum provocabat. Ipse enim in puericia sua captivus erat in Teutonicas regiones abductus, atque in oppido Mersburgensi baptismi gratiam consecutus; sed inter paganos vivens, ritum christiane legis exequi non poterat. Ideoque gentem, cui preerat, fidei iugo subici ardentem desiderabat. Considentibus ergo principibus, dux ita exorsus est: *Cernitis dilectissimi, quomodo pater hic beatissimus, etiam canicie venerandus, pro salute vestra omnem gloriam et magnificentiam, quam apud suos habebat, reliquerit. Et cum periculo capitis sui longinquas^a sibi ignotas adiit regiones; nec propriis sumptibus nec canis suis pro Dei amore parcens, sed in morte animam suam ponens, ut vos a morte ad vitam revocaret, arduam difficilemque nimis hanc peregrinationem subire non dubitavit. Antea quidem multi verbum Dei his partibus annunciantes venerunt, quos instinctu sathane occidistis. E quibus etiam unum nuper cruci fixistis; sed ossa eius capellani domini mei episcopi digna reverentia colligentes honorifice tradiderunt sepulture. Hunc autem reverentissimum dominum meum episcopum, fama celeberrima ubique vulgatum, non sic tractare debetis nec potestis. Quia missus est pape et dilectus domini nostri Lotharii regis invictissimi. Nam et ipse Romani imperii princeps et cuncti primates, loco patris eum venerantes, consiliis eius obaudire per omnia satagunt. Unde sciatis procul dubio, quia, si quicquam molestie aut controversie ei a vobis irrogari dominus rex audierit, sine mora cum exercitu superveniens, usque ad internicionem delebit vos*

a. longinquam C.

1. Usedom.

et terram vestram. Non est meum, ad hanc vos religionem co- 1127
gere; quia, ut ex ore domini mei episcopi audiui, non vult Deus Mai. 22
coacta servicia sed voluntaria. Quapropter, unanimi consilio in-
ter vos secreto convenientes, salutis vestre causam agite et, quali
devotione hunc reverentissimum Dei servum vestrumque aposto-
lum suscipiatis, in commune decernite. His auditis, principes
 et natu maiores, oportuno huic colloquio locum petentes, diu
 multumque ancipiti sententia nutabundi^a oberrabant, precipue
 sacerdotibus ydolorum questus sui gratia contradicentibus. Sed
 pars sanioris consilii affirmabat: infinite nimis esse insipientie —
 cum omnes circumiacentium nationum provincie totusque Roma-
 nus orbis christiane fidei iugum subierit — se velut abortivos
 gremio sancte matris ecclesie abalienari; meritoque diligendum
 christianorum Deum, qui per tot annorum curricula eos sibi re-
 belles pertulerit, pacienter expectans conversionem eorum; ni-
 misque verendum, si amplius iugum eius detrectaverint, celestis
 ire importabilem sese vindictam incurrere. Tandem, divina pre-
 veniente clementia, unanimiter cultum ydolorum abdicarunt et,
 fidei iugo colla submittentes, baptismi gratiam flagitare ceperunt.
 Quo audito, pastor piissimus flens pre gaudio positisque genibus
 intimas Deo gratiarum actiones exsolvit.

7. Mox igitur in eadem civitate baptizatis principibus uni-^{post Mai. 22}
 versis, binos et binos e presbiteris sibi adherentibus ad alias
 urbes ante faciem suam premisit, ut populo conversionem prin-
 cipum suumque adventum denuntiarent. Quorum duo, id est
 Udalricus religiosus presbiter Sancti Egidii et supra dictus Alb-
 winus, interpret viri Dei, opulentissimam civitatem Hologost¹
 dictam adierunt. Ubi a matre familias, uxore scilicet prefecti
 urbis, honorifice suscepti sunt; ita ut pedes eorum summa hu-
 militatis devocione lavaret statimque, mensa apposita, copiosis-
 simis eos dapibus reficeret; mirantibus eis et admodum stupen-
 tibus, quod talem in regno diaboli humilitatis et hospitalitatis
 gratiam invenissent. Tandem finita refectione, domnus Alb-
 winus matrem familias secrecius alloquens, indicavit ei causam

a. nutabundi C.

1. Wolgast.

1127
post Mai. 22

adventus sui, et qualiter ad colloquium Uznoim habitum cuncti principes, abdicatis ydolatrie sordibus, Christi gratiam induerint. Hec illa audiens adeo expavit, ut, terre procumbens, diu semianimis remanserit. Quam aqua refocillatam domnus Albwinus requirere cepit: cur Dei gratiam adeo exhorruisset, cum magis letari debuerit, quod Deus visitavit plebem suam, mittendo ei tam idoneum verbi ministrum. At illa: *Non pro hoc ait obstupui; sed magis pro nece vestra iam iamque imminente contremuit cor meum. Nam magistratus civitatis huius cum omni plebe dispositum habet, ut, si uspiam apparueritis, sine retractione^a occidamini. Et hec domus mea, semper quieta et pacifica, omnibus peregrinis supervenientibus hospitalis fuit, nunc vero sanguine vestro contaminanda erit. Re vera namque, si aliquis magistratuum introitum vestrum huc deprehendit, hac hora domus mea obsidione vallabitur; et ego infelix, nisi vos tradidero, igni cum omnibus meis concremabor. Ascendite ergo in superiora domus mee ibique latitate. Et ego ministros meos cum exuviis vestris atque caballis ad remotiores villas meas dirigam; ut, si venerint inquisitores, libere vos excusare possim, cum nec indumenta vestra nec caballi apud me deprehendantur. Illi vero, pie eius provisioni gratias agentes, fecerunt ut docti erant. Statimque ministris caballos eorum et vestes abducentibus, post modicum^b plebs furibunda irrupit; omniaque scrutantes, peregrinos illic ingressos violenter ad mortem expetebant. Quibus mater familias: *Fateor; ait domum meam ingressi sunt¹; et sufficienter refecti velocius abierunt. Et ego, qui vel unde essent aut quo tenderent, explarare non potui. Sequimini autem; et forsitan comprehendetis eos². Illi vero: Si inquit^c abierunt, vanum est eos insequi; sed viam suam pergant; et si denuo hic apparuerint, morti se procul dubio involvendos sciant. Et sic inquisicio eorum Dei nutu cassata est; servique Dei Udalricus et Albwinus in solario³ matrone illius, velut alterius Raab, absconditi latuerunt.**

a. retractione C.

b. modūcū C.

c. inquit C.

1. Iosue 2, 4.

2. Iosue 2, 5.

3. Iosue 2, 6.

8. Causa autem huius inquisitionis et tumultus sacerdos 1127
 quidam ydolorum fuit. Qui, audita nove predicationis opinione, post Mai. 22
 ad callida argumenta conversus, cuiusdam fani clamide et reli-
 quis indutus exuviis, urbem clam egreditur^a vicinamque petens
 silvam pretereuntem quendam rusticum insolito occursum per-
 terruit. Qui, videns eum vestibus ydoli amictum, suspicatus,
 deum suum principalem sibi apparuisse, pre stupore exanimis
 in faciem corruit, eumque talia dicentem audivit: *Ego sum deus
 tuus, quem colis. Ne paveas; sed surge quantocius, urbemque
 ingrediens, legationem meam magistratibus omnique populo in-
 sinua; ut, si discipuli seductoris illius, qui cum duce Wortizlao
 apud Uznoim moratur, illic apparuerint, sine dilatione morti
 acerbissime tradantur. Alioquin civitas cum habitatoribus suis
 peribit.* Quod cum rusticus ille summa festinatione civibus de-
 nuntiasset, illi, unanimiter adunati, mandatum dei sui peragere
 conabantur. Sed, ut prediximus, divina providentia servos
 suos abscondit; donec sequenti die pius Otto episcopus, cum
 duce superveniens, eos a latibulis produxit. Sed nec in ipsa
 die adventus episcopi temptatio, per invidiam diaboli servis Dei
 inmissa, defuit. Advesperascente namque die, quidam ex
 comitibus domini episcopi, fanum in eadem urbe situm conside-
 rare volentes, minus caute pergebant. Quod cernentes aliqui de
 civibus, suspicati sunt, fanum ipsum igni eos tradere velle; et
 congregati horrissono armorum strepitu eis occurrere gestiebant.
 Tum religiosus presbiter Udahricus ad socios conversus ait:
*Non sine causa congregantur isti; sed sciatis, eos re vera ad
 interitum nostrum festinare.* Quo audito socii, retrogradum iter
 secuti, fuge presidia petunt. Clericus autem Dietricus nomine,
 qui iam, precedens eos, portis delubri ipsius appropinquaverat,
 nesciens quo diverteret, audacter fanum ipsum irrupit; et videns
 aureum clipeum parieti affixum, Gerovito qui deus milicie eorum
 fuit consecratum — quem contingere apud eos illicitum erat —
 arrepto eodem clipeo, obviam eis processit. Illi autem, utpote
 viri stulte rusticitatis, suspicati, deum suum Gerovitum sibi oc-

a. ingreditur C.

1127 currere, obstupefacti abierunt retrorsum et ceciderunt in terram.
 post Mai. 22 Dietricus autem, videns amentiam eorum, proiecto clipeo, aufugit; benedicens Deum, qui de manibus eorum liberare dignatus est fideles suos.

9. Apostolus itaque Pomeranorum, totam instantem ebdomadam in eadem civitate verbum fidei disseminans, baptismi gratiam tradens, Iohannem religiosum presbiterum eis prefecit. Sicque aliam urbem Chozegowam¹ expetiit, in qua magni decoris et miri artificii fana erant, que cives eiusdem loci trecentis exstruxerant talentis. Sed et beato patri nostro maximam pecunie quantitatem offerebant, ne ea deleteret, sed pro ornatu loci integra et inconvulsa reservaret. Quod vir Domini penitus abdicavit, seque nullo pacto sacrilegas edes reservare affirmabat; dicens: post discessum suum materiam apostasie causamque ruine infirmis exinde generari; seque huius delicti reatu nolle apud Deum obligari.

Magnam vero predicationi sue auctoritatem dabat, quia — cum Dominus ordinasset his, qui euangelium annunciant, de euangelio vivere² — ipse iuxta apostolum non est usus hac potestate. Quin immo propriis se comitesque suos transigebat sumptibus. Quos statuto tempore ex villis episcopii per fideles nuntios sibi deferri, paterna provisione sollerter disposuerat; omnem derogandi occasionem invidis auferre satagens; ne forte reputarent, eum causa inopie tam remotas adisse regiones; quasi, in terra sua ingruente rerum victualium penuria, in hec opulentissima regna secedens, sub pretextu euangelizandi vite sustentacula argumentose requireret. Quod prudenter animadvertens vir sagacissimi ingenii, numquam ab eis, quibus spiritualia seminabat, carnalia metere volebat; sed nec loco muneris quicquam ab eis percipere consensit. Si vero a primoribus, sibi fidelissima familiaritate adherentibus, quicquam voluntarie offerretur et, ut id susciperet, multa precum instantia constringeretur, ipse, de suis preciosa quolibet eis honorabiliter offerens, maiora dabat quam acceperat; exemplo Salomonis, qui regine

1. Gützkow.

2. 1 Corinth. 9, 14.

Saba^a, diversas munerum species offerenti, multo plura dedit, 1127 quam ab ea consecutus fuisset¹. Unde etiam pater hic beatus libentissime ab omnibus audiebatur; quia cernebant: eum, tantis redundantem mundialium rerum copiis, pro sola Christi dilectione, non lucri alicuius gratia, officium predicationis arripuisse.

10. Eo igitur tempore, quo fana hec mirandi operis in urbe Chozegowa destruebat, legati honorabiles marchionis Adalberti, statum eius curiose investigantes, sed et nuncii de villis suis Mûcheln^b et Scidingen, iuxta condictum oportuna ei subsidia deferentes, supervenere. Et videntes, gratiam Dei ecclesiamque illic crescere et confortari, gaudio magno et consolatione sancti Spiritus replebantur. Et re vera iocundum erat spectaculum, cum simulacra mire magnitudinis et sculptoria^c arte incredibili pulchritudine celata, que multa boum paria vix movere poterant, abscisis manibus et pedibus, effossis oculis ac truncatis naribus, per descensum^d cuiusdam pontis igni cremanda trahebantur; astantibus ydolorum fautoribus et magno eiulatu, ut diis suis succurreretur ac iniqui patrie subversores per pontem demergerentur, acclamantibus; aliis vero sanioris consilii e contra protestantibus: quia, si dii essent, semet ipsos defendere possent, sed cum ipsi taceant nec de loco nisi tracti moveantur, omni sensu ac vitali spiritu penitus carere probentur. Sacerdotes vero ydolorum seditionem conflare moliebantur questus sui gratia. Nam, ut in Daniele propheta² legimus, cotidie fercula et pocula diversi generis copioso apparatu simulacris illis vasta mole prominentibus exhibebantur; que omnia sacerdotes cum amicis suis, clanculo ingressi, absumebant et a diis commesta asserebant.

11. Sed non pretereundum videtur, quid miraculi in destructione fanorum ipsorum apparuerit. Subito enim, astante populi frequentia, insolite magnitudinis musce, que nunquam in terra illa vise sunt, magno impetu ex delubris ydolorum proruperunt, et tanta densitate omnem civitatis ambitum operiebant,

a. Sabba C. b. Mûcheln C. c. sculptoria CB. d. decensum C.

1. 2 Paral. 9, 12.

2. V. Dan. 14, 12.

1127 ut pene lucem diei tetra caligine obducere viderentur; sed et oculos et labia universorum nimia importunitate vexantes, non parvum horrorem aspicientibus ingerebant. Sed cum violentis manuum percussionibus abigerentur, nichilominus tamen diucius insistebant; donec fidelibus laudes Dei concrepantibus crucisque vexillum circumferentibus, invisum monstrum, portis apertis evolans, terram barbarorum qui Rūtheni¹ dicuntur pernici velocitate peciit. Unde cunctorum sapientum iudicio definitum est, non aliud hoc portentum nisi demonum expulsionem presagare, [quorum^a princeps erat Beelzebup², id est vir muscarum]; qui, christiani nominis choruscantem per novos doctores gratiam non ferentes, negata sibi in his regionibus mansione, Rūthenos, adhuc paganico errore irretitos, adiere.

12. Pius itaque predicator, destructis ydolorum fanis et populo sacre regenerationis lavacro in sinum matris ecclesie congregato, novam Christo edificare cepit basilicam. Ad cuius dedicationem cum loci eiusdem princeps Mizlaus nomine venisset, qui dudum cum aliis primoribus ad curiale colloquium in penthecoste Uznoim habitum baptismatis gratiam perceperat, his eum beatus pontifex verbis per interpretem suum Adalbertum, postea episcopum, allocutus est: *Fili karissime, quem ego Christo domino per euangelium genui, dedicatio hec exterior interiorum tui cordis dedicationem futuram significat. Tu enim es templum Dei, ubi Christus per fidem inhabitare dignatur³; et si domum cordis tui sic ornare volueris, ut Deo, qui inspector eius est, mansio illa placeat, cum gaudio spirituali hanc exteriorum peragere potero dedicationem.* Qui, compunctus his beati patris et apostoli sui verbis, flebili voce respondit: *Quid me, pater sancte, vis agere, ut Deus domum pectoris mei visitare dignetur?* At ille: *Hoc est ait quod moneo: ut secreta conscientie tue scruteris et, si cui aliquid per violentiam rapuisti, digne restituas; si quos causa pecunie captivasti, pro honore Dei absolvas.* Tum ille: *Nemini inquit violentiam exhibui; sed cap-*

a. quorum — muscarum add. E.

1. incolae Rugiae insulae.

2. Cf. Matth. 12, 24.

3. 2 Cor. 6, 16.

tivos multos penes me habeo graviter michi obnoxios. Cui vir 1127 Domini: *Require ait si qui inter eos sint christiani.* Et cum requisisset, invenit plures ex Danorum regione christianos; quos statim beato patri nostro omni debito absolutos obtulit. Ad quod servus Dei gratulatus: *Quia ait cepisti, perface gratum Domino sacrificium, ut paganos etiam captivitate depressos, quo facilius iugo fidei colla submittant, absolvas.* Et ille: *Multorum inquit criminum rei sunt isti et dampna michi non ferenda intulerunt. Sed ne dedicationis huius gaudia quolibet merore obnubilentur, iuxta verbum tuum, pater amantissime, absolvantur.* His auditis, doctor piissimus cum lacrimis gratias agens: *Nunc ait acceptabilis erit Deo hec dedicatio, quia hospicium cordis tui hoc pietatis opere ad inhabitandum Domino dedicasti.* Et hec dicens solempnia dedicationis ecclesie exorsus est.

Nutu autem Dei ex improvviso cineres¹ defuerunt; et iurantibus ministris, pridie^a se eos in circuitu altaris collocasse, mirum in modum nec signum excussionis² uspiam inveniri potuit. Tunc religiosus presbiter Uodalricus, spiritu Dei actus, ad subterraneum quoddam habitaculum pro cineribus colligendis velocius abiit. Cuius introitu audito, captivus illic latitans vocem cum gemitu emisit et^b manum de cavea protraxit. Obstupefactus servus Dei Udalricus accessit videre, quidnam hoc esset; viditque iuvenem miserabiliter^c collo pectore ac pedibus ferro inclusum. Et accersito interprete, hec ab eo audivit: *Serve Dei, miserere mei; et mitte manum tuam, ut educas me de gravissimo huius captivitatis iugo. Ego enim sum filius nobilissimi Danorum principis; et dux Mizlaus pro quingentis marcis, a patre meo sibi dandis, hic me inclusum retinet.* Quo audito,

a. pridie scripsi pro pridem. Cf. n. 2 et infra: cineres hesternae die hic repositi.

b. om. C.

c. mirabiliter CE.

1. V. Pontificale Romanum; De ecclesiae dedicatione: „Interim unus ex ministris spargit cinerem per pavementum ecclesiae in modum crucis“ cet. . . . „Tum pontifex accipit sal et miscet cineri —; Deinde accipiens pugillum de mistura salis et cinerum — ter immittit in aquam —; Deinde mittit — vinum in aquam ipsam“ cet. 2. ex vase. Pridie enim dedicationis „parantur in ecclesia, quae ad dedicationem sunt necessaria“, in his „vas cum cineribus“. V. Pontificale Romanum l. l.

1127 Uodalricus concito gradu ad episcopum rediit; et secreto eum conveniens: *Non sine causa inquit hoc impedimentum dedicationi nostre accidit; quia nutu Dei ego in reclusionem gravissimam filium principis Danorum inveni, dum pro cineribus colligendis abissem; et non poterit dedicatio rata esse, nisi hic cum reliquis absolvatur.* Cui episcopus: *Iam ait tanta prestat nobis, quod non presumo eum amplius interpellare; quoniam re vera nec in Teutonicis regionibus quisquam principum hoc facile ageret. Sed si vultis, secreto eum per vos convenite; et forsitan acquiescet vobis, licet grave sit negotium.* Uodalricus itaque, assumpto interprete suo Adalberto, de turba eduxit Mizlaum principem; et primum pacis Christi verbo eum^a salutans, requirit: si omnes captivi eius relaxati essent. Quo dicente: *Etiam, Adalbertus interpres: Cur fallere conaris Christum, qui falli non potest? cur apostolum eius negando et dissimulando contristas? Ecce impedimentum dedicationi huic tua dissimulatione fecisti. Siquidem cineres, hesternam die hic repositi, nutu divino hodie disparuerunt. Et dum karissimus domini mei capellanus Uodalricus, non casu sed Deo sic disponente, ad requirendos cineres abisset, invenit captivum tuum, quem Deo, cui omnia patent, occultare voluisti.* His auditis, obstupefactus princeps: *Hic ait captivus singulariter michi pre omnibus aliis obnoxius est; ideoque suppliciter peto, ne causa eius manifestetur; sed magis in subterraneo habitaculo, ut dignus est, reservetur.* Cui servus Dei Uodalricus: *Absit inquit ut tanta pietatis opera, que Deo exhibuisti, ita ut ipsi etiam domino meo episcopo admirationi sis et honori, hac una crudelitate pereant. Sed re vera scias, quia sacratissime dedicationis huius gaudia nullatenus consummari poterunt, nisi, et hunc cum ceteris absolvens, gratum Domino sacrificium obtuleris.* Et ille: *Quid ergo fiet ait de quingentis argenti talentis, a patre ipsius pro incomparabili dampno michi illato exsolvendis?* Ad quod famulus Dei: *Non inquit tanta super hoc affligaris molestia; habet Dominus, unde tibi in centuplum hec restituat.* Tunc demum

Mizlaus princeps, Dei preveniente gratia compunctus, totus la- 1127
 crimis est perfusus et gravi suspirio frendens in semet ipso:
*Deum ait testem invoco: quod, etsi corpus meum pro nomine
 eius martirio consecrarem, non amplius quid nec animo meo
 gravius agere possem, quam quod hunc tanto michi obnoxium
 debito, quem nullo pacto relaxari decreveram, nunc animo meo
 violenter reluctans, pro honore Dei omnipotentis et amore do-
 mini mei episcopi absolvo.* Statimque missis militibus suis, de
 ergastulo tenebroso eum produxit et sic cathenis undique
 astrictum manibus suis altari consecrando superponens, holo-
 caustum in odorem suavitatis obtulit Domino. Et mox vincula
 eius solvi mandavit, cunctis qui aderant pre gaudio flentibus
 Deumque pro tanta eius devocione benedicientibus. Tunc
 demum venerabilis pontifex Christi solempnia dedicationis ec-
 clesie letiori, quam ceperat, et diligentiori executione adim-
 plevit.

13. Sed hec gaudia antiquus nostri generis inimicus non
 equis aspiciens oculis, utpote cui innumera captivitatis vasa¹
 illic per beatum presulem erant erepta, omnibus modis hec
 leta christiane sationis semina zizaniis seditionum et externorum
 incursu bellorum turbare molitus est. Dux enim Poloniorum
 nomine Polizlaus, ante adventum patris nostri Ottonis graviter
 a gente Pomeranorum offensus, expeditionem suam illo cum
 manu valida indixit. Quo nuncio gens illa, noviter fidei sacra-
 mentis iniciata, non mediocriter est perterrita. Et primates
 natuque maiores, unanimiter ad apostolum suum velut tutissi-
 mum confugientes asyllum, eius magnopere flagitabant consilium,
 dicentes: *Tu, domine pater, nobis christiane fidei iugum sub-
 euntibus libertatem firmissimamque pacem in verbo Dei promi-
 sisti. Et ecce fratres nostri Polonienses inter ipsa fidei pri-
 mordia, rupto pacis federe, bellum nobis indicunt populumque,
 nuper baptismi lavacro mandatum, humani sanguinis effusione
 iterum polluere conantur. Sed absit, ut te presente ecclesia
 Christi hic collecta dispergatur, cum pax in ingressu tuo in*

1. Marc. 3, 27. Cf. Bibl. rer. Germ. T. II 634 n. 13.

1127 *istam intraverit provinciam. Quibus auditis, pater piissimus, lacrimas ab oculis distillans: Nolite ait timere. Potens est Deus meus, cui credidistis ad introitum humilitatis mee, causas belli huius precipere pacemque desideratam novo ovili suo restituere. En ego ipse animam meam pro vobis morti dare paratus sum; vos tantum religioni, quam didicistis, operam date^a. Ego cum comitibus meis ducem Poloniorum adeam eumque ab intentione bellandi, Deo auxiliante, avertam. At illi, pedibus eius provoluti, debitas gratiarum actiones exsolvebant.*

Et confestim dispositis vie sociis, Udalricum religiosum presbiterum vice sua ad confirmandam neophitam plebem Uznoim reliquit; ipse vero ad ducem Poloniorum inpigre, ut condixerat, ire cepit. Cuius adventu dux comperto, celerius ei debita cum reverentia occurrit, omnique humanitatis officio, ut par erat, fovere non desiit. Nam antea etiam familiariter eum notum habebat. Agnitis vero causis itineris, admodum obstupuit; dicens: gentem illam beluine ferocitatis immanitate terram populumque suum devastasse, adeo ut etiam parentes suos e sepulchris protraheret et collis caputibus dentes excuteret ossaque eorum per publicum aggerem^b dispergeret; mirumque esse, quod ipse vivus discerptus non fuisset ab eis, cum omnes anteriori tempore Christum illic annunciantes mortis sententiam incurrissent sed et^c unus eorum crucis patibulo nuper affixus occubuisset. At ille, Dei protectione et Romani principis respectu ac defensione Wortizlai ducis se munitum protestatus, gratia Christi gentem illam aiebat initiatam; seque ad hoc venisse, ut incursionem bellorum ab ea, que pacem Dei receperat, amoveret, ne novus grex inter ipsa fidei primordia turbatus a recto tramite exorbitaret. Dux autem Polizlaus respondit: non ex facili sibi constare, ut expeditionem illam, tanto tempore propositam, intermitteret; sed pro nichilo se deinceps ab omni populo suo habendum, si Pomeranorum ducem tam graviter sibi obnoxium debito talione non repercuteret; seque Deo

a. dare C.

b. agerem C.

c. et addidi.

gratias agere, quod servus Dei ab eis secessisset, quia eo pre- 1127
sente bello infensam sibi gentem obpetere nequiret. Cui epi-
scopus: *Etsi ego ait recessi, sed Uodalricus dilectissimus capel-
lanus meus ibi remansit, quem pro confirmanda et consolanda
plebe neophita illic reliqui; et non minori pro eo quam pro
memet ipso angor sollicitudine. Noveris ergo, fili karissime,
quia, si novam Christi sponsam hoc impetu belli conquassatam
fidei iugo abalienaveris, in tremendo examine rationem Deo po-
siturus eris; sed et ego pro ovibus michi creditis mortem exci-
pere paratus sum.* Ad hec ille: *Si inquit humiliatus Pome-
ranorum dux per semet ipsum michi occurrere et veniam de-
precari voluerit, faciam secundum verbum tuum. Testorque
Deum celi, quod nec domino meo regi Lothario in tam grandi
negocio annuerem; sed nunc honoravi faciem tuam et reveren-
dam canitiem, quam pro amore Dei in tam remotas barbarorum
regiones fatigare non dubitasti.* Mox ergo legati honorabiles,
Wortizlaum ducem et Uodalricum capellanum accersientes, di-
riguntur, data eis prius firmissime pacis desiderata securitate.
Qui, trium dierum itinere confecto, Poloniam venerunt et, hono-
rifice cum suo comitatu suscepti, causam pro qua venerant
tractare ceperunt. Sed per duos dies interminatam reliquerunt;
tercia tandem die, Domino opitulante et pio Ottone mediante,
reconciliati pacis oscula libant et, abdicata bellandi intentione,
fedus intemerate dilectionis ambo duces coram primatum et
nobilium frequentia pepigerunt. Ipse quoque dux Pomera-
norum in testimonium devotionis sue magnam pecunie quanti-
tatem super altari beati Adalberti martiris, canonicorum illic
Deo servientium usibus profuturam, obtulit; multumque se ora-
tionibus eorum commendans, itinere quo venerat cum pio Ot-
tone universoque comitatu Uznoim reversus est. Plebs ergo
nuper Christi legibus dicata, pro concessa a Deo pacis securi-
tate cum lacrimis gratias agens, invicem sese ad conservandam
recte fidei traditionem cohortabatur. Piusque predicator ad
circumpositas civitates verbi ministros, sicut et antea, pervigili
sollicitudine dirigebat.

1127 14. Erant autem trans mare¹ barbari crudelitate et sevicia singulares, qui Uérani^{a2} dicebantur. Hi, audita beati presulis opinionione, crebris ei legationibus mandaverant: quod, si umquam terras eorum intrare presumeret, sine mora cum omnibus suis morti acerbissime se tradendum sciret. Cumque vir Dei, fervens in spiritu, minas eorum postponeret sepiusque illo tendere disponeret, ab omnibus vitam eius desiderantibus inhibebatur. Egre tamen ferebat, quod nullus ex comitibus suis hoc opus aggredi volebat. Quod sentiens Uodalricus, religiosus Sancti Egidii sacerdos, incunctanter se huic discrimini obtulit. Cui pius Otto admodum gratulatus, licentiam et vie comites statim concessit. Adalbertus autem, viri Dei interpret, tunc non aderat; sed postea, hec addiscens, domnum episcopum omnino ab hac intentione conabatur avertere, lacrimosis eum singultibus hoc modo compellans: *O sancte pater, quid agis? Cur dilectissimum cooperatorem tuum morti destinare non metuis? Scias re vera, quod ab omnibus nobis, ut reus, mortis eius ieiunio addiceris.* Servus autem Dei subridens: *Nonne ait ipse dominus Iesus Christus discipulos suos quasi oves in medio luporum misit³? Et magister totius ecclesie, princeps apostolorum, multos e suis ad subigendam barbarorum rabiem destinavit. Sed et sanctus Clemens papa Dyonisium ariopagitam in Gallias; alique pontifices Romani dilectissimos suos evangelizandi gratia paganis direxerunt, qui ab eis iugulati occubuerunt. Nec tamen magistri eorum mortis reos se adiudicabant; quin imo glorie passionis ipsorum alacri devotione adgaudebant. Testis est michi Deus, quod pro amore eius ipse ego hanc periculosam predicationis angariam subire paratus essem. Sed quia aditum egrediendi violenter michi obstruitis, hunc adletam Christi, sponte proficisci cupientem, non aversor.* Nocte igitur insecuta Uodalricus per soporem vidit, se in atrio ecclesie sancti Egidii quasi ad pro-

a. uérani E, uerani C; cf. p. 95 n. h.

1. i. e. trans aquas, quae Haff vocantur (ab Uznoimia ad meridiem).
2. incolae eius partis marchiae Brandenburgicae, quae „Uckermark“ dicitur. Cf. supra p. 10. 3. Matth. 10, 16.

fectionem quandam procingere^a. Et cum iam portam egredi co- 1127
naretur, ancille Christi Berthrada et Wendelmut^b cum reliquis
per vestimenti fimbrias eum magno cum gemitu retrahebant nec
ullo modo portam exire sinebant. Quod cum expergefactus Adal-
berto^c interpreti retulisset, ille manifestam respondit esse visio-
nem; nec aliud praesagare, nisi quod sponse Christi, quibus in
Babenbergensi loco preerat, assiduis apud Deum precibus ob-
tinuissent, ne Ucranos^d, ubi certa mors ei imminebat, expeteret,
sed potius alumnas suas vita comite cum gaudio reviseret.
Servus autem Dei Uodalricus nullo modo ob id a bono propo-
sito revocari consensit. Sed mane facto, pio Ottoni puram agens
confessionem, arduum huius predicationis iter in remissionem
peccatorum suorum alaeri devotione suscepit. Moxque navi cum
comitibus suis et interprete quodam Poloniense, religioso viro,
impositus, cunctis ei prospera imprecantibus, Dei viri benedic-
tione munitus, navigium est aggressus. Tum vero magna celi
serenitas et maris tranquillitas arridebat. Sed ubi longius a lit-
tore est remotus, subito fluctibus vento validissimo concitatis,
tempestas non modica ingruere cepit; que^e sine mora arreptam
navem littori, quod reliquerat, appulit servumque Christi Uodal-
ricum loco suo restituit. Que nimirum tempestas, septem die-
bus continuis mari imminens, omnem profectionis huius cassavit
intentionem.

15. Apostolus autem Pomeranorum, voluntatem Dei pru-
denter in hoc considerans nec Ucranos^f verbo salutis dignos iu-
dicans, ad Stetinenses, qui a fide, ut supra² diximus, apostata-
verant, iter suum direxit; licet multi fideles Christi et familiares
sui eum ab^g hoc proposito revocarent. Nam pontifices ydolorum
plebem apostatam in necem eius unanimiter concitaverant. Sed
ipse, martirii ardore flagrans nullumque suorum hoc opus ag-
gredi presumere cernens, quodam die, secreto collectis pontifi-
calibus exuviis colloque inpositis, solus illo^h tendere cepit et,

a. pertingere C. b. Wendelmut C. c. Adalberti C. d. sic scripsi pro
ueranos C; v. supra p. 94 n. a. e. qua C. f. ueranos C; cf. supra p. 94 n. a.
g. ad C. h. ad Ucranos E.

1. V. supra p. 46.

2. p. 74 (L. III c. 1).

1127 navim ibi fortuito pretereuntem aspiciens, naulo dato eam quantocius ingredi accelerabat. Quod Uodalricus Dei nutu animadvertens, sociis confestim indicavit. Illi pernici cursu eum insecuntur; primusque Adalbertus interpret, eum comprehendens, invitum ac renitentem domum redire compulit. Qui, alcius ingemiscens seque deprehensum acriter dolens, paucos tandem e suis periculose huius vie socios habere meruit; qui, nimium eius fervorem considerantes, nefas censebant eum revocare aut incomitatum relinquere. Navem ergo ingressi, cum civitati Stetinensi appropinquassent, speculatores eos agnoscentes et considerantes ingenti strepitu civibus antiquum erroris magistrum supervenire acclamabant, cui cum gladiis et fustibus occurrere et — ad iniuriam deorum vindicandam — indigne tractare expediret. Quod famulus Dei cum per interpretem agnovisset, intrepidus ac calore fidei armatus, crucis vexillum erexit, pontificalibus sese indumentis preparavit eisque obviam ire deliberavit. Primoque ecclesiam principis apostolorum, quam^a ante portam eiusdem urbis ipse extruxerat, ingressus, debitum Christo persolvebat obsequium, iam iamque prestolans barbarorum occursum suamque in Christo consummationem. Illi vero, post modicum tumultuoso strepitu portis erumpentes, cum servos Christi divinas laudes psallere cernerent, diu multumque hesitantes et inter se quidnam agerent conferentes, tandem, nutu Dei timore perterriti, via qua venerant confusi regrediuntur. Illo igitur die et sequenti sabbato in eadem ecclesia cum suis theorie vacans horam passionis sicienter expectavit. Dominica autem illucescente, primo mane post completa missarum sollempnia Otto servus Dei, pontificali redimitus infula crucisque vexillo prelato, euangelizandi gratia in turbam processit; Uodalricum vice diaconi dalmatica indutum et Adalbertum in loco subdiaconi aliosque verbi Dei cooperatores sibi assumens. Erant autem illic piramides magne et in altum more paganico mu-

a. sequens folium codicis C excisum est. Recepi igitur ex codice E, quae sequuntur: ante portam — usque ad sequentis capitis verba haec: relictis in domo sacerdotibus, egressi unanimiter.

ratae. Coadunato itaque populo, pius praedicator, super unam 1127 cum sociis suis ascendens piramidem, per interpretem suum Adelbertum cepit errantibus viam veritatis aperire et, nisi ab hac resipiscerent apostasia, eternum comminari interitum.

16. Predicante autem eo, ecce pontifex ydolorum anhelus cucurrit, multoque sudore confertissimam irrepens turbam, piramidem percussit ac servum Dei obmutescere magni clamoris virtute imperavit. Ipse enim cum suis priori nocte in necem episcopi summo dominice diei crepusculo conspiraverat; sed Deo ordinante, sompno oppressus gravissimo, hoc frustratus est proposito. Cumque, secunda diei hora expergefactus, virum Dei in conventu forensi iam praedicare audisset, furibundus illuc accurrit ac silentium indixit. Sed famulus Domini constanter que ceperat prosecutus est. Ille autem, gracilem Adelberti vocem interpretis sua clamosa atque altisona comprimens, magna fortitudine barbaris imperat: ut praedicatorem Christi hastis, quas antiquo more Quiritum Romanorum iugiter ferebant, transfodere non morentur. Qui, iussis eius obaudientes, cum dextras alcius ad sagittandum eum elevassent, divine virtutis potentia quasi saxa diriguerunt, ita ut nec hastas deponendi nec os aperiendi facultas esset; sed in altum dextras immobiliter suspensas habebant et quasi in aere ligatas. Quod cernens infaustus ille ydolorum sacerdos, ira inflammatus, ignaviae eos accusare cepit unique eorum hastam manu eripere ac servum Christi conatus est transfodere. Nec mora et ipse dirigit; pudoreque actus in fugam convertitur. Quo abeunte, pius Otto, facto crucis signo, benedictionem plebi inprecatus est; statimque, vinculis resoluti, dextras cum sagittis deponunt. Quo facto, antistes Domini, pro tam evidenti miraculo Deo gratias referens, urbem confidenter ingressus est, ecclesiamque beati Adelberti videns media ex parte destructam, amare flevit et genu flexo cum suis diu orationi institit.

Interea barbari cum gladiis et fustibus congregati portam ecclesiae ambiunt, servos^a Dei ad mortem expetunt; sed mox,

a. servuos E.

1127 divina quadam virtute tremefacti, in fugam convertuntur. Tunc Wirtschachus^a princeps, dudum a pio Ottone de captivitate Danorum ereptus, cum ceteris familiaribus episcopi supervenit, omnimodis eum deposcens, ut ab urbe secederet, priusquam perfidia sacerdotum circumventus, morti succumberet. Abnegat presul beatissimus, dicens: *Quia ad hoc ipsum veni.*

Indicatur ergo generale colloquium post quatuordecim dies, in quo certa diffinitione sacerdotes cum plebe iugum Christi aut susciperent aut penitus abdicarent. Statuta igitur die antistes Domini montem Trigelawi in media civitate, ubi sedes erat ducis, ascendit magnamque domum, huic colloquio oportunam, intravit. Assunt principes cum sacerdotibus natuque maioribus, et facto silencio vir Domini sic ait: *Conventionis nostre dies dudum prefixa iam adest; et ego, salutis vestre avidus, ex ore vestro audire desidero, utrum domino meo Iesu Christo, qui est lux vera, an principi tenebrarum diabolo servire disposuistis.* Respondens unus sacerdotum: *Non inquit tanto tempore colloquium hoc differri oportuit; quia et pridem et nunc et semper deos patrum nostrorum colere fixum est nobis; ideoque noli frustra laborare, sermo tuus non capit in nobis¹.* Quibus auditis, vir Domini: *Video ait quia sathanas excecavit sensum vestrum, ne lumen verum intueri possitis. Innocens ego sum a sanguine omnium vestrum²; non enim subterfugi, quominus verbum Dei oportune importune³ annunciarer^b vobis. Sed quia iugum domini mei Iesu Christi abdicastis, iam vos potestati sathane quem elegistis trado, ut, cum eo perditioni eternae mancipati, hereditatem illam possideatis, ubi vermis non moritur et ignis non exstinguitur⁴.* Statimque de loco suo consurgens, arma spiritualia arripit^c, stolam collo inponit, ut eos anathematis vinculo astringat. Quo viso principes, salubri timore correpti, vestigiis eius advolvuntur; humiliter supplicantes, ut sententiam maledictionis huius suspendat et semel

a. Wirtiscus E.

b. annunciarer E.

c. arripit E.

1. Ioh. 8, 37: „quia sermo meus non capit in vobis“. 2. Cf. Matth. 27, 24. 3. 2 Tim. 4, 2. 4. Marc. 9, 43.

adhuc brevissimi spacium colloquii eis indulgeat. Annuit statim 1127
 presul piissimus; stolaque deposita, resedit. Principes ergo,
 relictis in domo sacerdotibus, egressi, unanimiter^a fidem Christi,
 abdicatis ydolatrie sordibus, receperunt. Primusque Wirtschachus,
 nobilissimus eorum, ad servum Dei ingressus, hanc pro omni-
 bus dedit rationem: *Ego, pater honorande, cum primatibus
 hunc locum regentibus Deo aspirante^b pari voto in hoc con-
 venimus: ut sacrilegos istos sacerdotes, omnium malorum in-
 centores, longe a terminis nostris eliminemus, teque ducem et
 preceptorem in viam salutis eterne avida mente sequamur.* Et
 conversus ad eum, qui prius fuerat locutus, sacerdotem, ait:
*O miser et miserabilis, quid michi dii tui profuerunt, cum, in
 artissima compeditus custodia, mortis sententiam iam iamque
 prestolarer, sociis meis pridem crudeliter strangulatis, ubi visi-
 biliter dominum et patrem meum Ottonem a vinculis me absol-
 vere et desiderate libertati reddere aspexi? Nonne melius est
 michi Deo vivo et vero liberatori meo servire, quam lignis et
 lapidibus vita sensuque carentibus? Tu ergo cum tuis perge
 quo volueris; et^c cave, ne amplius in finibus nostris compareas.
 Quia, domino nostro Iesu Christo regnante super nos, non est
 tibi et simulacris tuis locus in his regionibus.* Quo audito,
 cuncti sacerdotes ydolorum sine mora surgentes pernici fuga
 elapsi sunt, ita ut nullus eorum deinceps ibi comparuerit.
 Antistes autem Domini, super hoc intimas Deo gratias exsol-
 vens, confestim delubra ydolorum cum suis destruere cepit.

17. Deinde eos, qui a fide apostataverant, benedictione
 sacrati fontis et manuum impositione purificans, vivifice crucis
 vexillo et orationis virtute katholice matri cum gaudio recon-
 ciliavit; aliis vero baptismi gratiam et fidei sacramenta contra-
 didit. Sed, ut scriptum est: *Inquirentes Dominum non deficient
 omni bono¹*, predicatori veritatis, in opere Dei laboranti, solite
 benignitatis munificentiam Dominus exhibere dignatus est.
 Piscatores enim Stetinensium autumpnali tempore, quo hec

a. Cf. supra p. 96 n. a.
 c. et et C.

b. inspirante corr. in aspirante C, aspirante E.
 1. Ps. 33, 11.

1127 christiane milicie rudimenta agebantur, ad fluvium Odoram progressi, duos insolite magnitudinis rombones apprehendunt, quorum occursum non nisi verno tempore esse solet. Obstupefacti illi novam hanc capturam, novis predicatoribus celitus provissam, inter se conferunt; moxque apostolo suo cum hoc iocundo munere occurrentes, aiebant: nunquam in illis partibus rombones autumnali tempore visos, sed celesti prodigio ad introitum eius largam hanc benedictionis sue copiam Dominum declarasse. Erant autem rombones tante vastitatis ac longitudinis, ut servo Dei cum universo comitatu suo per quatuordecim dies sufficientem preberent alimoniam, ita ut nobilibus etiam quibusque ex eadem copia reliquie honorabiliter partirentur. Ex hoc vero populus in fide magis ac magis corroborabatur, cum tantam in apostolo suo gratiam tam in temporalium quam et in spiritualium exuberantia profectuum miraretur.

18. Erat autem fanum quoddam longius remotum, ad quod deiciendum fidelem et familiarissimum sibi Uodalricum sacerdotem religiosum direxerat. Sed pauci qui remanserant fautores ydolorum, de muro prospicientes eum illo tendere, iactu lapidum et lignorum caput eius contere moliebantur. Qui tamen Deo protegente illesus evasit, reversusque ad pium patrem Ottonem, insidias eorum retexit. Vir Domini, statim elato crucis vexillo ac pontificali redimitus infula, semet ipsum huic periculo ingerere non dubitavit; cuius presenciam barbari non ferentes, hac illacque dispersi, fuge latibula quesiere. Destructo igitur fano, cum vir Dei reverteretur, arborem nuceam pregrandem ydolo consecratam cum fonte, qui subter fluebat, invenit; quam statim succidere suis imperavit. Accedentes vero Stetinenses suppliciter rogabant: ne succideretur; quia pauperculus ille custos arboris ex fructu eius vitam alebat inopem. Se autem, iureiurando affirmabant, sacrificia, que illic demoniis exhibebantur, generale edicto perpetualiter inhibere. Quorum petitioni doctor piissimus, dictante equitatis ratione, naviter annuit. Dum vero mutuis hec conferunt sermonibus, ecce barbarus ille custos arboris ex improviso accurrit, servoque Dei

post tergum clam assistens, eius sanctum verticem francisca an- 1127
nisu forti appeiit. Sed Dei nutu frustrato ictu, ponti firmo
tabulatu strato^a, cui tum forte superstabat, franciscam tam va-
lide infixit, ut difficultas^b extrahendi moram percussori faceret.

19. Quo viso Adalbertus interpres, nimio terrore con-
cussus, perneciter franciscam barbari manibus eripit et abscondit;
omnesque, insolito horrore circumfusi, sacrilegum invadunt et
mortem ei intentant. Sed pietas Ottonis, ne quid mali homi-
cida patiatur, obsistit eique licet indigno vitam et salutem im-
petrat. Adalbertus autem, in lacrimas erumpens et montem
sancti Michaelis Babenbergensem devota inclinatione salutans:
*Hic ait ictus sine dubio precibus fratrum cenobii sancti Mi-
chaelis a domino meo episcopo divina protectione est aversus.
Quia barbarus iste, naturali ingenio callens, ita sagittandi vel
manu feriendi peritia est imbutus, ut etiam angusti foraminis
orbem non frustrato ictu oppetere idoneus^c esset.*

Illo etenim tempore preces et supplicationes magne, sicut
et semper, apud nos fiebant pro dilectissimo patre Ottone.
Qui nos pre aliis mirum in modum materno potius quam pa-
terno affectu iugiter fovere non desiit; adeo ut quadam vice,
cum, ad curiale colloquium a serenissimo rege Lothario evo- 1125-1132
catus, apud Magdeburgensem urbem graviter egrotaret, ascito
dive memorie Hermannno abbate nostro¹, per quem tunc etiam
preter alia dona trecentas nobis marcas transmisit, in hanc
lugubriter erumperet vocem: *O quam incomparabilis me detinet
gemitus, quod in hac egritudine tam longe remotus sum a dul-
cissimo requietionis mee loco, monte videlicet domini et patroni
mei beati Michaelis archangeli; ubi corde et animo ita fixus in-
hereo, ut, teste Domino, si hac hora illic positus essem, mille
marcas huic beneficio non preponerem.* Quia ergo caritas
exigit caritatem, speciali eius amor — de cuius capite, ut
scriptura loquitur, oleum non defecit², id est meriti eius cari-

a. strate C.

b. difficultate C.

c. odoneus C.

1. qui obiit die 28 Nov. 1147. V. Annales S. Michaelis et Nocr. S.
Mich., Bibl. rer. Germ. V 553 et 578. 2. Eccle. 9, 8.

1125-1132 tas nunquam exidit — specialem orationis intime devotionem rependere curavimus. Nam, ut de ceteris sileam, Ellenhardus senior noster, vir totius prudentie et pietatis ac singulari compunctionis et humilitatis dulcedine amabilis, nocturnas fratrum vigiliis orando prevenire solitus, pro salute pii Ottonis placidas divine clementie aures lacrimosis singultibus eo usque pulsare non cessabat, donec desideratum eius reditum celesti responso audire mereretur. Cum enim nocturno tempore more suo in tenebrosis gradibus capelle ad sanctas virgines intimis pro dilecto patre insisteret precibus, subito clara luce in eodem loco emicante, audivit vocem dicentem sibi: *Exauditus es pro pio Ottone, salvum eum recipies.* Sed his paulisper necessario insertis, nunc revertamur ad ordinem.

1127 20. Igitur confirmatis in fide et doctrina Domini Stetinensibus, cum vir Dei Uznoim redire disponderet, accedentes ad eum urbis eiusdem cives suppliciter rogabant, ut discordiam, que inter eos et ducem Wortizlaum diabolo instigante conflata erat, suo interventu dissolveret. Ad^a hec ille: *Faciam inquit ut vultis; sed peto, legatos honorabiles ex parte vestra mecum dirigi, qui pacis huius munia vobis reportent et, si dux iuste aliquid habet que-rele, de obiectis rationem reddant.* Confestim legati Stetiniensium bono pastori assignantur, qui etiam non parvo in eadem via presuli almo fuere presidio. Nam duo pontifices ydolorum viro Dei mortis laqueos intenderunt; et milites octoginta quatuor clam premiserant, qui eum observantes in reditu iugularent et caput eius palo infixum sibi remitterent. Sed non est sapientia, non est fortitudo, non est consilium contra Dominum¹. Nam et pius Otto, divina se protegente gratia, illesus exivit et infideles illi laqueum et foveam, quam paraverant, inciderunt. Abeunte enim presule beato, maior ille pontifex ydolorum, convocatis amicis suis, magno leticie tripudio eos diem festum diis suis agere precepit, dicens: *Deus noster, quem antiquus ille seductor exterminare conatus est, apparuit michi et sine ambiguitate caput Ottonis hodie amputandum michique transmitten-*

a. At C.

1. Prov. 21, 30.

dum intimavit. Cumque hec furibunda et kachinnanti voce prom- 1127
 sisset, statim a diabolo confractis cervicibus, caput eius retror-
 sum est horrendo et miserabili^a ordine transversum, cerebrum-
 que loco suo exiliens crudeli impetu parieti est appulsum. Quo
 viso amici eius vehementer obstupefacti causam insolite huius
 calamitatis ab eo sciscitantur. At ille, diu horrissono sonitu in-
 crepitans, tandem erupit: *Quia ait servo Dei insidias tetendi*
et vos a via veritatis separare cogitavi, terribiliter a Deo per-
cussus sum. Et his dictis exspiravit; tantoque fetore locus ille
 repletus est, ut nemo illic moriente eo pre intollerantia fetoris
 consistere valeret. Et ut scriptum est: *pestilente multato sa-*
*pientior erit sapiens*¹, omnis populus, audito eius interitu, magis
 ac magis in fidei perseverantia est confortatus. Alter vero
 sacrilegus pontifex nec sic compunctus est. Sed viro Dei con-
 vicia irrogans, aiebat doctrinam eius cito in illis partibus abo-
 lendam. Et quos poterat, a vero tramite conabatur avertere;
 unde et ipse iudicio Dei post modicum interiit. Nam dum,
 causa quadam ingruente, navigio mare transiret, pro corporali
 necessitate egressus, vicine silve latibula peciit. Moxque non-
 nulli ex comitibus suis, nutu Dei zelo iusticie armati, ipsum
 clam insecuntur et apprehensum crudeli laqueo in spissioribus
 locis suspendunt. Sicque dolor eius et iniquitas in verticem
 ipsius descendit². Cum ergo milites octoginta^b quatuor, a
 profano illo sacerdote ydolorum ut supra diximus premissi, virum
 Dei navigantem aspexissent, ex insidiis erumpentes, quo ten-
 deret, clamosa voce requirunt. Respondentes legati Stetinenses,
 cur hoc inquirerent, vicissim percunctantur. At illi, voces civium
 et amicorum suorum agnoscentes, gradum sistunt seque presen-
 tiam eorum illic nescisse fatentur. Illi vero e contra: *Antistes*
inquiunt Domini discordiam inter ducem et nos inveteratam
dissolvere intendit; ideoque non paciemur eum quicquam mole-
stie in hac via incurrere. Sed mortem pro eo subire parati

a. mirabili C, miserabili E.

b. octuaginta C.

1. Cf. Prov. 19, 25 et 21, 11. 2. Ps. 7, 17: „Convertetur dolor eius in caput eius et in verticem ipsius iniquitas eius descendet“.

1127 *sumus. Ergo, si consultum vobis esse cupitis, via qua venistis quantocius revertimini.*

21. Sic igitur nutu Dei cassata est iniqua sacrilegi pontificis machinatio. Et servus Domini urbem Iulin, dudum a se recte fidei sacramentis iniciatam, adiit. Cumque eos doctrinis pariter et exemplis in Domino confortaret, mulier quedam luminibus orbata vestigiis eius provolvitur, benedictionem ab eo et remedium instanter efflagitans. Quod pius Otto ioculariter suscipiens: *Ecce ait ecclesia sancti Adalberti martiris presto est; illuc credens Deo et sanctis eius curre, tangensque campanam auxilium martiris Christi implora.* Solebant enim rudes adhuc in fide barbari, cum aliquod in ecclesia remedium flagitabant, campane sonum, quasi sanctos per hoc ad subveniendum excitantes, movere. Quod cum illa simplicitatis intentione credens exsecuta fuisset, ilico lumen recepit; et exiliens cum gaudio, ad servum Dei regressa, pro sanitate recepta gratias egit immensas. Cui ille: *Non michi inquit sed Deo et sanctis eius gratias age; et in fide, quam didicisti, usque in finem perseverare non desinas.* Post hec miles quidam, habens filium lunaticum, servo Dei eum adduxit; boves quatuor, ut sanitati puerum restitueret, obtulit. Qui, humilitatis gratia hec refugiens, ait: *Erras, homo, non est hoc meum; sed perge ad tentorium, ubi reliquias sanctorum positas habeo, ibique Deo et sanctis eius vota tua pro filio credulus offer, statimque salvum eum recipies.* Qui pergens cum puero fecit, ut doctus erat; moxque filium incolumem viro Dei gratulabundus representavit.

Aug. 10

22. Accidit post hec in festo beati Laurencii, ut presbiter quidam ex comitatu pii Ottonis nomine Bockeus^a preteriens videret rusticos in agro frumenta metentes. Quos modeste compescuit dicens: *Miseri, quid agitis? Hodie natalis dies est beatissimi martiris Laurencii, qui tocius ecclesie summa veneratione celebratur; et vos infelices hunc violare presumitis.* At illi: *Non inquit omni tempore sabatizare possumus; expedit etiam necessaria domibus nostris aliquando providere.* Bockeus autem

a. Bockeus E.

fervens in spiritu: *Scio ait non impune vobis violationem huius* 1127
sacratissime solempnitatis cedere; sed celesti igne omnia, que Aug. 10
illicite messuistis, consumenda fore noveritis. Vix hec ediderat,
 et ecce iuxta verbum eius ignis Dei cecidit e celo tactasque
 messes eorum usque ad favillam consumpsit. Qui, reatum suum
 agnoscentes ac pro hoc suppliciter veniam expetentes, in magna
 deinceps reverentia eximium Christi martirem Laurencium ha-
 buere, se suaque omnia illi tuenda committentes.

Item in urbe Games dicta rusticus quidam cum coniuge sua
 ad metendum exierat in solempnitate assumptionis Dei genitri- Aug. 15
 cis Marie perpetue virginis. Quod cernens predictus viri Dei
 assecla Bockeus, zelo iusticie motus, redarguit dicens: *Cessate,*
infelices, cessate. Nullo modo fas est huic deservire operi in
tam celebri sacratissime matris Domini festivitate. Erat autem
 feria secunda. Et illi: *Hesternam inquit diem dominicam fe-*
riatam habuimus; hodie autem operi manuum intendere debemus.
 Bockeus^a autem: *Et hodie inquit summa devotione feriandum*
est nobis in honore matris Domini, cuius veneranda assumptio
universam Christi exornat ecclesiam. Illis autem non acquiescen-
 tibus sed obstinata mente cepto labori insistentibus, religiosus
 sacerdos Bockeus: *Quia ait verbis meis non creditis, sanguis*
vester erit super caput vestrum; iam nunc transgressionis huius
vindictam evidentibus rerum indiciis experiemini. Necdum
 verba finierat, et ecce rusticus ille incredulus cecidit retrorsum
 et expiravit; partemque segetis, quam metendo apprehenderat,
 tam forti annisu etiam moriens manu retinuit, ut nulla quis-
 quam ratione vel manum aperire vel segetem eruere posset, sed
 mirabili ordine cum hac stupenda alligatione tumulo traderetur.
 Mulier autem, interventu Dei genitricis vite reservata sed simili
 prodigio alligata, scilicet digitis cum segete palmo insolubiliter
 adherentibus, tremens ad virum Dei Ottonem cucurrit, delictum-
 que suum humili confessione detegens, veniam suppliciter expe-
 tiit. A quo protinus consignata et ad memoriam¹ sancti Adal-
 berti martiris illic constitutam transmissa curata est. Et ex

a. Boskeus E.

1. ecclesiam.

1127 eo specialis domine nostre perpetue virginis reverentia in illis partibus sicut et in omni christianitatis loco excrevit.

Post hec miles quidam, frenesi laborans, insano clamore et horrendis membrorum motibus cunctis onerosus erat. Socii vero et cooperatores viri Dei, importunitatem vesanie eius non ferentes, apprehensum eum in locum, ubi servus Domini orare et missarum solempnia celebrare solebat, attrahunt. Erat enim tabulatum ligneum illic exstructum. Ubi dum miles aliquamdiu decumberet, repente sanatus est. Et exiliens gratias egit Deo ac beato presuli; multisque verbo et conversatione salutis fuit.

23. Igitur electus Dei pontifex cum legatis Stetinensium ad ducem Pomeranie tendens, urbem Gaminam adiit. Ubi occurrente sibi duce Wortizlao cum omni plebe, debita reverentia velut angelus Dei exceptus est. Cumque, ecclesiam ingressus, solita Deo precum ymnorumque vota persolvisset, causam pro qua venerat tractare cepit; et uti^a bonus pastor, gregi suo ubique prospiciens, in unitate semper divisa membra ecclesie paci studuit reformare. Dux autem piissimi apostoli sui verba, acsi celitus ad eum delata, suscipiens, benigne humiliterque respondit: *Tuum est, pater amantissime, quicquid dignatus fueris, non petendo a me sed magis precipiendo exigere. Et nos enim et omnia nostra tua sunt; quia in Christo Iesu per euangelium nos genuisti et tenebris ignorancie nostre eterni solis splendorem infundisti. Populus iste, pro quo petis, dure cervicis est¹ nec Deum nec homines reveretur²; multo iam tempore rapinis et latrociniis regnum meum vastando maculavit. Sed tu, pastor dulcissime, efferos mitigasti, de lupis agnos fecisti; ideoque pacis firmissime gaudia deinceps, te mediante, obtineant.* Statimque legati Stetinensium, vestigiis eius advoluti, omnem prioris discordie occasionem penitus abdicarunt, pacisque osculo a duce percepto, beato pontifici debitas reconciliacionis huius gratias egerunt. Emptisque, prout volebant, necessariis, quod antea discordes nullo modo presumpserant, in sua ovantes remearunt.

a. ubi C.

1. Exod. 32, 9.

2. Cf. Luc. 18, 4.

Sed quia bonos semper insecuntur mali et, ut Ysaïas ait, 1127
qui^a recessit a malo, prede patuit¹, Rutheni² paganice erroribus
 adhuc irretiti, audita Stetinensium conversione, graviter indignati,
 quod sine respectu et consilio^b eorum, ydolis renunciantes, chri-
 stianam subissent legem, bello eos lacerare veriti non sunt. Et
 coadunato grandi exercitu, ripas fluminis obsident, aciem horri-
 sono armorum apparatu instructam statuunt et, ubi sit Deus
 eorum vel si invocantibus se succurrere possit, insano clamore
 perquirunt. Illi autem, vexillum dominice crucis preferentes,
 primo impetu eos in fugam propellunt. Sequenti nichilominus
 die velut canes reversi, iterum christianis bellum indicunt; sed
 eodem modo victi et confusi, terga vertunt. Tercia die usque
 ad interuicem deleti, exclamant: Deum christianorum invic-
 tum esse; et si parceretur eis, nequaquam ulterius temere quid
 acturos. Moxque parentibus christianis dimissi, cum timore
 magno et confusione in sua singuli regrediuntur. Antistes
 autem Domini, bona pro malis reddere satagens, eosdem Ruthe-
 nos, qui plebem adhuc in fide neophitam bello turbare non ti-
 muerant, christianis legibus imbuere desiderabat. At illi indu-
 rata fronte sepius ei per legatos suos denunciabant: quia, si
 ipse vel quisquam suorum fines Ruthenie³ predicandi gratia adire
 presumeret, sine mora capitibus amputatis ad lacerandum bestiis
 exponerentur. Sed ut scriptum est: *Iustus quasi leo confidens
 absque timore erit⁴*, piissimus pater alacri devocionis fervore se-
 men fidei Ruthenis spargere disponebat, non veritus incredule
 gentis experiri feritatem^c. Amator enim Christi ardentissimus
 dulcem vitam pro dulcissimo Iesu fundere iam olim siciebat.
 Audiens vero archiepiscopum Danorum⁵, qui dominabatur super
 eos, edicto domni apostolici predicatorem eis directum, nullo
 modo sine consensu et voluntate eius id agendum censuit. Unde
 legatum fidelem Iwanum^d nomine Danorum pontifici direxit, qui
 sollicite investigaret, si iuxta mandatum apostolici Ruthenis ver-

a. que C. b. consiliorum C. c. veritatem C. d. Ywanum C, Iwanum E.

1. Isai. 59, 15. 2. incolae Rugiae insulae. 3. Rugiae. 4. Prov.
 28, 1. 5. Ascerum archiepiscopum Lundensem.

1127 bum salutis erogare disponderet vel si, eum sponte se ingerentem opus euangelii vice sua aggredi, mallet. Per quem etiam more suo, quia liberalissimus semper erat, prefato Danorum presuli balsamum novum cum stola preciosa transmisit. Iwanus vero, tarde post sex ebdomadarum circulum reversus, responsum archiepiscopi retulit, videlicet: se cum principibus terre sue et natu maioribus, quid de his censeant, proxima synodo collaturum; hocque sibi quantocius legatione fida designaturum. Sed et naviculam butyro refertam idem archiepiscopus beato patri nostro pro munere direxit.

24. Interea gloriosissimus rex Lotharius ceterique principes, diuturnam eius absenciam egre ferentes, utpote qui consiliis et piis actibus pre ceteris tunc episcopis regnum nobilitare consueverat, auctoritate sua ei, ut celerius redeat, precipiendo simul et petendo mandavit; adeo ut ipse rex, qui artius eum diligebat, iureiurando affirmaret, se res ecclesiasticas in suum redigere dominium, nisi quantocius sponsam suam ecclesiam Babenbergensem diu viduatam pastor pius desiderato reditu consolando recrearet. Apostolus itaque Pomeranorum, his legacionibus contraire non valens, antequam responsum archiepiscopi Danorum reciperet, ad sedem suam redire compulsus est.

Visitatis ergo circumcirca fidelibus et in fide confirmatis, Christo cui crediderant eos commendans, iter cum suis aggressus est. Cumque, emenso itinere, Poloniam venisset, dux Polizlaus, antiquus sue familiaritatis custos, debiti honoris reverentia eum excipiens in metropolitana Gnezensi ecclesia secum detinuit; tantaque melliflue eius doctrine intendebat aviditate, ut, evolutis octo diebus, vix dilecto patri licentiam abeundi indulgeret.

Dec. 20 Tandem, longa peregrinationis huius angaria Christo favente peracta, in vigilia sancti Thome apostoli novus nostri temporis apostolus ecclesiam suam desiderabili adventu letificans, omni utriusque professionis et sexus plebe in unum concurrente, velut angelus Dei susceptus est. O quam inestimabili spiritualis leticie tripudio fideles Christi, quorum specialis pater et nutritor piissimus hic erat, post tanti temporis peregrinationem, post ac-

quisitum summo patri familias novum gregem, quasi de morte redditum pastorem suum exceperunt! O quam desiderabile fuit 1127
Dec. 20 videre et audire tantam exercitus Christi multitudinem, non solum canonicis sed et monachis nobiliter refertam, uno devotionis ardore, cum lacrimis spirituali gaudio plenis, in occurso eius dulcisone psallentem: *Domine, suscipe me, ut cum fratribus meis sim, cum quibus veniens invitasti me.* Et congrue satis hec suavissima Iohannis apostoli verba — quem singulari affectu patronum sibi elegerat, ita ut cottidie se obitumque suum intimis ei precibus commendaret — pio Ottoni, post secundum iam apostolatum triumphanti, ab omnibus filiis suis iubilo cordis et oris concinebantur. Quia beatus hic, memor verbi Domini per prophetam dicentis: *Quicumque glorificaverit me, glorificabo eum; qui autem contempnunt me, erunt inglorii*¹, omne studium, quod alii pontifices et principes mundanis lucris et castellis atque urbibus edificandis insumebant^a, hic Deo tantum et sanctis eius honorabiliter et officiosissime exhibebat, scilicet ecclesias Christi cellasque fidelium nunc quidem a fundamentis construendo nunc vero ab aliis constructas donis optimis illustrando; ne super harenam quantocius casura sed potius supra firmam petram in eternum mansura conderet habitacula.

25. Cuius edificationis gloriam, in eterna sibi patria repositam, quidam ex fratribus nostris religiosus presbiter Lyppoldus nomine ante quinquennium dormicionis beatissimi huius patris in visione tali, Domino revelante, meruit contemplari. 1134 Montem quendam precelsum et omni amenitate iocundum, contra orientem oculos dirigens, aspexit. Cuius quidem speciosum cacumen ascendere non potuit; sed deorsum stans, vidit, multitudinem copiosam plebis utriusque sexus et etatis ingentia lapidum preciosorum onera super verticem montis magna cum exultatione attrahere ac suavissimum quoddam melos, quod intelligere non potuit, dulci modulatione concinere. Tunc accedens, vacillante licet gressu, quendam ex eis canicie veneranda conspicuum vocavit et, que hec esset multitudo vel cur lapides

a. insinuebant C.

1. 1 Reg. 2, 30.

1134 illos in cacumen montis attraherent, inquisivit. At ille: *Nos inquit sumus, qui elemosinas et beneficia plurima a pio Otone percepimus; ideoque domum preciosam ei in supercilio montis huius edificamus. Cui Lyppoldus: Et quando ait domus hec consummabitur? Ille vero: Post quinquennium inquit perfecta domo, cum leticia et exultatione huc eum introducemus. Sed tu cave, ne cuiquam hec ante quinquennii^a tempus expletum manifestare presumas.* Et his dictis, sublata est visio. Quam
1139 tempore dormitionis beatissimi patris nostri ex ore eiusdem senioris Lyppoldi audivimus; qui et ipse tunc egritudine gravi et longiturna decumbebat et morbo confectus 7 Idus Augusti beato fine requievit in Domino.

1127 post Dec. 20 Sed ut ad priora recurram, pius pater noster Otto, post longam reversus peregrinationem, more suo nos visitans, utpote cum quibus cor unum et animam habebat, requisivit: quinam ex nobis eo absente viam universe carnis ingressi essent. Hoc enim semper, de profectione qualibet rediens, affectu paterno solebat inquirere. Tunc autem sancte recordationis Adalbertus elemosinarius, verus Dei servus et sibi familiarissimus, ad Christum, cui mente et corpore indefessam exhibuit servitutem, migraverat. Cuius transitu vir beatus audito, totus in lacrimas resolutus, se infelicem clamitabat, quod tam beate anime, ad patriam claritatis eterne migranti, solempne funeris obsequium exhibere non meruisset. Erat namque idem frater noster Adalbertus tanto divini amoris igne succensus, ut cottidianis atque uberrimis lacrimarum fontibus gaudia celestis patrie anhelaret, corpus etiam vigiliis ac ieiuniis convenienter attenuaret. Huic servo Dei pauperum cura erat delegata. Quam tanta humilitatis devocione agebat, ut ad exemplum Martirii monachi, de quo beatus Gregorius refert¹, propriis humeris leprosos baiolaret et tam eos quam et alios, diversis morborum generibus pressos, quos videre horrore erat, suis manibus alacriter balneis et la-

a. quinquennium C.

1. S. Gregorii in euangelia L. II homilia 39 c. 10, Opp. ed. Benedictini T. I p. 1650.

vacris unguentisque^a foveret. Cuius fervori pius Otto congratulatus, omnia alendis inopum turbis oportuna liberaliter ministrabat. Nec his contentus, etiam per semet ipsum famis tempore pauperibus^b serviebat, ut non tam oblatione munerum quam etiam proprii corporis sudore gratum Deo elemosine sacrificium celebraret.

Multitudine autem innumerabili pre famis magnitudine ex omni regione ad eum confluente, erant quidam inter eos forciores, qui debilioribus alimenta violenter manibus extorquentes subripiabant. Quorum clamorem ac ploratum vir beatus ferre non sustinens, prudenter huic negotio occurrit; suisque imperat: ut primum, convenientibus eis, quoslibet corpore valentiores segregatos imo omnes in cenaculo concluderent, donec infirmis ac debilibus victum congruentem suis manibus ministraret. Quos statim abire longiusque de loco secedere iubet; ne, sociis de cenaculo emissis, iterum prede fiant. Tuncque demum ingressus, pauperibus inclusis largam alimonie opem exhibebat; precipiens, ne amplius violenciam hanc fratribus suis inferre presumerent.

Hec apud suos agebat. Extraneis autem et etiam trans mare positis Christi pauperibus per fideles nuncios munificus apparebat. Nam per karissimum fratrem nostrum Eberhardum, adhuc in ordine canonicorum Christo militantem, xenia sua Ierosolimam transmisit; sicut et semper religiosis quibusque, sepulchrum Domini visitantibus, agere solebat. Sed et pecunie maximam quantitatem Hirsaugiensibus aliisque monasteriis longius remotis per fratrem nostrum Swiggerum famis tempore dirigebat, ideoque Christi bonus odor in omni loco erat¹.

26. Igitur completo cursu presentis vite in senectute bona, 1139 cum iam tempus adesset, ut fidelis dispensator summi patris familias in gaudium Domini sui intraret, pius Otto dolore corporis id est fluxu sanguinis vehementissime tactus est, ut, velut aurum in camino egritudinis purgatus, introire mereretur aulam, que nullam recipit maculam. Sed ipse — memor scripture

a. ungentisque C.

b. paperibus C.

1. 2 Cor. 2, 15.

1139 dicentis: *Quem diligit Dominus, corripit*¹, et in alio loco ipsum Dominum loquentem: *Ego quos amo, arguo et castigo*² — gratias agebat in infirmitatibus suis³, regemque glorie in decore suo videre⁴ desiderans, exitum suum Deo ac beato Michaeli sanctoque Iohanni apostolo, quos speciales sibi patronos elegerat, cottidianis suspiriis attentius commendabat. Tantum vero lumen ecclesie dum infirmando obscurari cepisset, Christi fidelibus, omni tempore dulcissimo eius affectu et provisione enutritis, inestimabilem meroris fletusque caliginem obduxit. Sed pius pater filiorum lacrimas, quantum poterat, consolando tergebat. Tantaque virtute artus morbo fatiscentes spiritui servire cogebat, ut, excepta dormicionis sue die, non lecto decumberet; sed cottidie in sede sua residens, interdum quoque baculo sustentante procedens, psalmis et orationibus vacaret, quodque rarum est, etiam oleo infirmorum non iacendo sed sedendo perungeretur.

Iun. 29 Adveniente igitur festivitate sacratissima apostolorum Petri et Pauli, cernens diem vocationis instare, Egilbertum, maioris ecclesie decanum, qui ei in episcopatu successit⁵, evocat. Cui, astantibus religiosis abbatibus et presbiteris, omnia sua commendavit dicens: *Hodie natalicius dies est domini mei principis apostolorum Petri et Pauli, cui, queso, res a Deo michi donatas offerre, ut ipse michi ianuam regni celestis aperire et cum collega suo, magistro gentium Paulo, me illuc quantocius dignetur introducere. Locum requietionis mee, montem videlicet patroni mei beati Michaelis archangeli, quasi viscera mea, fovete et tam in spiritualibus quam etiam temporalibus projectui eius in consolationem anime mee omnimodis invigilate. Scitis enim, quam exiguus^a et tenuis omnique monastice religionis vigore destitutus hic locus a me sit inventus, et quomodo cooperante Deo per ministerium meum ad tantum spiritualis vite culmen profecerit, ut speculum et gemma omnium in hac regione monasterio-*

a. exiguis C.

1. Prov. 3, 12.

2. Apoc. 3, 19.

3. Cf. 2 Corinth. 12, 9.

4. Isai. 33, 17.

5. 1139 — 1146.

rum a cunctis censeatur. Prestet Deus, ut nomen hoc inviolabile usque ad finem obtineat, cunctisque fidem ei et reverentiam servantibus pax et benedictio hic et in eternum a Deo reconpensetur. De cetero dilectionem vestram cum universo ovili meo summo pastori, qui vos michi assignare dignatus est, commendando. Ipse vos integros michi reassignet in requie claritatis eterne. Et data super eos benedictione non sine lacrimis, paternum amorem testantibus, emisit; sumptoque misterii salutaris viatico, pervigil in orationibus excubabat, ut pulsanti et vocanti Domino cum exultatione aperiret.

1139
Iun. 29

Nocte ergo, qua festivitas sancti Pauli apostoli agebatur, in supremo spiritu constitutus et iam carne premortuus, corde tamen et flagrantissima voluntate divinis intendebat laudibus; ita ut clericis matutinale coram eo officium personantibus, ille, elevatis manibus sursumque oculis desideranter inde erectis, ad singulas lectiones voce qua poterat *Deo gratias* responderet. Sicque pius Otto feria sexta, hora diei prima, spiritum Deo reddens, beatissimis sedibus et semper karissimo tandem perfruitur Christo.

Iun. 30

Et iam fama volans, tanti prenuncia luctus¹, non solum vicina sed et remotiora queque monasteria, iugiter ab eo necessariis vite adminiculis sustentata, inestimabili perculit mesticia. Nec inmerito. Ostendit enim Dominus populo suo dura, potavit eum vino compunctionis² et inebriavit absinthio³, cum patrem desiderantissimum sustulit; cuius defensione et elemosinarum virtute pax ecclesie tanto tempore nobiliter florebat, sub quo monastice religionis perfectio nova de die in diem incrementa capiebat. In quo deinceps patrono tam solidum erit pauperum Christi solacium? Qui iure cum apostolo aiebat: *Quis infirmatur, et ego non infirmor? Quis scandalizatur, et ego non uror?*⁴ Quis ad eum tristis venit et non gaudens abscessit? Quis opem eius in tribulatione sua expecit et non impetravit? Merito itaque transitum eius ecclesia flebat, de cuius vita tantopere gaudebat. Sed fides resurrectionis flere

1. Virg. Aen. XI, 139. 2. Ps. 59, 5. 3. Thren. 3, 15. 4. 2 Cor. 11, 29.

1139 prohibet, gemitum vero affectus extorquet; etenim tam sancta est de illius gloria exultatio quam pius de transitu luctus. Ignoscendum est flentibus, gratulandum gaudentibus; quia et pium est gaudere Ottonem, et pium est flere Ottonem, dum unus quisque et sibi prestat ut doleat, et illi debet ut gaudeat.

Venerabile corpus eius, a religiosis viris curatum et aromatibus conditum, per singula monasteria est deportatum, illicque vigiliarum excubiis ac missarum solempniis honoratum. Ad extremum in montem sancti Michaelis archangeli, specialis patroni sui, defertur ibique in ecclesia, quam ipse vetustate collapsam in maiorem statum a fundamentis reedificaverat, debito cum honore excipitur. Illic vero in obsequium funeris credi non potest quanta hominum multitudo confluerit. Tota obviam corpori civitas ruit, cuncti ex agris atque vicis multique ex aliis urbibus et regionibus affuerunt. O quantus luctus omnium. Quanta precipue merentium lamenta monachorum et pauperum Christi, qui velut pulli sub alis piissimi patris securi tanto tempore quieverant, seque tam desiderabili nutritoris sui^a presentia fraudari ac defensione nudari cernebant. Quodque sine gemitu referre non possumus, cum sacerdotes religiosi corpus sacrum choro sancti Michaelis inferrent humandum, ubi ad limen interius ventum est, precentor antiphonam: *Domine, suscipe me*, imposuit, tantusque subito ploratus omnium exortus est, ut ipsi etiam funeris baiuli, nimio fletu concussi, cum feretro considerent ac pene terre procumberent. Deinde missarum celebritate a venerabili Ymbricone Wirzeburgensi^b episcopo celebrata, idem presul sermone suavissimo ad populum habito — erat enim magnum verbi tonitruum — testimonium Ieremie prophete pii Ottonis persone adaptavit: *Olivam uberem, pulchram, fructiferam et speciosam vocavit Dominus nomen tuum*¹, tantaque melliflue predicationis suavitate se cunctis mirabilem fecit, ut vere Spiritus sanctus per os eius credatur esse locutus. Hoc ordine dilecti patris corpus ante altare beati Michaelis archan-

a. sua C.

b. Wirtzeburgensi C.

1. Ierem. 11, 16.

geli mausoleo suo inpositum pia fidelium devocione ex tunc et 1139
deinceps frequentatur. Et ne quid de exuviis vigilantissimi
pastoris devoto gregi deesset, etiam intestina eius, dum aro-
matibus condirentur, excisa et in urnam missa, in medio ca-
pelle Dei genitricis terre mandata et rotundo lapide signata
sunt; ut, dum fratres ad celebranda divine servitutis munia illuc
nocte dieque accurrunt, dilecti patris memoriam pre oculis ha-
beant, et beatissimam eius animam assiduis precibus in alta
celorum sustollant.

Imbrico autem, beate recordationis antistes, post deposi- 1139-1146
tionem pii Ottonis miro affectu montem sancti Michaelis exco-
lere non desiit. Qui etiam cum suspiriis intime compunctionis
attestari solebat: nunquam se tantam exequiarum gloriam vi-
disse; beatumque Babenbergensem populum, qui re vera eviden-
tibus rerum indiciis in transitu pastoris sui approbasset, quam
flagrantissimo amore viventi iugiter inheserit.

APPENDIX EPISTOLARUM.

*Huic editioni vitae Ottonis ne desint epistolae quinque supra
L. I c. 10, 12, 13, 14, 15 p. 23—25 omissae, easdem placet
hoc loco proponi:*

I¹.

Domino apostolico Paschali prerogativa meritorum et sanc- 1105 ex. —
titate morum Romane sedis apice condigne sublimato Otto, Dei 1106 in.
gratia Babenbergensis electus, cum omni devotione orationes
promptissimas et servitium tam voluntarium quam debitum.

Quia tandem, Domino miserante et ecclesie sue navim mode-
rante, post nubilas errorum tempestates serene lux veritatis oc-
cidentaliter refulsit ecclesie, ante omnia et super omnia desidera-
mus, scire sanctitatem tuam: in omnibus nos paruisse, uti de-

1. V. Udalrici Bab. cod. n. 128, Bibl. rer. Germ. V 239.

1105 ex.— cuit, legato tuo, episcopo videlicet Constantiensi¹, et summa
 1106 in. devotione cuncta, que per ipsum edocti sumus, partim exsecutos
 fuisse partim, si vita detur, exequi paratos. Quam ob rem
 vestigiis pedum tuorum advoluti, obnixè flagitamus, ut pater-
 nitatis tue servum pacienter audias. Siquidem, mundo iam
 in maligno posito², cum vix cuiquam creditur homini vel loco,
 non parve nos torquent angustie pro ordinationis nostre asse-
 cutione. Proinde, dubius et anxius et fluctibus curarum naufrago
 simillimus, cum principe apostolorum, cuius vicem tenes, ad te
 clamo: *Domine, salva me*³. Et ut paucis summam nostre
 cause concludamus, in hac hora et potestate tenebrarum⁴ te
 solum respiciunt oculi nostri, tibi debite servare obedientiam
 parati sumus; tecum aut consistere aut pro te in carcerem ire
 decrevimus. Auctoritati ergo tue tota mente desideramus inniti;
 tu nobis manum porrige; quod nos velis facere, iube. Si man-
 das, ut ad te veniamus, opes nostre licet rapina et igne sint
 attrite, tamen — desiderio te videndi et consecrationis gratiam
 assequendi — cum debita servitutis nostre benedictione tue
 maiestatis presentabimur aspectibus.

Dignentur ergo viscera pietatis tue super hoc negotio ali-
 quo nos rescripto certum reddere, quo et iter tucius ad te ve-
 niendi nobis premonstretur et benedictionem, quam devoti ef-
 flagitamus, a te percepturos esse significetur. Quam nimirum
 propterea a tue sanctitatis manu tantopere expetimus, quia me-
 tropolitanus noster⁵, etsi per te habeat consecrationis gratiam,
 quod sine lacrimis fateri nequimus, magnam cooperatorum spi-
 ritualis doni patitur penuriam.

II⁶.

1111
 Apr. 15

Paschalis episcopus servus servorum Dei venerabili fratri
 Ottoni Babenbergensi episcopo salutem et apostolicam benedic-
 tionem. Caritatis proprium est bonum, congaudere profec-

1. Gebehardo III. 2. 1 Ioh. 5, 19. 3. Matth. 8, 25. 4. Luc.
 22, 53. 5. Ruthardus archiep. Moguntinus. 6. Udalrici Bab. cod.
 n. 151 l. l. p. 277.

tibus aliorum. Caritas enim non querit, que sua sunt¹. Unde 1111
Apr. 15
et apostolus: *Tunc ait vivimus, si vos statis in Domino*²; et iterum: *Que est enim nostra spes aut gaudium vel corona glorie? Nonne vos ante dominum nostrum Iesum Christum*³? Hoc igitur caritatis debito provocamur et apostolice sedis auctoritate compellimur: honorem debitum fratribus exhibere et sancte Romane ecclesie dignitatem pro suo cuique modo ceteris ecclesiis imperitari. Idcirco, venerabilis frater Otto Babenbergensis episcopo, dilectioni tue pallium ad sacra missarum solempnia celebranda concedimus. Quo nimirum fraternitas tua intra ecclesiam tantum uti noverit, illis solummodo diebus, quos presens descriptio continet; videlicet: die sancto resurrectionis dominice et penthecostes, item nativitate domini nostri Iesu Christi, et in natalicio sanctorum apostolorum Petri et Pauli, in solempnitate sancti Dyonisii martiris, anniversario etiam tue consecrationis die, et dedicationibus ecclesiarum. Cuius nimirum pallii volumus te gratiam per omnia vindicare. Huius siquidem indumenti honor humilitas atque iusticia est. Tota ergo mente fraternitas tua se exhibere festinet in prosperis humilem, et in adversis, si quando eveniunt, cum iusticia erectam; amicam bonis, perversis contrariam; nullius unquam faciem contra veritatem suscipiens, nullius unquam faciem pro veritate loquentem premens; misericordie operibus iuxta virtutem substantie insistens, et tamen insistere etiam supra virtutem cupiens; infirmis compatiens, bene valentibus congaudens; aliena dampna propria deputans, de alienis gaudiis tanquam de propriis exultans; in corrigendis viciis pie seviens, in fovendis virtutibus auditorum animum demulcens; in ira iudicium sine ira tenens, in tranquillitate autem severitatis iuste censuram non deserens. Hec est ergo, frater karissime, pallii accepti dignitas; quam si sollicite servaveris, quod foris accepisse ostenderis, intus habebis. Ad hec etiam crucis vexillum intra Babenbergensis ecclesie parrochiam ante faciem tuam portari concedimus, salva videlicet Moguntiae metropolis reverentia; ut, speciali sancte Romane ecclesie dignitate peditus, specialiter

1. V. Philipp. 2, 21.

2. 1 Thess. 3, 8.

3. 1 Thess. 2, 19.

1111 Apr. 15 eius studeas obedientie ac servitiis insudare. Fraternitatem tuam superna dignatio per tempora longa conservet incolumem. Amen. Scriptum per manum Iohannis scriniarii regionarii ac notarii sacri palatii¹.

III².

1106 Mai. 21 Paschalis episcopus^a servus servorum Dei Ruothardo Maguntino archiepiscopo salutem et apostolicam benedictionem.

Quantum a sue institutionis exordio Babenbergensis ecclesia sedi apostolice familiaris extiterit, prudentie tue notum existimamus. Congruum igitur duximus, ut venientem ad nos venerabilem fratrem nostrum Ottonem, eiusdem ecclesie electum, integra et perfecta preterite familiaritatis gratia susciپرemus. Preterea, quoniam ecclesia eadem per diuturna iam tempora episcopalis officii sollicitudine caruit et propter preteriti scismatis ultionem in Teutonicis partibus perpauca episcopali funguntur officio, iuxta ipsius ecclesie postulationem eidem fratri nostro karissimo, cum per multa ad nos venisset pericula, consentientibus et unanimi sententia decernentibus omnibus, qui nobiscum aderant, episcopalis benedictionis manum Domino largiente contulimus; salva nimirum debita tue metropolis reverentia. Eum igitur ad vos cum nostre gratie dulcedine remittentes, fraternitati vestre litteris presentibus commendamus; ut, quanto sedi apostolice familiarior creditur, tanto apud vos carior habeatur. Data Lateranis 12 Kalend. Iunii.

IV³.

1106 (Mai. 21) Paschalis episcopus servus servorum Dei clero et populo Babenbergensi salutem et apostolicam benedictionem.

a. om. C.

1. Praetermisit Ebo ea, quae in Udalrici cod. l. l. sequuntur: „Datum Romae in insula Lycaonia per manum Iohannis sanctae Romanae ecclesiae diaconi cardinalis ac bibliothecarii vice domni F(riderici) archicancellarii et Coloniensis archiepiscopi 17 Kal. Maii, indictione 4, incarnationis dominicae anno 1111, pontificatus autem domni P(aschalis) secundi papae anno 12, imperii vero H(einrici) quarti imperatoris anno primo. 2. V. Udalrici Bab. cod. n. 132 l. l. p. 249. 3. Udalrici Bab. cod. n. 133 l. l. p. 249—250.

Quante affectionis debito Babenbergensis ecclesia ab ipso sue constitutionis primordio sedi apostolice constringatur, etsi nos lateret, litterarum vestrarum significatio manifestat. Quod affectionis debitum venerabilis frater noster Otto, vestre ecclesie electus, non inconstanter tenuisse et tenere cognoscitur, cum per tot et tanta pericula ad apostolicę sedis visitationem tendere procuravit. Nos igitur eum debite benignitatis affectione suscepimus et iuxta vestre dilectionis desiderium nostris tanquam beati Petri manibus, salvo metropolitani iure, vobis per Dei gratiam presulem ordinavimus. Hunc ergo sub presentium litterarum prosecutione ad ecclesie vestrae regimen remittentes, plena hortamur affectione diligi, plena humilitate venerari. Confidimus enim, eum discipline ecclesiastice futurum esse custodem et salutis vestre sollicitum provisorem. Huic ergo sedulis obedite obsequiis, et gratiam vobis in eo conciliate celestem. Integritatem fidei catholice firmam semper in omnibus conservate, sedi apostolice semper devotius adherete; ut per eius consortium, a contagiis omnibus liberi, ad eterne salutis portum feliciter pervenire Domino largiente mereamini.

1106
(Mai. 21)

V¹.

Otto Dei gratia Babenbergensis episcopus Egilberto preposito, Adelberto decano ceterisque fratribus omne bonum.

1106
Mai.

Quantum ego novi et expertus sum caritatem vestram, scio: vos iam diu expectare eventum nostri laboris; ut de nostro successu, si quidem bene per misericordiam Dei successerit, gaudeatis. Ne ergo diutius suspensi aut dubii de nobis sitis, sed, ut iustum est, sincerissime gratulemini, litteris istis significare vobis decrevimus, quam misericorditer Deus more suo post inmensos labores et sudores plurimos nobiscum operatus sit. In die sancto penthecostes — qui dies ex adventu sancti Spiritus sacra-
cratus et cunctis fidelibus iure solempnis est, illo inquam die — Deo sic ordinante, in Anagnia civitate Campanie, que Romaniam dividit et Apuliam, episcopalis benedictionis munus^a quam-

Mai. 13

a. manum C.

1. Udalrici Bab. cod. n. 131 l. l. p. 247—249.

1106
Mai. 13


vis indignus Deo largiente suscepi, beatissimo papa Paschali manum inponente, ceteris vero episcopis plurimis cooperantibus, clero quoque Romane ecclesie, cuius magna pars ea die in eandem civitatem convenerat, astante et consentiente. Et quod nulli, a Romano pontifice consecrato, nostris temporibus contigit, sine obligatione alicuius iuramenti consecratus sum. Huius loci, huius diei, huius gratuite misericordie Dei semper memores esse debemus; et ut vos memores esse velitis, cum omni gratiarum actione obnixe precamur; precipue cum alie quam plures venerande persone, de magnis rebus apud apostolicam sedem agentes, infecto negotio redierint. Magnificate ergo Dominum mecum et exaltemus nomen eius invicem^a; cui quam facile est resistere superbis, tam facile est humilibus dare gratiam². Quia vero asperum est, confusis temporibus esse prepositos, curandum nobis est et omnino satagendum, ut res dura fiat mercedis occasio. Dum ergo seminandi tempus est, semina bonorum operum serere non cessemus, ut maiores in die messis leticie manipulos reportemus, capiti nostro, quod est Christus, per compagem caritatis adherentes; ne ab eo, mundanis plus iusto intenti lucris, separemur et veluti palmites de vite eiectionis arescamus³. Sed quia in exequendis iusticie operibus divine gratie adiutorio opus est, omnipotentis Dei assiduis precibus clementiam exorate; quatenus ad hec nobis operanda et velle tribuat et posse concedat, atque in ea nos via cum fructu boni operis, quam se esse testatus est⁴, dirigat, ut, sine quo nil asurgimus, per ipsum implere omnia valeamus.

a. in invicem C.

1. Ps. 33, 4. 2. Iac. 4, 6. 3. Cf. Ioh. 15, 6. 4. Ioh. 14, 6.

 BEROLINI APUD WEIDMANNOS (J. REIMER).

 TYPIS GUSTAVI SCHADE, BEROLINENSIS.



BQX
1919.
.08J3

Ebbo - Vita Otto

Ebbo - Vita Ottonis episcopi Bam-
bergensis.

PONTIFICAL INSTITUTE
OF MEDIAEVAL STUDIES
59 QUEEN'S PARK
TORONTO 5, CANADA

243 86.

Prodierunt:

BIBLIOTHECA
R E R U M G E R M A N I C A R U M
EDIDIT
PHILIPPUS JAFFÉ

TOMUS PRIMUS
MONUMENTA CORBEIENSIA
(4 Thaler)

TOMUS SECUNDUS
MONUMENTA GREGORIANA
($4\frac{2}{3}$ Thaler)

TOMUS TERTIUS
MONUMENTA MOGUNTINA
($4\frac{2}{3}$ Thaler)

TOMUS QUARTUS
MONUMENTA CAROLINA
($4\frac{2}{3}$ Thaler)

TOMUS QUINTUS
MONUMENTA BAMBERGENSIA
($5\frac{1}{3}$ Thaler)

Editiones in scholarum usum repetitae ex Bibliotheca rerum Germanicarum separatim prodierunt hae:

BONITHONIS EPISCOPI SUTRINI LIBER AD AMICUM
EDIDIT PHILIPPUS JAFFÉ. $\frac{2}{3}$ Thaler.

VITAE S. BONIFATHI ARCHIEPISCOPI MOGUNTINI EDIDIT
PHILIPPUS JAFFÉ. $\frac{1}{2}$ Thaler.

EINHARTI VITA CAROLI MAGNI EDIDIT PHILIPPUS JAFFÉ.
 $\frac{1}{4}$ Thaler.

WILHOLM BORDI DIALOGUS DE OTTONE EPISCOPO BAMBER-
GENSI EDIDIT PHILIPPUS JAFFÉ. $\frac{2}{3}$ Thaler.